



LALANA LAHARANA FAHA 2014-020
Mikasika ny loharanom-bolan'ireo vondrombahoakam-paritra itsinjaram-pahefana, ny fombafomba fifidianana, ny fandaminana sy ny fomba fiasa ary ny andraikitra ny rafitr'izy ireo.

FAMELABELARANA NY ANTONANTONY

Mifanarakaraka amin'ny nandaniana ny lalàna fehizoro mifehy nyè tandrifim-pahefana, ny fombafomba fandaminana sy fiasan'ireo vondrombahoakam-paritra itsinjaram-pahefana, ary ny fitantanana ny raharahany manokana, izay mamaritra ny fotokevvi-dehibe amin'ny fitsinjaram-pahefana, heverina fa tena ilaina ny manazava misimisy kokoa ny fepetra sasantsasany voarakitra ao.

Ity lalàna ity no mamaritra ny fitsipika mikasika ny fandaminana, ny fomba fiasa, ny anjara andraikitr'ireo vondrombahoakam-paritra itsinjaram-pahefana, izay mifototra amin'ny fahalalahana ara-pitantanana.

Ny Lalàmpanorenana dia mametraka ambaratonga telo eo amin'ny vondrombahoakam-paritra itsinjaram-pahefana. Amin'izany, misy fitsinjarana vaovao tsy maintsy apetraka mba hampirindra ny anjara andraikitr'ireo rafitry ny vondrombahoakam-paritra itsinjaram-pahefana.

Ny fitsinjaram-pahefana tena izy izay mikendry ny fampandraisan'andraikitra ny vahoaka amin'ny fitantanana ireo raharaha ifotony, ity lalàna ity dia mampiditra ny tamberin'andraikitra amin'ny fomba fitantanana ny vondrombahoaka.

Arak'izany, ny andininy faha-3 amin'ny Lalàmpanorenana dia mametraka fa « ny Repoblikan'i Madagasikara dia Fanjakana mifototraka amin'ny rafitry ny vondrombahoakam-paritra itsinjaram-pahefana ahitana ny Kaominina, ny Faritra sy ny Faritany », ary ny Fokonolona, araka ny fepetra voalazan'ny andininy faha-152 amin'ny Lalàmpanorenana « ny Fokonolona, nalamina ho Fokontany, no fototry ny fampandrosoana sy ny firaisan-kina ara-piarahamonina sy arakolontsaina ary ara-tontolo iainana ». Ny tomponandraikitra eny anivon'ny Fokontany dia mandray anjara amin'ny fandrafetana ny fandaharan'asan'ny Kaominina misy azy ireo. Ny Fokontany, amin'ny maha fari-piadidiam-panjakana manakaiky vahoaka azy, no andry lehibe ho an'ny Fitsinjaram-pahefana sy ny Fanapariaham-pitondrana.

Ankoatra izany, ity lalàna ity dia manamafy ireo loharanom-bolan'ny vondrombahoakam-paritra itsinjaram-pahefana isan'ambaratonga efa misy, ary mametraka karazana loharanom-bola vaovao arakaraka ny tandrifim-pahefana natolotra azy ireo, mba iantohana ny fizakan-tenany ara-bola.

Farany, ny fampiroboroboana ny demokrasia eny ifotony dia singa manan-danja eo amin'ny Fitsinjaram-pahefana tena izy. Ity lalàna ity dia mampiditra ireo fitsipika mikasika ny fifidianana

isam-paritra, ka ny fotokevi-dehibe dia mifototra amin'ny fikarakarana fifidianana azo itokisana sy eken'ny rehetra, mangarahara, ary manaja ny fenitra demokratika.

Izao lalàna izao misy andininy miisa fito amby roapolo sy telojato, ary mizara ho lohateny fito toy izao :

- Lohateny voalohany : Ny amin'ny famaritana, ny fiantsoanaaryby renivohitry ny vondrombahoakam-paritra itsinjaram-pahefana
- Lohateny II : Ny amin'ny anjara andraikitry ny rafitra eny anivon'ny vondrombahoakam-paritra itsinjaram-pahefana.
- Lohateny III : Ny amin'ny fandaminana sy ny fomba fiasan'ny vondrombahoakam-paritra itsinjaram-pahefana
- Lohateny IV : Ny amin'ny maha tompon'andraikitra ny vondrombahoakam-paritra itsinjaram-pahefana
- Lohateny V : Ny amin'ny tetibola sy ny loharanom-bolan'ireo vondrombahoakam-paritra itsinjaram-pahefana
- Lohateny VI : ny amin'ny fifidianana isam-paritra
- Lohateny VII :Fepetra samihafa sy farany

Antananarivo, ny



LALANA LAHARANA FAHA 2014-020

Mikasika ny loharano-bolan'ireo vondrombahoakam-paritra itsinjaram-pahefana, ny fifidianana isam-paritra, ny fitsipika momba ny fandaminana sy fomba fiasa ary ny anjara andraikity ny rafitr'izy ireo.

Ny Antemierampirenena no nandany tao amin'ny fivoriana natao ny 20 Aogositra 2014

NY FILOHAN'NY REPOBLIKA,

Araka ny Lalàmpanorenana ;

Araka ny lalàna fehozoro laharana faha 2014- 018 ny mikasika ny tandrifim-pahefana sy momba ny fandaminana sy fomba fiasa ny vondrom-paritra anapariam-pahefana ary ny fitantanana ny raharaha token-tranony ;

Araka ny lalàna fehozoro laharana faha 2004-007 ny 26 jolay 2004 momba ny fitantanambolam-panjakana ;

Araka ny lalàna fehozoro laharana faha 2012-005 ny 22 febroary 2012 anaovana ny fehezan-dalàna momba ny fifidianana ;

Araka ny fanapahana laharana faha 26 - HCC/D3 tamin'ny 10 septambra 2014 noraisin'ny Fitsarana Avo momba ny Lalàmpanorenana,

Araka ny fanapahana laharana faha 27 - HCC/D3 tamin'ny 24 septambra 2014 noraisin'ny Fitsarana Avo momba ny Lalàmpanorenana,

DIA MAMOAKA HAMPANAN-KERY NY LALANA IZAY TOY IZAO NY ANDININY :

Andininy voalohany - Ity lalàna ity no mametra ireo fitsipika mikasika:

- ny fomba fiasa, ny fandaminana sy ny anjara raharahan'ireo vondrombahoakam-paritra itsinjaram-pahefana;
- ny loharanom-bolan'ny raharahan'ireo vondrombahoakam-paritra itsinjaram-pahefana; sy
- ny fifidianana isam-paritra.

LOHATENY VOALOHANY

NY FAMARITANA SY NY ANARANA ENTINY MBAMIN'NY RENIVOHITR'IREO VONDROM-BAHOAKAM-PARITRA ITSINJARAM-PAHEFANA

And. 2 - Araka ny voalazan'ny andininy faha-143 ny Lalàmpanorenana, ireo vondrombahoakam-paritra itsinjaram-pahefana dia ny Kaominina, faritra ary ny Faritany.

And. 3 – Ho hita ao amin'ny tabilao ataovana ity lalàna ity ny isa, ny fetran-tany, ny anarana entiny sy ny renivohitry ny faritany tsirairay avy, ny faritra tsirairay avy ary ny kaominina tsirairay avy.

And. 4 - Ny Faritany dia mamondrona Faritra roa na maromaro.

Ny Faritra dia mamondrona kaominina maromaro.

And. 5 - Ny Kaominina dia azo sokajiana ho Kaominina ambonivohitra na ambanivohitra araka ny habetsaky ny mponina ao aminy.

And. 6 – Ireo Tanàn-dehibe manana endri-tanàna mitambatambatra toy ny tanàn-dehibe sy manana eo am-pelatanany loharanom-bola ilaina amin'ny fampifandanjana ny tetibola izay ampy hiantoka ireo loloha sy andraikitra ara-bola takian'ny fiampianan'ny olon-tsotra ho an'izany kaominina izany no azo atao Kaominina ambonivohitra.

And. 7 - Ny Kaominina ambonivohitra dia tsy maintsy manana mponina miisa roa alina (20.000) farafahakeliny.

And.8 – Ny fanasokajiana ny Kaominina ho Kaominina ambonivohitra na Kaominina ambanivohitra dia faritan'ny didim-panjakana raisina eo am-pivorian'ny Minisitra araka ny ny tolo-kevitra arosan'ny Minisitra miandraikitra ny Atitany sy fitsinjaram-pahefana, ka tsy maintsy hajaina amin'izany ny fepetra voalazan'ny andininy faha-5, sy faha-6 ary faha-7 voalaza etsy ambony.

Ny fanovana ny fanasokajiana dia atao araka ny fepetra mitovy amin'ny fanolorana azy ihany rehefa avy nanontaniana ny heviny ny filankevitra monisipaly na kaominaly sy ny filankevi-paritra voakasik'izany.

Na dia eo aza ny fepetra voalazan'ny andininy faha-5 sy manaraka, ireo kaominina ambonivohitra efa misy dia mitazona ny sata maha kaominina ambonivohitra azy.

And. 9 - Ny Renivohitry ny Vondrombahoakam-paritra itsinjaram-pahefana tsirairay dia eo amin'ny tanàn-dehibe izay mahafeno ireo asa fanohanana sy/na tendro fandroritana ny fampandrosoana ara-toe-karena.

And. 10 – Ireo fanovana ny fetran-tanin'ny vondrombahoakam-paritra itsinjaram-pahefana, na amin'ny fanalana sombim-paritra avy amin'ny vondrom-bahoaka iray mba hitambatra amin'ny iray hafa, na fanatambarana vondrom-bahoaka roa na maroamaro ho iray, dia tapahina amin'ny alàlan'ny lalàna.

Torak'izany koa ny momba ny fanovana sy ny fanendrena ny renivohitry ny vondrombahoakam-paritra itsinjaram-pahefana.

And. 11 – Raha toa ka misy fanovana ireo fetran-tany, na famoronana vondrombahoakam-paritra itsinjaram-pahefana iray, dia hisy vaomiera manokana atsongana mba hiroso amin'ny fitsinjarana ny fananany.

Ireo fombafomba fampiharana ity andininy ity dia hofaritan'ny didy आम-pitsipika.

And. 12 - Ny fanoherana mikasika ny famaritana ny vondrombahoakam-paritra itsinjaram-pahefana dia entina eo anoloan'ny fitsarana mahefa misahana ny ady aminny fanjakana .

LOHATENY II

**NY ANJARA RAHARAHAN'NY VONDROMBAHOAKAM-PARITRA
ITSINJARAM-PAHEFANA**

And. 13 – Ho fampiarana ireo fepetra voalazan'ny andininy faha-151, faha-156 ary faha-160 ao amin'ny lalàmpanorenana, ity lohateny ity no mametra ny anjara raharahan'ny vondrombahoakam-paritra itsinjaram-pahefana.

**ZANA-DOHATENY I
NY ANJARA RAHARAHANA SY NY SORA-DRAHARAHAN'NY
RAFITRA MPANAPAN-KEVITRA**

**TOKO VOALOHANY
NY ANJARA RAHARAHAN'NY
RAFITRA MPANAPAN-KEVITRA**

And. 14 – Eo amin'ny ambaratonga tsirairay amin'ny vondrombahoakam-paritra itsinjaram-pahefana, dia ny Filankevitra no mandamina amin'ny fanapahan-kevitra ataony ireo raharaha nankinin'ny lalàna mba hiantsohany araka ny tandrifim-pahefany, ary izany dia araka ny fenitra momba ny fitantanan-draharaha malaka voalaza ao amin'ny andininy faha-144 ao amin'ny Lalàmpanorenana.

And. 15 – Ny filankevitra no mandray fanapahana indrindra amin'ireto sehatra manaraka ireto

1. Manapa-kevitra mikasika ny teti-bola sy ny kaontim-pitantana izay arosan'ny tompon'andraikitra voalohan'ny Birao mpanantanteraka isan-taona izy.
2. Ny fananganana sampan-draharaha sy antokondraharaha ary tranon'asa ifotony ; ireo **rindradamina** fakan-tahaka mety hampiharina isaky ny **karazana** sy ambaratonga ny Vondrombahoakam-paritra itsinjaram-pahefana dia atovana ity lalàna ity ;
3. Ny fividianana, famindrana amin'ny olon-kafa, sy fametrahana ho antoka ny fananan'ny vondrom-bahoaka, fanorenana na fanafoanana ny zo ananana amin'ny tany aman-trano, ny fiantohana ireo fanana manaraka sy fanana-mifaka isam-paritany, isam-paritra sy eo antoerana,ny fepetra mikasika ny fampanofana tany na trano mihofa ,ary koa ny fizarana ireo fananan'ny vondrom-bahoaka izay iarahany manana amin'olon-kafa ka tsy azo saratsarahana ;
4. ireo fisamboram-bola ;
5. Tetik'asa fanorenana na fameranam-panorenana ary koa fanamboarana gaoavana sy fandravana ireo fanana miraikitra amin'ny tany Vondrombahoakam-paritra itsinjaram-pahefana;
6. Ny fanokafana sy fanovàna ireo lalàna sy arabe miankina amin'ny andraiikiny raha ny didy aman-dalàna manan-kery no jerena, ary koa ny drafitra mikasika ny sorita atao fetrandalàna;
7. Ny fanenkena handray fanomezana sy lova-tolotra;
8. Ny famonoana ny fanoratana tany atao antoka ho an'ny tombotsoan'ny vondrom-bahoaka sy ny fialana amin'ireo fombafomba amin' ny antoka ;
9. Ny fanenkena hiombona antoka ;

10. Ny famaritana, raha misy, ireo fombafomba amin'ny fandraisan'ny anjaran'ny vondrom-bahoaka misy azy amin'ny lahasa iaraha-manao amin'ny vondrombahoakam-paritra itsinjaram-pahefana hafa ;
11. Ny fahafoizana na fanofana sampan-draharaham-panjakana natsangan'ilay vondrom-bahoaka ihany.
12. Ny fandaminana ny fandraisan'anjaran'ny vondrom-bahoaka misy azy amin'ny fiarovana sy amin'ny fandiampahaleman'ny tany ;
13. Ny fanampahana mikasika ny fampidirana fitoriana eny amin'ny fitsaranana na ny fanohanana izany amin'ny anaran'ny vondrom-bahoaka misy azy ;
14. Ireo « dinan'asa » ;
15. Ny famerana ny tahan'ny tamberim-bidy sy haba manokana isakarazany;
16. Ny fidirana amin'ny fikambanana na fiombonana iraisan'ny vondrom-bahoaka eto an-toerana ary koa ny fiara-miasa amin'ny vondrom-bahoaka avy ny ivelany.

Akoatra izany, ny filankevitra dia manapaka ihany koa ny amin'ireo anton-draharaha izay avelan'ny didy aman-dalàna ho andraikiny ny fandinihana azy.

Ireo didy aman-tsipika dia afaka mamaritra, raha ilaina, ireo fomba fampiharana ity andininy ity.

And. 16 – Manome ny heviny mandrakariva ny Filankevitra isiky izay mitaky izany aminy didy aman-dalàna na noho ny fiangavian'ny vondrom-bahoaka hafa na noho ny fangatahan'ny solontenam-panjakana mahefa.

Ankoatra ireo fanapahana sy ireo heviny Filankevitra voalaza etsy ambony, ny Filankevitra dia afaka maneho ny hetahetany mahakasika ireo anton-javatra rehetra tsy tafiditra ao anatin'ny tandrifim-pahefany voatondron' ireo didy aman-dalàna.

TOKO II

IREO SORA-DRAHARAHAN'IREO RAFITRA MPANAPAKEVITRA

And-17-Araka izay voasoratr'ireo andininy faha-87 ka hatramin'ny andininy faha-89 etsy ambony no anaovana ny fanapahana raisin'ny Filankevitra. Na izany aza anefa, dia tsy azo atao mifanohitra amin'ireo fepetra voalazan'ny Lalàmpanorenana sy ny lalàna ary ny didy amam-pitsipika izy ireo.

Soratana ao amin'ny registra izay voaisa ravina sy vitan'ny solontenam-panjakana mahefa sonia rango-pohy ireo fanapahana arakaraka ny fotoana nanaovana azy ireny. Ireo mambra rehetra tonga na voasolo tena nanatrika ny fivoriana no manao sonia, miaraka amin'ny filazana, raha miseho izany, ny antonantony tsy nahafahany izy ireo namonjy fivoriana.

Ny fanapahana tsirairay avy dia alefan'ny lehiben'ny mpanatanteraka any amin'ny solontenam-panjakana mahefa mba hanaovana ny fanaraha-maso ny fanajana ny lalàna ao anatin'ny telopolo andro arian'ny nandraisana azy raha ela indrindra. Soratana eo amin'ny fanapahana ny tsiahy nandefasana azy.

And. 18 - Ny dinan'asa dia volavolaina sy laniana araka ny fomba fanao amin'ny fanapahana..

Ny dinan'asa dia tanterahin'ny mponina rehetra ao amin' ilay Vondrombahoakam-paritra itsinjaram-pahefana ampiharana azy.

And. 19 -Tsy maintsy alefa any amin'ny solotenam-panjakana ny kopian'ny fanapahan-kevitra voasonian'ny Filohan'ny filankevitra sy ny mpampankateny mba hanaovana ny fanaraha-maso ny fanajana ny lalàna. Misy tapakila omena amin'izany.

Ireo fomba fampiharana ny fanaovana ny fanaraha-maso ny fanajana ny lalàna dia hofaritana amin'ny alalan'ny didy aman-tsipika.

And. 20 - Tsy maintsy atao ampy ho fantatry ho fantatry ny besinimaro ny fanapahan-kevitra amin'ny alalan'ny peta-dridrina eo amin'ny toerana fametrahana afisim-panjakana ao amin'ny vondrom-bahoakam-paritra itsinjaram-pahafana na amin'ny alalan'ny fomba hafa mahazatra azy.

And. 21 - Ny fanapahana ataon'ny Filankevitra mbamin'ireo "*dinan'asa*" tondroin'ny andininy faha-18 etsy ambony dia ampiharina tsy misy fepetra raha vantany vao vita ny famohana azy ho fantabahoaka na ny fampahafantarana azy amin'ireo olona voakasika, nefa na izany aza dia tsy tohinina ireo fepetra voalazan'ny andininy faha-18.

And. 22 –Tsy afaka mandray anjara amin'ny fanapahan-kevitra, ireo Filankevitra voakasika amin'ny raharaha, na amin'ny anarany manokana, na amin'ny maha solon-tenan'ny voakasika azy.

And. 23 – Eo anivon'ny kaominina, ny Filohan'ny Filankevitra irery na miaraka amin'ireo tompon'andraikitry na ireo Fokontany dia manao ny raharahan'ny mpampihavana sy/na mpanelanelana amin'ireo olona misy eo amin'ny olona iray na vondron'olona izay mety ho voavaha amin'ireo fomba ireo amin'ny maha *Raiamandreny* azy ankoatr'ireo toe-draharaha voalazan'ny lalàna voatokana ny amin'izany.

And.24 – Eo anivon'ny Faritany sy ny Faritra, ny Filohan'ny Filankevitra irery na mitarika delegasiona na raha ilaina dia, miaraka amin'ny solontenam-panjakana mahefa, dia manao ny raharahan'ny mpampihavana sy/na mpanelanelana amin'ireo olona izay misy amin'ireo samy kaominina eo amin'ny faritra na ny faritany misy azy sy mety ho voavaha amin'ireo fomba ireo.

ZANA-DOHATENY II IREO ANJARA RAHARAHAN'NY RAFITRA MPANATANTERAKA

TOKO VOALOHANY IREO ANJARA RAHARAHA IRAISANA

And.25 - Ny Lehiben'ny mpanatanteraka no mamaritra ny laharam-pahamehana atolotra ny Filohan'ny Filankevitra mba ho raiketina ao amin'ny fandaharam-potoanan'ny Filankevira, izay feran'ny filohan'ny Filankevitra.

And. 26 - Izy no manomana sy manolotra ny teti-bolan'ny Vondrombahoakam-paritra itsinjaram-pahefana, miaraka amin'ny fanohanan'ny mambra sasany ao amin'ny rafitra mpanatanteraka sy ny fiarahamiasan'ireo sampan-draharaham-panjakana anaparaham-pitondrana voakasik'izany.

Izy no miantoka ny fifandraisana maharitra eo amin'ny Filankevitra sy ny solotenam-pajakana mahefa.

And. 27 - Ny Lehiben'ny mpanatanteraka no miantoka ny fanatanterahana ny fanapahana ataon'ny filankevitry ny vondrom-bahoakam-paritra itsinjaram-pahefana.

Ny Lehiben'ny mpanatanteraka manana fahefana handray fitsipika. Amin'izany , izy dia afaka :

1. mibaiko amin'ny alalan'ny didim-pitondrana ireo fepetra ifotony izay nomen'ny didy aman-dalàna eo amin'ny fahamalinany sy fahafeny.
2. mampahafantatra indray ireo didy aman-dalàna sy mampatsiaro ny mponina amin'ny fomba rehetra ireo adidiny amin'ny maha olom-pirenena azy, ireo zony sy ireo andraikitra. Afaka miantso fikambanana tsy miankina amin'ny fanjakana hanao fanabeazana ny maha olom-pirenena ny mponina.

And. 28- Ny Lehiben'ny mpanatanteraka no misolo tena ny vondrom-bahoakam-paritra itsinjaram-pahefana ao amin'ny sora-draharaha tsotra sy ara-panjakana araka ireo fepetra voalazan'ny didy aman-dalàna manan-kery.

Amin'izany, Izy no misolo tena ny vondrom-bahoakam-paritra itsinjaram-pahefana eo anivon'ny fitsarana sy manao ireo sora-draharaha enti-mitahiry ny fahatapan'ny fe-potoana na faheverezan-jo.

And. 29 – Eo ambany fanaraha-maso ny Filankevitra, ny Lehiben'ny mpanatanteraka dia miandraikitra, amin'ny ankapobeny sy araka ny endrika voalazan'ny didy aman-dalàna, ny fanatanterahana ireo fanapahana nataon'ny Filankevitra fa indrindra ny :

1. mba hitandro sady hitantana ny fananana sy ny zo momba ny tombam-pananan'ny vondrom-bahoakam-paritra itsinjaram-pahefana;
2. mba hanao andrimaso ny antokon-draharaha isaky ny faritany, isaky ny faritra sy eny ifotony ary ny fanaovana ny kontin'ny Vondrom-bahoaka;
3. mba handray ireo fepetra ilaina mikasika ny lalana sy ny fifamoivoizana samy hafa ao amin'ny Vondrombahoaka ;
4. mba hitantana ny asa izay efa noraisin'ny Vondrom-bahoaka an-tanana, sy raha misy, mba hanao ny fandraiketana ny tsenan'asa sady hanara –maso ny fanantontosana an-tsakany sy an-davany ireo asa ireo ;
5. passer les actes de vente, échange, partage acceptation de dons et legs, acquisition, transaction ainsi que les marchés et baux lorsque ces actes ont été autorisés conformément à la présente loi.
mba hanao sora-draharaha momba ny fivarotana, fanankalozana, fizarana, fankatoavana ara-dalàna ireo tolo-panana sy lova fividianana, fifanaraham-barotra mbamin'ny tolo-bidy sy fivarotana tany raha toa ka ireo sora-draharaha ireo ka efa nahazo alalana mifanaraka amin'izao lalàna izao.

And. 30- Ankoatra izany, ny Lehiben'ny mpanantateraka dia afaka, amin'ny alalan'ny fanomezandalana nataon'ny Filan-kevitra, miandraikitra manontolo na amin'ny ampahany, sady mandritra ny fe-potoana iasany, ny :

1. mba hirosoana, araka ny fepetra voalazan'ny rijan-teny manankery, amin'ny fetra notondroin'ny Filankevitra, amin'ny fanatontosana ny findramam-bola izay natao ho an'ny famatsiana ny fampiasam-bola voalazan'ny teti-bola sy manao ny sora-draharaha ilaina vokat'izany;
2. mba handray ny fanampahan-kevitra rehetra mikasika ny fanomanana, fanolorana, ny fanatanterahana sy ny fametrahana ny fitsipika, mifehy ny tsenan'ny asa vaventy, ny kojakoja sy ny tolo-draharaha ao anatin'ny fanajana ny fitsipika manan-kery, sy arakaraka ny vidin'izy ireo ary raha toa ka efa voalaza anaty titi-bola ny soram-bola.
3. mba hanao fifanarahana amin'ny trano fiantohana ;
4. mba hanaiky ny fandraisana ny tolom-panana sy ny lova izay tsy arahina fepetra na andraikitra ;
5. mba handray ny fanapahan-kevitra rehetra mikasika ny fividianana, ny fanorenana, ny fivarotana fanana-mifaka ka ny tombam-bidy dia tsy mihoatra ny vidiny izay ho feran'ny Filankevitra ;
6. mba hametra ny karama sy mba hikarakara ny sarany sy ny vola aloa amin'ny fakana mpisolovava, na ny Notera, na ny vadin-tany ary ireo manamahay ;
7. mba hanao ireo sora-draharaha fifampivarotana, fifankalozana, fizarana, fividianana ary ny tsena sy ny fampanofana.

And. 31 - Ny fanapahana izay noraisin'ny Lehiben'ny mpanatanteraka araka ny voalazan'ny andininy teo aloha dia manaraka ny fitsipika ampiharina amin'ny fanapahana raisin'ny filankevitra mikasika amin'ny antony mitovy amin'izany ihany koa.

And. 32 – Ny Lehiben'ny mpanatanteraka dia tsy maintsy manao sonia ireo fanapahan-kevitra rehetra noraisiny ho fampiharana ny fanomezam-pahefana nataon'ny Filankevitra ho azy.

Ny Lehiben'ny mpanatanteraka dia tsy maintsy manao tatitra momba izany fanapahan-kevitra noraisina izany mandritra ny fivorian'ny Filankevitra.

Ny Filankevitra dia afaka mandrakariva mampitsahatra ny fanomezam-pahefana.

And. 33 - Ny Lehiben'ny mpanatanteraka no mpanalalana voalohany ny fandanim-bolan'ny Vondrombahoakam-paritra itsinjaram-pahefana izay afaka mamindra fahefana. Izy no mandidy ny fanatanterahana ny famoriambola isam-paritany, isam-paritra ary eny ifotony, afatsy ireo izay voalazan'ny fepetra manokan'ny fehezan-dalàna ankapobe momba ny hetra mikasika ny famorianketran'ny Vondrombahoakam-paritra itsinjaram-pahefana izany.

Izy no manomboka, mamarana sy manome baiko amin'ireo fandaninana voasoratra ao amin'ny Vondrom-bahoaka.

And. 34 - Izy no lehiben'ny sampandraharaha izay noforonina sy vatsian'ny Vondrombahoakam-paritra itsinjaram-pahefana ara-bola. Mbola izy ihany koa no lehiben'ny sampandraharaha izay napetraky ny Fanjakana eo ambany fiadiadiany. Amin'izany, izy dia miroso amin'ny fandraisana mpiasa izay ilaina amin'ny fampandehanana ny sampan-draharaha sady manendry amin'ny asa rehetra, araka ny rafi-pandaminan'ny asa maharitra izay efa neken'ny Filankevitra ary ny isan'ny mpiasa horaisina voalaza ao amin'ny tetibola.

Izy no mitantana ireo mpiasa ary manara-maso ny fampiharana ny didy aman-dalàna mikasika ny asa ary indrindra ny fahatapahan'ny fifandrisaina amin'ny asa.

And. 35 – Ny lehiben'ny mpanatanteraka dia afaka mangataka tohana sy fanampiana, raha misy liana izany, amin'ireo sampan-draharaham-panjakana anampariaham-piondrana ho fanomanana sy hanatanterahana ny fapahana noraisin'ny Filankevitra. Amin'izany, izy dia miresaka mivantana amin'ny solontenam-panjakana mahefa.

And. 36 - Ny Ny Lehiben'ny mpanatanteraka no mitantana ny faritry ny tanin'ny Vondrombahoakam-paritra itsinjaram-pahefana, izy no mampihatra ny fepetra fandaminana sy fiarovana mifandraika amin'io fitantanana io, indrindra indrindra mikasika ny fifamoivoizana eo amin'io faritry ny taniny io.

And. 37 – Amin'ny fampiharana ny fitsipika fototra momba ny tamberin'andraikitra sy fangarahana eo amin'ny fitanana ireo raharaha eny ifotony, ankoatra fampandraisana anjara amin'ny rafitra ikahonan-doha izay voalaza ny andininy faha-15 ao amin'ny lalàna fehizoro mifehy ny tandrifim-pahefana, ny fombafomba fandaminana sy ny fomba fiasan'ny vondrombahoakam-paritra itsinjaram-pahefana, ary ny fitantanana ny raharahany manokana, ny Lehiben'ny mpanatanterak' ireo Vondrombahoakam-paritra itsinjaram-pahefana dia manao tatitra ireo raharahany amin'ny vahoaka eo an-toerana amin'ny alalan'ny gazety, kabary na amin'ny foba hafa mahomby.

Ankoatra izany, Izy dia manampy amin'ny manentana ireo vahoaka amin'ny fanabeazana ny maha olom-pirenena sy fampandraisana anjara ny vahoaka amin'ny fampandrosoana.

TOKO II
NY ANJARA ANDRAIKITRA MANOKANA
Sokajy Voalohany
NY AMIN'NY BEN'NY TANANA

And. 38 – Ankoatra ireo raharaha iandraiketan' ny Lehiben'ny mpanatanteraka ny Vondrombahoakam-paritra itsinjaram-pahefana izay voafaritry ny toko eo aloha, ny Ben'ny tanàna dia manao ireo raharaha voalaza amin'ity sokajy ity.

And. 39 - Ny Ben'ny tanàna sy ireo lefiny no mpiandraikitra ny sora-piankohonana.

Azon'ny Ben'ny tanàna atao ny mamindra fahefana amin'ny mpiasa iray na maromaro ao amin'ny kaominina, izay feno iraika amby roapolo taona ahay raha kely indrindra, momba ny asa maha-piandraikitra ny sora-piankohonana azy, mba handray an-tsoratra ao amin'ny rejisitry ny sora-piankohonana, ireo fanambarana fahaterahana, fahafatesana, zaza tsy azo, fanjanahana, fananganana sy fanariana, fandraiketana amim-boky sy fanaovana filazana an-tsisiny amin'ireo sora-panjakana na didim-pitsarana, ary koa mba hanao ny fandrafetana ireo sora-draharaha rehetra mifandraika amin'ireo fanambarana lazaina etsy ambony.

Eo ambany fanarahamaso sy andraikity ny Ben'ny tanàna no isahanana io fanomezam-pahefana io.

Ny dididm-pitondrana anaovana ny famindram-pahefana dia sady ampitaina mankany amin'ny solotenam-panjakana no mankany amin'ny Tonia mpampanao ao amin'ny fitsarana ambaratonga voalohany mahefa misy ilay kaominina voakasik'izany.

Ny na ireo mpiasan'ny kaominina amindram-pahefana mba handray ireo fanambarana , handrafitra an-tsoratra, hanoratra amin'ny boky sy hanao filazana an-tsisiny amin'ireo sora-piankohonana voalazan'ity andininy ity, dia manome ara-dalàna ho an'izay olona mila izany, ireo kopia sy vontoa'ny sora-piankohonana ary fanamarinam-piankohonana rehetra na inona na inona karazany, ka eo ambany fanarahamaso sy andraikitra ny Ben'ny tanàna izany.

And. 40 - Ny ben'ny tanàna , na raha tsy eo izy, dia ny solotenam-panjakana no tsy maintsy mikarakara haingana izay ahatomombana tsara an-tsakany sy an-davany ny fanofofana na fandevenana ny olona maty ka tsy anavahana na inona na inona izany.

And.41-Ny Ben'ny tanàna na ny lefitra dia tsy maintsy manao ny fanamarinana eo anatrehan'ny lalàna izay sonia rehetra ataon'ny olona fantany tsara eo anatrehany, na miaraka amin'ny vavolombelona fantatr'ilay olona, na koa araka ny fangatahana ataon'ilay tompon-tsonia, dia fanamarinana izay sonia rehetra mitovy amin'ny sonia lasitra apetrak'ilay olona voakasik'izany ao amin'ny rejisitra manokana hita ao amin'ny Lapan'ny tanàna.

Ny fanaovana lavo-tondro dia tsy azo anaovana fanamarinana eo anatrehan'ny lalàna. Na izany aza anefa, dia azon'ny Ben'ny tanàna na ny lefitra atao ny manamarina fa teo anatrehany tokoa no nanaovana izany.

Ny Sonia vita sora-tànana omen'ireo mpitsara monisipaly eo am-panatontosana ny asa ara-pitondrana ataony dia manan-kery amin'ny toe-javatra sy fotoana rehetra ka tsy ilaina fanamarinana eo anatrehan'ny lalàna raha tahiny izy ireny miaraka amin'ny fitomboky ny Lapan'ny tanàna misy kasem-panjakana.

And. 42 - Manana fahefana ny Ben'ny tanàna mba :

1. hamoaka, amin'ny alalàn'ny didim-pitondrana, ireo fepetra ampiharina eo an-toerana mikasika ireo anton-javatra ankinin'ny lalàna aminy ny fanaovana andri-maso azy sady ananany fahefana rahateo;
2. hamoaka indray ho fanta-bahoaka ireo didy aman-dalàna momba ny fitandroam-pilaminana ary mampahatsiahy ny tsy maintsy hanajana azy ireny amin'ny mponina

And.43 - Anjaran'ny Ben'ny tanàna no mitandro ny filaminana mikasika ireo lalàna ao anatin'ny vohitra, kanefa izany dia momba ny fifamoivoizana amin'ireny lalana voalaza ireny fotsiny ihany.

Azony atao, ka misy fandoavan-tsarany voafetra araka ny tondrom-bidy efa voalamina tsara araka ny fanapahana noraisin'ny Filankevitra, ny manome fahazoan-dalana hijanona na hametraka vonjimaika eny amin'ny lalam-bahoaka, renirano, seranana sy fiantsonana amoron'ny ony sy eny amin'ireo toerana hafa falehan'ny besinimaro kanefa izany dia miankina amin'ny fahatsapana fa azo omena izany fanomezan-dàlana izany raha toa ka tsy manelingelina ny lalam-bahoaka ny fivezivezena an-dranomasina sy amin'ny ony, ary ny fifamoivoizana sy fahalalahan'ny varotra.

Ny alalana amin'ny fanoritana fetran-dalana ataon'ny olona tsirairay, ny fahazoan-dàlana hanorina, hizarazara tany sy handrava, ny fanomezan-dàlana hafa momba ny fikarakarana lalana, dia omen'ny Ben'ny tanàna rehefa nanome ny heviny ireo sampan-draharahara teknika mahefa amin'izany.

Ny fanomezan-dàlana tsy raikitra na azo esorina tsotra izao eo amin'ireo lalam-bahoaka, izay apetraka ho anjara raharahan'ny Ben'ny tanàna, ka ny zava-kendrena amin'izany dia mikasika

indrindra indrindra ny fametrahana ao ambanin'ny tany amin'ny lalam-bahoaka ireo fantsona atohana andalovan'ny rano, entona, herin'aratra, na tefefaonina sy itarihana azy ireny dia azon'ny solontenam-panjakana omena araka ny didy navoakan'ny fitsarana mahefa, raha sendra ka mandà tsy hanome izany ny Ben'ny tanàna kanefa tsy voaporofy tsinona izany fandavany izany fa ho tombontsoan'ny besinimaro.

And. 44 - Amin'ny fisahanana ireo fahefana momba ny fitandroam-pilaminana izay omena ho andraikiny, ny Ben'ny tanàna raha misy ilàna izany, dia mangataka amin'ny Solontenam-panjakana mahefa ny fanampian'ny mpitandro ny filaminana.

And. 45 - Ireo fahefana eo am-pelatanan'ny Ben'ny tanàna dia tsy misakana velively ny fahefan'ny solon-tenam-panjakana mahefa mba handraisany, ho an'ny kaominina maromaro, sy amin'ireo toe-javatra rehetra izay tsy tonga lafatra loatra ny fanatanterahan'ireo tompon'andraikitra monisipaly izany, izay fepetra rehetra mikasika ny fitandroam-pahasalamana, ny tokin'aina sy ny fandriampahalemam-bahoaka.

Raha tandindonin-doza ny filaminana ao anatin'ny kaominina roa na maromaro miray sisin-tany, dia afaka misolo ny toeran'ny Ben'ny tanàna voakasika ny solontenam-panjakana mba hisahana, amin'ny alalan'ny didim-pitondrana omban'ny antonantony, ireo fahefana momba ny fitandroam-pilaminana voatondron'ity sokajy ity.

And. 46 – Ny Ben'ny tanàna dia afaka mandray finiavana handinika, hanolo-kevitra na hampankato, hanely sy hampanao fampiharana ireo « dinan'asa » ao anatin'ny fanajana ny lalàna sy fitsipika manan-kery ary ireo fomba hita fa fanao ka tsy nisy fanoherana avy amin'ny kaominina misy azy

Rehefa avy nakana ny hevitra ny Filankevitra, izy dia afaka mampanao ny vahoaka ireo asa ho an'ny tombontsoa iraisana ho fanatanterahana ny drafitr'asa fampandrosona ifotony,

And. 47 - Ny Ben'ny tanàna, ao anatin'ny faritry ny kaominina misy azy, no mitarika ireo fety amandanonana ofisialy.

And. 48 – Ny Ben'ny tanàna dia afaka mamindra ampahany amin'ny raharahany amin'ireo lefiny.

Izy dia afaka ihany koa manome fahefana hanao sonia amin'ireo taranja izay tafiditra ao anatin'ireo raharahany.

Ny fanomezan-dàlana hanao sonia na ny famindrana fahefana, dia tsy maintsy atao amin'ny alalan'ny didim-pitondrana izay mamaritra ny antony, ny faharetany sy olona nomem-pahefana.

And. 49 – Amin'ireo fety ofisialy, ny Ben'ny tanàna sy ireo lefitriny dia mitondra, atao fehikibo, ny Samboady manana ireo lokom-pirenena, fotsy, mena sy maintso, misy voan'oika miloko volamena ny veri-drambo ny an'ny Ben'ny tanàna sy voan'oika miloko volafotsy ny veri-drambo ny an'ireo lefitry ny Be'ny tanàna.

Ireo samboady ireo dia vidina amin'ny tetibola ny kaominina.

And. 50 – Ny fitondram-pilaminana ao amin'ny kaominina ambonivohitra na ambanivohitra dia eo ambany fahefan'ny Ben'ny tanàna.

Amin'izany, izy dia mikendry ny hisian'ny filaminana tsara rindra, ny tokin'aina sy fandriampahalemana ary fahasalamam-bahoaka.

Ho hita amin'izany indrindra indrindra :

1. Izay rehetra mahakasika ny fisorohana ny loza tsy hihatra sy ny fahatsaran'ny fandalovana amin'ireo arabe, fiantsonana, kianja ary lalana falehan'ny besinimaro, ka tafiditra ao anatin'izany ny fanadiovana azy ireny, ny fanazavana amin'ny alalan'ny jiro, ny fanesorana izay rehetra manakantsakana, ny fandrodanana ireo trano manambana ho rava na ny fanamboarana izany, ny fandrarana mba tsy hametraka zavatra eny am-baravaran-kely na faritra sasany hafa amin'ny trano izay mety hitera-doza ny fidabohany etsy ambany, na ny fandràna tsy hanipitsipy zavatra izay mety hitera-pahavoazana ho an'ireo mpandalo na hiteraka fofon-dratsy manimba.
2. ny fikarakarana ny fampitsaharana izay mety hanohintohina ny fandriampahalemam-bahoaka, toy ny ady saritaka sy fifamaliana miaraka amin'ny savorovoro eny an-dalana, ny fisamonomononana ranitina ao amin'ny toerana vory vahoaka, ny fitangorongoronana arahintabataba, ny horakoraka sy fivorivorianana amin'ny andro alina ka manakorontana ny fialantsasatry ny tany ama-monina, ary izay rehetra fihetsika mety hanelingelina ny fandriampahalemam-bahoaka.
3. Ny fitandroana hisian'ny filaminana tsara amin'ireo toerana izay ahitana olona marobe tafavory, toy ny tsenabe na foara, tsena, koranam-pifaliana sy lanonam-bahoaka, fety fampisehoana, kilalao, trano fialana hetaheta ary ireo toerana hafa falehan'ny besinimaro ;
4. ny fomba fitanterana olona maty, ny fandevenana sy famadihan-drazana, ny fitandroana ny filaminana sy fahamendrehan'ireo vondrom-pasana ; ka tsy azo ekena mihitsy ny fanaovana fanindrahindrana manokana na fanaovana anjorom-bala manokana noho ny finoana na noho ny fivavahana narahin'ilay maty, na noho ny toe-javatra niseho manodidina ny fahafatesany ;
5. ny fanaovana fisafonana mba hisy tsy tapaka ireo zavatra hamidy amin'ny alalan'ny fandanjana na fandrefesana na famàrana ary ny fitandroam-pahasalamana mikasika an'ireo zava-pihinana atolotra hamidy ;
6. Ny fikatsahana izay hisorohana dieny mialoha, amin'ny alalan'ny fitandremana sahaza, sy fitadiavana izay fomba ampitsaharana amin'ny alalan'ny fitsinjarana ny famonjena, mikasika ireo loza sy atambo tahaka ny hain-trano, tondra-drano, fahavakisan'ny fefiloha, fihotsahan'ny tany na vato, ary izay rehetra lozaha voajanahary, areti-mmandringana sy areti-mifindra amin'ny olona, areti-mandringana ny biby ; fanaovana haingana dia haingana izay fepetra rehetra fisorohana ny loza, fanampiana sy famonjena ary, raha misy, dia ny fanairana ny Fanjakana mba hirotsaka an-tsehatra.
7. Ny fikarakarana ny fandraisana vonjimaika ireo fepetra ilaina mikasika ireo olona mpirenireny sy ireo olona adala izay mety hanimba ny saimbahoaka, ny tokin'aina ho an'ny olona na fitandroam-pananana ;
8. Ny fikatsahana fepetra mahomby na fitondram-panafana amin'ireo toe-javatra mampalahelo mety hitranga noho ny firenirenin'ireo biby mampi-doza na masiaka.

And. 51 – Ankoatra ny anjara andraikitry ny Lehiben'ny mpanatanteraka eo amin'ny Vondrombahoakam-paritra itsinjaram-pahefana araka ny voalaza ao amin'ny toko voalohany etsy ambony, ny Lehiben'ny Faritra no misahana ireo anjara andraikitra voalaza amin'ity sokajy ity.

And. 52 – Ny Lehiben'ny Faritra dia miandraikitra ihany koa :

1. ny fanomana sy fanatanterahana miaraka amin'ny fanampian'ireo sampan-draharaham-panjakana anapariaham-pitondrana voakasika, ireo asa fampandrosona novolavolain'ny Faritra.
2. ny fiantohana ny fanatanterahana ny drafi-paritra momba ny fanajariana ny tany ;

3. Ny fiantohana ny fampandrosoana mirindra sy ara-drariny ireo Vondrombahoakam-paritra itsinjaram-pahefana ao anatin'ny fari-piadidiany, indrindra ny fanaovana laharam-pahamehana ny tombontsoa iraisan'ny Kaominina.

And. 53 – Isaky ny fivoriana ara-potoana, ny Lehiben'ny Faritra dia tsy maintsy manao tatitra mahakasika ireo fanapahan-kevitra noraisiny avy amin'ny fanomezan-dàlana nomen'ny Filankevi-paritra. Azon'ny Filankevi-paritra atao ny mampiato mandrakariva ny fanomezan-dàlana nataony.

Ny fanapahan-kevitra noraisina ho fampiharana izany dia tsy maintsy soniavin'ny Lehiben'ny Faritra izy tenany.

And 54 – Akan-kevitra ny Lehiben'ny Faritra mikasika ireo tetikasa na fandaharan'asam-pirenena momba ny fampandrosoana izay mahakasika ny Faritra misy azy. Miandraikitra ny fanamorana ny fanatanterahana izany izy.

And. 55 - Ny Lehiben'ny Faritra dia mampahafantra ny Lehiben'ny Faritany eo amin'ny fari-piadidiany ny fanatanterahana ny asa rehetra voalaza ao amin'ny drafitra fampandrosoany.

Izy no miantoka ny fampifandraisana ny drafim-paritra sy ny drafi-paritany momba ny fanajariana ny tany.

Ny Lehiben'ny Faritra dia afaka mangataka fanampiana sy fanohanana avy amin'ny Faritany amin'ny fantanterahana ireo tetikasa fampandrosoana ny Faritra.

And. 56 – Ny Lehiben'ny Faritra no mitarika sy manentana ny rafitra maharitra enti-manao fanadihadiana ara-toe-karena sy fanaovana teti-pivoarana ho an'ny Faritra. Amin'izany, azony atao ny mifandray amin'ny manam-pahefana eo anivon'ny firenena sy ny avy any ivelany.

And. 57 – Ny Lehiben'ny Faritra dia afaka omen'ny Filankevitry ny Kaominina ao aminy fahazoan-dàlana hifampiraharaha, amin'ny anaran'izy ireo sy ho azy ireo, amin'ireo fikambanana sy manam-pahefana eto an-toerana na ny any ivelany ao anatin'ny fanajana ny Lalàmpanorenana sy ireo didy aman-dalàna manan-kery.

Na izany aza, amin'ny fotoana ifamatorana amin'ny fifanarahana, ireo Ben'ny tanànan'ny Kaominina voakasika dia miara-manao sonia ny fifanarahana amin'ny Lehiben'ny Faritra.

And. 58 – Miainga avy amin'ny drafi-paritra momba ny fanajariana ny tany, ny Lehiben'ny Faritra dia manomana sy manolotra ny drafi-paritra na tetik'asam-paritra momba ny fampandrosoana izay hampidirina ao anaty fandaharan'asa fampiasanm-bolan'ny Fanjakana.

And. 59 – Ny Lehiben'ny Faritra no mandamina sy mandrindra ny fampandrosoana ny Kaominina ao amin'ny fari-piadidiany.

Izy dia manampy amin'ny famolavolana ireo fitaovana fandrafetana teti-pivoarana momba ny fanajariana ny tany sy ny drafitra fampandrosoana eny anivon'ny Kaominina ary koa amin'ny fanatanterahana ireo tetikasa voarakitra anatin'izany drafitra izany.

And. 60 – Azon'ny Lehiben'ny Faritra atao ny mamindra ampahany amin'ny anjara andraikiny amin'ireo lefiny.

Azony atao ihany koa ny manome fahefana hanao sonia amin'ny lafin-javatra tafiditra ao anatin'ny anjara andraikiny.

Ny fanomezan-dàlana hanao sonia na ny fanomezam-pahefana dia tsy maintsy atao amin'ny alalan'ny didim-pitondrana izay milaza mazava ny antony, ny faharetany ary ny olona nomem-pahefana.

Sokajy 3 **Ny amin'ny Lehiben'ny Faritany**

And. 61 – Ankoatra ny anjara andraikity ny Lehiben'ny mpanatanteraka eo amin'ny Vondrombahoakam-paritra itsinjaram-pahefana araka ny voalaza ao amin'ny toko voalohany etsy ambony, ny Lehiben'ny Faritany no misahana ireo anjara andraikitra voalaza amin'ity sokajy ity.

And. 62 – Ny Lehiben'ny Faritany no miantoka ny fanatanterahana ny drafitra momba ny fanajariana ny tany eo anivon'ny Faritany.

Izy no miantoka ny fampandrosoana mirindra sy ara-drariny ireo Vondrombahoakam-paritra itsinjaram-pahefana ao anatin'ny fari-piadidiany, indrindra ny fanaovana laharam-pahamehana ny tombontsoa iraisan'ny Faritra.

And. 63 – Amin'ny maha mpanalalana voalohany ny tetibolan'ny Faritany azy, ny Lehiben'ny Faritany dia :

1. tokony mahafantra ny fizotra ankapoben'ny fampidiran-ketra sy ny fiantraikan'ny fampiasam-bolam-panjakana eo amin'ny fiainana ara-toekarena sy ara-tsosialy ao anatin'ny fari-piadidiany. Manome ny heviny sy toromarika izy amin'izany ary manampy tosika amin'ny fanatrarana ireo tanjona na ireo fetr'andro napetraka.
2. manomana sy mamolavola ny tetibolan'ny Faritany

And. 64 – Eo amin'ny lafiny ny fiarovana ny olona, ny Lehiben'ny Faritany no mandamina sy mandrindra ireo asa hotontosaina raha toa ka misy loza amin'atambo miseho toy ny rivo-doza, safondrano, fahavakisan'ny fefiloha, fihotsahan'ny tany, haintany, haintrano, doro tanety, valanaretina mahazo ny biby, na ireo anton-javatra manohitonhina ny fandriam-pahaleman'ny mponina toy ny halatra tsotra sy halatra zary heloka bevava, ny halatr'omby sy ny herisetra, ny asan-jiolahy na fampihorohoroana amin'ny endriny rehetra.

And. 65 – Ny Lehiben'ny Faritany no mandrindra ireo asa hotontosaina raha toa ka misy fahasarotana eo amin'ny famatsiana ireo entam-barotra sy vokatry ara-tsakafo tena ilaina.

And. 66 – Amin'ny ankapobeny, ny Lehiben'ny Faritany dia tsy maintsy ampahafantarina mivantana ireo fandaharan'asa fametrahana fampitaovana sy fanajariana mahakasika ny Faritany.

Izy no manangona sy manadihady ny filàn'ny vahoaka ary manolotra ny fepetra mifandraika amin'izany arakaraka ny zava-misy.

And. 67 – Azon'ny Lehiben'ny Faritany atao ny mamindra ampahany amin'ny anjara andraikiny amin'ireo lefiny.

Azony atao ihany koa ny manome fahefana hanao sonia amin'ny lafin-javatra tafiditra ao anatin'ny anjara andraikiny.

Ny fanomezan-dàlana hanao sonia na ny fanomezam-pahefana dia tsy maintsy atao amin'ny alalan'ny didim-pitondrana izay milaza mazava ny antony, ny faharetany ary ny olona nomem-pahefana.

TOKO III NY AMIN'NY SORA-DRAHARAHA ATAON'NY LEHIBEN'NY MPANATANTERAKA

And. 68 – Ny Lehiben'ny mpanatanteraka dia mandray didim-pitondrana ho fanatanterahana ireo fanapahana noraisin'ny Filankevitra ary mandrindra ireo fepetra raisina isaky ny Faritany, isaky ny Faritra na eny ifotony momba ireo zavatra nankinin'ny lalàna ho eo ambany fitandremany sy ho eo ambany fahefany.

Mandray ireo fepetra rehetra mahakasika ny anjara andraikitra tafiditra ao anatin'ny tandrifim-pahefany izy amin'ny alalan'ny fanapahana.

And. 69 – Ny sora-draharaha iharan'ny fanaraha-maso ny fanarahan-dalàna dia alefan'ny Lehiben'ny mpanatanteraka avy hatrany any amin'ny Solontenam-panjakana mahefa farafahatarany telopolo andro aorian'ny nanaovana sonia azy.

Ny Lehiben'ny mpanatanteraka dia mitana rejisitra natokana ho an'ireo sora-draharaha alefa hanaovana fanaraha-maso ny fanarahan-dalàna. Io rejisitra dia tsy maintsy voaisa ravina sy vita rango-pohin'ny Solontenam-panjakana mahefa.

Ny tsy fanatanterahana miverimberina ny fandefasana sora-draharaha any amin'ny Solontenam-panjakana dia raisina ho toy ny fahadisoana goavana araka izay voalaza ao amin'ny andininy faha 258 an'ity lalana ity.

And. 70 – Ny sora-draharaha raisin'ny Lehiben'ny mpanatanteraka dia tsy mihatra amin'ny olon-kafa raha tsy aorian'ny fampahafantarana azy ny be sy ny maro, amin'ny alalan'ny famoahana azy eny an-toerana sy ny peta-drindrana, isaky ny misy fepetra ankapobeny, ary amin'ny alalan'ny fampilazana isam-batan'olona ireo voakasik'izany, ho an'ny trangan-javatra hafa.

Ny Lehiben'ny mpanatanteraka eo amin'ny Vondrombahoaka voakasika no manamarina eo ambany fiadidiany ny maha-azo tanterahana ireo sora-draharaha nataony.

Soratana ao anaty rejistra arakaraka ny filaharan'ny vanim-potoana nanaovana azy ireo sora-draharaha.

LOHATENY III NY AMIN'NY FANDAMINANA SY NY FOMBA FIASAN'NY VONDROMBAHOAKAM-PARITRA ITSINJARAM-PAHEFANA

And. 71 - Ity lohateny ity no mifehy ny fandaminana sy fomba fiasan'ireo rafitra eny anivon'ny Vondrombahoakam-paritra itsinjaram-pahefana.

And. 72 - Ireto avy ireo rafitra misy eny anivon'ny Vondrombahoakam-paritra itsinjaram-pahefana :

1. Ny rafitra mpanapa-kevitra antsoina hoe Filankevitra :
 - Filankevitra monisipaly ho an'ireo Kaominina ambonivohitra ;
 - Filankevitra kaominaly ho an'ireo Kaominina ambanivohitra ;
 - Filankevi-paritra ho an'ireo Faritra ;
 - Filankevi-paritany ho an'ireo Faritany ;

2. Ny rafitra mpanatanteraka :
 - Ben'ny Tanàna ho an'ny kaominina ambonivohitra sy ambanivohitra ;
 - Lehiben' ny Faritra ho an'ny Faritra ;
 - Lehiben' ny Faritany ho an'ny Faritany;

TOKO VOALOHANY NY AMIN'NY FILANKEVITRA

Sokajy voalohany Ny amin'ny fandaminana sy ny fomba fiasa

And. 73 - Ny foiben-toeran'ny Filankevitra, araka ny zava-misy, dia ao amin'ny Lapan'ny Faritany, Lapan'ny Faritra, Lapan'ny tanàna, eo amin'ny renivohitry ny Vondrombahoakam-paritra itsinjaram-pahefana.

And. 74 – Mivory ara-potoana indroa isan-taona ny Filankevitra ka ny voalohany dia atao ao anatin'ny telo volana voalohany ary ny fivoriana faharoa kosa dia ao anatin'ny enim-bolana faharoa.

Tsy mahazo mihoatra ny folo andro ny faharetan'ny fotoam-pivoriana tsirairay. Na izany aza, ny fivoriana ho fadaniana ny teti-bola fototra dia azo itarina hatramin'ny dimy ambin'ny folo andro.

And. 75 – Ny fivoriana ho fadaniana ny tetibolan'ny Vondrombahoakam-paritra itsinjaram-pahefana dia toy izao:

- ao anatin'ny tapa-bolana faharoa amin'ny volana Aogositra, ho an'ny Kaominina ;
- ao anatin'ny tapa-bolana faharoa amin'ny volana septambra, ho an'ny Faritra ;
- ao anatin'ny tapa-bolana voalohany ny volana oktobra, ho an'ny Faritany.

And. 76 - Amin'ny fotoana fanavaozana ankapobe ny mpikambana amin'ny Filankevitra, dia atao avy hatrany ny fivoriana voalohany amin'ny alalan'ny fiantsoana ataon'ny Solontenam-panjakana mahefa isaky ny ambaratonga-na Vondrombahoakam-paritra itsinjaram-pahefana.

Io fotom-pivoriana voalohany io dia atao ao anatin'ny herinandro manaraka ny fanambarana amin'ny fomba ofisialy ny voka-pifidianana raikitra, izay nahalany ny mpikambana ao amin'ny Filankevitra.

And. 77 – Amin'ny fisokafan'io fivoriana voalohany io dia ny mpanolotsaina zokiolona indrindra no mitarika ny Filankevitra mandram-pandrain'ireo mpikambana ao amin'ny Biraon'ny Filankevitra ny asany, ary ny mpikambana zandriny indrindra no misahana ny asan'ny mpitantsoratra.

Mandritra io fotoam-pivoriana voalohany io, ny Filankevitra dia mifidy eo anivony ihany ho an'ny fotoam-piasany, ny Filohan'ny Filankevitra sy ny filoha lefitra iray ary mpampakateny roa amin'ny alalan'ny latsa-bato amin'ny anaran'olon-tokana atao indroa mihodina ary atao fifidianana misaraka, ka izy ireo no mandrafitra ny biraon'ny Filankevitra,

Voafidy amin'ny fihodinana voalohany ny kandida nahazo vato mihoatra ny antsa-manila. Raha tsy tanteraka izany dia miroso amin'ny fihodinana faharoa izay andraisan'ireo kandida roa nitarika tamin'ny fihodinana voalohany anjara. Voafidy amin'ny fihodinana faharoa ny kandida nahazo vata be indrindra.

Raha mitovy ny vato azo dia izay kandida be taona no voafidy Filohan'ny Filankevitra.

And. 78 – Azon'ny Filankevitra atao ny mandinika ny raharaha rehetra tafiditra ao anatin'ny anjara andraikiny mandritra ny fivoriana ara-potoana.

Ny filohan'ny Filankevitra eo amin'ny Vondrombahoaka no mamaritra ny laha-dinika amin'ireo fivoriana ireo. Na izany aza dia omena laharam-pahamehana ny Lehiben'ny mpanatanteraka hanolotra lahadinika.

And. 79 – Ny Filoha lefitra no misolo toerana ny Filoha amin'ny asany raha misy tsy fahatongavana na tsy fahafahany.

And. 80 – Ny fotoam-pivoriana voalohany ataon'ny Filan-kevitra dia atokana indrindra ankatoavana ny vokatry ny asa natao nandritry ny taona lasa sy anaovana tomban'ezaka ny fanantaterahana fandaharan'asa. Amin'io fivoriana io no anaovan'ny Lehiben'ny mpanatanteraka tatitra manokana amin'ny Filankevitra mikasika ny toe-java-misy iainan'ny Vondrombahoakam-paritra itsinjaram-pahefana, ny asa sy famatsiam-bolan'ireo sampan-draharaha samihafa ao aminy sy ireo antokon-draharaha miankina aminy. Io tatitra io dia milaza mazava ihany koa ny fipetraky ny fanatanterahana ireo fanapahana noraisin'ny Filankevitra sy ny toetry ny fitantanam-bolan'ny vondrombahoaka.

And.81 – Mandritra ny fivoriana ara-potoana faharoa no andihina ny andaniana ny tetibola fototra ho an'ny taona manaraka.

And. 82 – Eo am-piandohan'ny fotoam-pivoriana tsirairay, dia azon'ny Filankevitra atao ny maka mpiasan'ny Vondrombahoakam-paritra itsinjaram-pahefana hanampy ireo mpampakateny ary hiandraikitra ny fitanana an-tsoratra. Manatrika ny fivoriana izy ireo saingy tsy mandray anjara amin'ny fanapahan-kevitra. Izy ireo no miandraikitra ny fitanana an-tsoratra ny fivoriana izay tokony ahitana ny vaninandro nanaovana ny fivoriana, ny vaninandro nanaikana ny Filankevitra hivory, ny anaran'ireo mpanolontsaina tonga nivory, ny anaran'ireo mpanolontsaina tsy tonga manatrika ny fivoriana, ny anaran'ireo mpanolontsaina nahatonga fialan-tsiny na tsia sy nanome fahefana hisolo tena azy. Ny fitanana an-tsoratra dia tsy maintsy milaza an-tsipiriany ireo adi-hevitra, zava-tsy nampoizina ary hevitra izay nitranga mandritra ny fivoriana.

Ny fitanana an-tsoratra momba ny fivoriana dia tsy maintsy ahitana ny rijan-teny manontolo mikasika ny fanapahana, ny hetahetam-paniriana na ny fakan-kevitra nankatoavin'ny Filankevitra. Ireo fitanana an-tsoratra momba ny fivorian'ny Filankevitra dia tehirizina, ka alahatra araka ny vanimpotoana nanaovana azy, ao anatin'ny rejistra voaisa ravina sy vita rangopohin'ny Solontenampanjakana mahefa ary avoaka ho fantatry besinimaro amin'ny alalan'ny peta-drindrana eo amin'ny toerana natokana ho an'izany.

Ny olom-pirenena rehetra dia afaka maka dika mitovy amin'ny fitanana an-tsoratra ka iantohany ny sarany.

And. 83 - Afaka mivory tsy ara-potona ny Filankevitra rehefa mitaky izany ny toe-drarahan'ny vondrombahoaka. Na dia izany aza, voafetra indray mandeha isam-bolana ihany ny fivoriana tsy ara-potoana ary tsy mihoatra ny telo andro ny faharetany.

Amin'izany, ny Filohan'ny Filankevitra dia tsy maintsy manaika ny mpikambana mba hivory rehefa misy fangatahana ho an'izany, araka ny lahadinika voafaritra tsara, ataon'ny :

- Lehiben'ny mpanatanteraka ;
- antsasa manilan'ny mpikambana ao amin'ny Filankevitra ;
- Solontenam-panjakana mahefa.

Na manao ahoana na manao ahoana, dia tsy azo atao mihoatra ny telo andro ny faharetan'ny fivoriana tsy ara-potoana.

Art. 84 – Ny Solontenam-panjakana dia afaka, raha misy ilàna izany, na araka ny fangatahany mba ho henoin'ny Filankevitra.

Mandray anjara amin'ny adi-hevitry ny Filankevitra izy ary raiketina ao amin'ny fitanana an-tsoratra ny fivoriana ny fanehoan-keviny. Na izany aza, mivoaka ny efitrano fivoriana izy amin'ny fotoana andraisana fanapahan-kevitra.

And. 85 – Ny Filohan'ny Filan-kevitra no manao sonia ny fanaikàna fivoriana. Raketina ao anaty rejistra momba ny fanapahana izany ary atao peta-drindrana na avoaka ho fantatry besinimaro.

Alefa an-tsoratra any an-trano fonenana nosafidian'ireo mpanolontsaina folo andro farafahakeliny mialohan'ny fivoriana ny fiantsoana, ka hita ao amin'izany ny lahadinika miaraka amin'ny famintinana mahakasika ireo raharaha handraisana fanapahan-kevitra.

Mikasika ny fivoriana tsy ara-potoana, dia azon'ny Filohan'ny Filankevitra atao ny manafohy io fepotoana io araka ny tolo-kevity ny Solontenam-panjakana nefa tsy tokony ho latsaky ny iray andro feno mialoha ny fivoriana.

Tsy mikasika afa-tsy ireo raharaha voasoratra ao anaty lahadinika ny adi-hevitra ataon'ny Filankevitra mandritra ny fivoriana tsy ara-potoana.

And. 86 – Tsy azo tanterahina ny fivorian'ny Filankevitra raha tsy ny antsasa-manilan'ireo mpikambana no tonga manatrika.

Raha tsy tratra io fetr'isa io, taorinan'ny fiantsoana voalohany natao ara-dalàna, dia afaka mandray fanapahana ny Filankevitra aorian'ny fiantsoana faharoa, izay farafaratsiny mielanelana telo andro amin'ilay fiantsoana voalohany, na firy na firy isan'ny mpikambana tonga manatrika na soloin-tena araka ireo fepetra voalazan'ny ny andininy faha-89 etsy ambany.

Afaka mandray anjara amin'ny adi-hevitra ataon'ny Filankevitra ny Lehiben'ny mpanatanteraka, fa tsy mandray anjara amin'ny fanapahan-kevitra. Misintaka izy amin'ny fotoanan'ny fanapahan-kevitra. Raketina ao anatin'ny fitanana an-tsoratra ireo fanehoan-keviny mandritra ny fivoriana.

And. 87 – Ny maro an'isa amin'ny mpikambana tonga mivory na voasolo-tena tena no mandany ny fanapahan-kevitra.

Raha tahiny ka mitovy ny isam-bato, afa-tsy amin'ny latsabato miafina, dia ny hevitra ironan'ny Filoha no mahazo tombon-dahany.

Ny mpitazona bokim-bola voalohany eo amin'ny Vondrombahoaka dia manatrika, ho fakan-kevitra, ny fivorian'ny Filankevitra mikasika ny tetibola, ny kaontim-pitantanana ary ny laha-dinika hafa rehetra ilàna ny fahatongavany.

And. 88 – Ny zon'ny mpikambana ao amin'ny Filankevitra handatsam-bato dia natao ho an'ny isambatan'olona.

Na izany aza, dia azo atao ny mamindra ny zo handatsam-bato amin'ny mpikambana hafa iray nomena fahefana amin'izany.

Ny mpikambana amin'ny Filankevitra tsy afa-manatrika ny fivoriana dia afaka manome fahefana ny mpikambana hafa nofinidiny, amin'ny alalan'ny fanomezam-pahefana an-tsoratra, mba handatsabato amin'ny anarany.

Tsy mahazo mandray afa-tsy fanomezam-pahefana tokana ihany ny mpikambana iray ao amin'ny Filankevitra.

And. 89 – Amin'ny ankapobeny dia amin'ny alalan'ny tsanga-tànana ampahibemaso no hanatanterahana ny fifidiananao anivon'ny Filankevitra.

Raketina ao amin'ny fitanana an-tsoratra momba ny fivoriana ny isan'ny mpandatsa-bato miaraka amin'ny vokatry ny fifidianana natao.

Miroso amin'ny latsabato miafina ny Filankevitra isak'izay mitaky izany ny ampahefatry ny mpikambana tonga mivory, na rehefa hanao fanendrena na fisoloan-tena.

Amin'io tarehin-javatra farany io, raha tsy nisy na dia kandida iray aza nahazo ny antsasa-manilan'ny vato rehefa natao ny ny fihodinana indroa miantoana tamin'ny latsabato miafina, dia miroso amin'ny fihodinana fahatelo ka izay mahazo vato be indrindra no lany. Raha mitovy ny isam-bato azo, dia ny kandida be taona no lany.

And. 90 – Ny Filohan'ny Filankevitra, na raha tsy afaka izy, dia ny Filoha Lefitra, no mitarika ny fivoriana.

Mandany ny fitsipika anatin'ny Filankevitra amin'ny alalan'ny fanapahana ao anatin'ny telo andro aorian'ny nandraisany ny asany.

Ny fitsipika anatin'ny Filankevitra no mamaritra indrindra indrindra ireo fombafomba fampiharana ny fanontaniana am-bava sy fanontaniana an-tsoratra ary ny fangataham-panazavana atao amin'ny rafitra mpanatanteraka.

And. 91 – Azon'ny daholobe atrehina ny fivorian'ny Filankevitra.

Na izany aza, azon'ny Filankevitra atao ny mandray fanapahan-kevitra tsy azon'ny besinimaro atrehina araka ny tolo-kevitra ny Filohan'ny Filankevitra, na noho ny fangatahan'ny Lehiben'ny mpanatanteraka, na ny ampahefatra ny mpikambana tonga manatrika farafahakeliny.

And. 92 – Ny Filoha no miantoka ny filaminana amin'ny fivoriana ataon'ny Filankevitra.

Azon'ny Filohan'ny Filankevitra atao ny mangataka ny mpitandro ny filaminana izay mitoetra ao anatin'ny Vondrombahoakam-paritra itsinjaram-pahefana, raha toa ka ilaina izany.

And. 93 - Tsy maintsy atao peta-drindrina ao anatin'ny havalohana ao amin'ny biraon'ny Vondrombahoakam-paritra itsinjaram-pahefana ny fanapahana noraisin'ny Filankevitra, raha tsy izany tsy azo ampiarina amin'ny hafa, ary tafiditra anatin'izany ny antontan-taratasy mikasika ny tetibola.

Sokajy faha-2

Ny fepetra mihatra amin'ny Filankevitra sy ny mpikambana ao aminy

Art. 94 – Aorian' ny Filohan'ny Filankevitra, ny filoha lefitra sy ny mpampakateny, ireo mpikambana hafa ao amin'ny Filankevitra dia mandray ny laharany araka ny sokajin-taonany.

Ny dika mitovy amin'ny laharan'ny fiamboniana dia apetraka eo amin'ny biraon'ny Vondrombahoakam-paritra itsinjaram-pahefana voakasika, sy ny biraon'ny Solontenam-panjakana mahefa ka azon'ny mpikambana tsirairay fantarina.

Art. 95 – Ny mpikambana rehetra ao amin'ny Filankevitra izay tsy manoina ny antso tamin'ny fanaikàna hivory in-telo misesy, kanefa tsy misy antony marim-pototra na ara-dalàna hitan'ny Filankevitra, dia esorina tsy ho mpikambana ao amin'ny Filankevitra ho an'ny fotoam-piasany sisa tavela, rehefa avy nasaina nitondra fanazavana.

Ireo tsy fahatongavana mivory dia amarinina amin'ny alalàn'ny filazana ao anatin'ny rejlstra voatokana handraisana ireo fitanana an-tsoratra ny Filankevitra.

Ny Filohan'ny Filankevitra no mampafantatra izany amin'ny Lehiben'ny mpanatanteraka, ary ity farany no mandefa ny tatitra any amin'ny Solontenam-panjakana mahefa, ka izy indray no mampakatra ny raharaha eny amin'ny fitsarana mahefa miandraikitra ny ady amin'ny Fanjakana.

And. 96 – Alefa an-tsoratra any amin'ny Filoha ny fametraham-pialàna ataon'ny mpikambana ao amin'ny Filankevitra. Raha vantany vao maharay fametraham-pialàna ny Filohan'ny Filankevitra dia mampafantatra izany ny Lehiben'ny mpanatanteraka ary ity farany no mitondra ny raharaha eo anatreha'ny Solontenam-panjakana mahefa.

Raikitra tanteraka ary tsy azo sintonina intsony ny fametraham-pialàna raha vantany vao voarain'ny Filohan'ny Filankevitra.

And. 97 - Mandritra ny fotoam-pivoriann'ny Filankevitra, ireo mpampiasa any amin'ny sehatra tsy miankina dia tsy maintsy mamela malalaka ny mpiasa ao aminy mpikambana amin'ny Filankevitra mba handray anjara amin'ny fivorian'ny Filankevitra, rehefa avy naneho ny taratasy fiantsoana amin'ny fomba ofisialy.

Mihatra amin'ny mpiasam-panjakana koa ireo fepetra voalaza ireo.

And. 98 – Tsy mihatra amin’ny mpikambana avy hatrany ao amiiin’ny Filankevitra ireo fepetra voalazan’ny andininy faha-95 sy andinny faha-96 etsy ambony.

And. 99 – Tsy azo atao mihoatra ny isan’ny mpikambana voafidy ny isan’ny mpikambana avy hatrany ao amin’ny Filankevitra eny amin’ny vondrombahoakam-paritra itsinjaram-pahefana isan’ambaratongany.

Sokajy 3 Ny amin’ny vaomiera

Art. 100 – Azon’ny Filankevitra atao ny manangana vaomiera, eo anivony, mba handinika ireo raharaha mahakasika ny Vondrombahoaka amin’ny endriny samihafa.

Mandritry ny fotoam-pivoriana, dia omanina eo anivon’ny vaomiera ny asa sy ny adi-hevitra ataon’ny Filankevitra.

Fanapahana raisin’ny Filankevitra no ananganana ireo vaomiera ireo.

Tsy maintsy mikambana ao amin’ny vaomiera iray farafaharatsiny ny mpanolotsaina tsirairay.

And. 101 - Amin’ny fotoana hametrahana ny vaomiera no ifidianan’ireo mpikambana ao aminy, ny Filoha iray, filoha lefitra iray ary mpampakateny iray.

Ny filohan’ny vaomiera no miandraikitra ny fiantsoana ny mpikambana ao aminy.

And. 102 - Ny vaomiera no mandinika mialoha ireo raharaha ary mandroso izany ao anivon’ny Filankevitra mba andraisana fanapahana ireo posa-kevitra, tatitra, ary tolo-kevitra mahakasika izany.

And. 103 - Ireo vomiera ihany koa no mandinika, araka izay tandrifim-pahefana ananany, ny tolon-kevitra, tetik’asa sy fitakiana nalefan’ireo olom-pirenena any amin’ny Filankevitra izay mahakasika olana mifandraika amin’ny tombontsoan’ny besinimaro.

And. 104 – Azo antsoina handray anjara amin’ny asa ataon’ny vaomiera ny olona rehetra, raha ilaina, ka ho fakan-kevitra fotsiny ihany.

And. 105 - Ny fitsipika anatin’ny mifehy ny Filankevitra no mamaritra ny karazam-baomiera atsongana, ny isan’ny mpikambana ao aminy, ny fomba fanendrena azy ireo ary koa ny fitsipika mikasika ny fomba fiasany.

Manaraka ny fepetra voalazan’ny andininy faha-82 etsy ambony ny fitanana an-tsoratra eo anivon’ny vaomiera.

And. 106 – Ampahafantarina ny Filankevitra ny fizotry ny raharahan’ny vondrombahoaka.

Sokajy faha-4 Ny amin’ny fahabangan-toerana

And. 107 - Ireto avy ny antony mahatonga ny fahabangantoeran'ny mpikambana ao amin'ny Filankevitra :

- ny fahafatesana ;
- ny tsy fahatongavana sy ny fandoazana toeram-piasana voamarina sy hita fototra ;
- ny fametram-pialana ;
- ny fionganana ;

Na koa ireo antony hafa rehetra mahatonga tsy fahafahana voamarina sy hita fototra.

And. 108 - Ny fametraham-pialan'ny mpikambana ao anatin'ny Filankevitra dia alefa an'ny Filohan'ny Filankevitra, ary andefasana dika mitovyny Lehiben'ny mpanatanteraka sy ny fitsarana misahana ny ady atao amin'ny Fanjakana.

Ampitain'ny Lehiben'ny mpanatanteraka any amin'ny Solontenam-panjakana mahefa ny taratasy fametraham-pialan'ny mpikambana ao amin'ny Filankevitra.

And. 109 - Ny antony mahatonga fionganana'ny mpikambana ao amin'ny Filankevitra dia voafaritra ao amin'ny andininy faha-257 sy ny manaraka amin'ity lalàna ity.

And. 110 – Na inona na inona anton'ny fahabangantoerana, ny Solontenam-panjakana no mampakatra avy hatrany ny raharaha eny amin'y fitsarana mahefa misahana ny ady amin'ny Fanjakana, ary izy indary avy eo no miroso amin'ny fanamarinana ny fahabangan-toerana ary manendry ny olona manaraka anaty lisitra mba hisolo ny toerany.

Ny fitsarana no mampahalala ny didy noraisiny manamarina ny fahabangan-toerana amin'ny Minisitra misahana ny Atitany sy ny Fitsinjaram-pahefana.

And. 111 - Raha toa ka lany daholo ny olona ao anaty lisitra, dia miroso amin'ny fifidianana amin'ny ampahany izay tanterahina ao anatin'ny roapolo amby zato (120) andro manomboka amin'ny vaninandro nivoahan'ny didim-pitsarana mikasika izany.

Na izany aza, ny fifidianana ampahany mba hanoloana ny mpikambana ao amin'ny Filankevitry ny vondrombahoakam-paritra itsinjaram-pahefana dia tsy afaka tanterahina raha tsy ny antsasamanila farafahakeliny ny toerana ao anatin'ilay filankevitra mihitsy no iharan'ny fahabangana.

Tsy tanterahina intsony ny fifidianana amin'ny ampahany raha toa ka ao anatin'ny efatra amby roapolo (24) volana mialoha ny fahataperan'ny fotoam-piasana no misy fahabangan-toerana.

TOKO II

NY AMIN'NY RAFITRA MPANATANTERAKA

Sokajy voalohany

Ny amin'ny fandaminana sy ny fomba fiasa

And. 112 - Ny rafitra mpanatanteraka no misahana ny fanatanterahana ny fanapahana noraisin'ny Filankevitra.

Ny rafitra mpanatanteraka dia tarihin'ny Lehibeny voafidy amin'ny alalan'ny latsa-bato andraisan'ny daholobe anjara, araka ny fepetra faritan'ny lalàna, ary ahitanna ireo tompon'andraikitra ny sampan-

draharaha natsangana sy vatsian'ny vondrombahoakam-paritra itsinjaram-pahefana ara-bola, na natolotry ny Fanjakana ho azy.

And. 113 – Ny rafi-pandaminana lasitra ho an'ny vondrombahoakam-paritra itsinjaram-pahefana isan'ambaratongany dia atovana amin'ity lalàna ity.

Fanapahana raisin'ny Filankevitra no mamaritra ny rafi-pandaminana raikitra ho an'ny vondrombahoakam-paritra itsinjaram-pahefana.

And. 114 - Tendrenn'ny lehiben'ny mpanatanteraka amin'ny alalan'ny didi-pitondrana ny mpikambana ao anatin'ny rafitra mpanatanteraka, ka ny isany dia ferana arakaraky ny fahafaha-manao ara-bolan'ny vondrombahoakam-paritra itsinjaram-pahefana. Manaraka izany fomba sy fepetra izany koa ny fampitsaharana azy ireo amin'ny asany.

Tsy azo ampirafesina amin'ny asan'ny mpanolo-tsaina ny andraikitra maha mpikambana ao amin'ny birao mpanatanteraka.

And. 115 - Tsy misy olona afaka mikambana ao anatin'ny rafitra mpanatanteraka mihoatra ny iray eny anivon'ny vondrombahoakam-paritra itsinjaram-pahefana.

And. 116 - Tsy afaka misahana ny asa maha lefitry ny Lehiben'ny mpanatanteraka, na dia miserana fotsiny aza, eo anivon'ny vondrombahoakam-paritra itsinjaram-pahefana misy ny toeram-piasany, ny mpitaky ny volam-panjakana, sy ny mpitazona ny bokim-bolan'ny tahirimbolam-panjakana.

Ny rafitra mpanatanteraka dia ahitana ny Lehiben'ny mpanatanteraka sy ny/ireo lefiny. Ny Lehiben'ny mpanatanteraka, lehiben'ny fitantanan-draharahan'ny vondrombahoaka, dia afaka mampiasa olona misahana ny fitantanan-draharaha sy ara-teknika tendrena amin'ny alalan'ny didy amam-pitsipika.

Ny mpitazona ny bokim-bolampanjakana voalohany eo anivon'ny Kaominina ambanivohitra tsy ahitana mpitantana bokim-bolan'ny tahirimbolam-panjakana dia tendrena amin'ny alalan'ny didim-pitondrana raisin'ny Minisitry misahana ny fitantanam-bola sy ny teti-bola araka ny tolo-kevitra nataon'ny Ben'ny tanàna ary nahazo fankatoavana avy amin'ny Lehiben'ny Distrika mahefa.

And. 117 - Raha toa ka misy fifidianana Lehiben'ny mpanatanteraka vaovao na inona na inona antony dia atao ny fanendrena vaovao ny mpikanbana ao anatin'ny rafitra mpanatanteraka.

And. 118 – Azon'ny Lehiben'ny mpanatanteraka atao ny mamindra ny ampahany amin'ny anjara andraikiny ho an'ny mpiara-miasa aminy iray na maromaro, eo ambany fanaraha-masony sy fiadidiany, amin'ny alalan'ny didim-pitondrana.

Mitoetra hatrany ireo famindrana andraikitra ireo raha mbola tsy nofoanana.

And. 119 - Raha misy fifanolanana ara-tombotsoa mapifanditra ny Lehiben'ny mpanatanteraka sy vondrombahoakam-paritra itsinjaram-pahefana, dia ny Filohan'ny Filankevitra na ny solontenany notendrena avy amin'ny mpikambana ao amin'ny Filankevitra no misolo tena ny vondrombahoaka eny amin'ny fitsarana.

Raha misy fifanolanana ara-tombotsoa mapifanditra ny Lehiben'ny mpanatanteraka sy ny Filohan'ny Filankevitra na ilay mpikambana voatendry sy ny Vondrombahoakam-paritra itsinjaram-pahefana, dia ny antsasa-manilan'ny mpanolo-tsaina no manendry mpikambana iray hafa ao aminy hisolo tena ny vondrombahoakam-paritra itsinjaram-pahefana amin'ny fifanarahana.

And. 120 - Raha toa ka mandà na manao tandrevaka amin'ny fanaovana ny raharaha nankinin'ny lalàna aminy ny Lehiben'ny mpanatanteraka, indrindra fa ny mahakasika ny fitandroana ny filaminana, dia azon'ny Solontenapanjakana mahefa atao ny miroso avy hatrany amin'ny fandraisana andraikitra, rehefa avy nandidy azy fa tsy nahitam-bokatra.

And. 121 - Ny rafitra mpanatanteraka dia mivory amin'ny alalan'ny fiantsoan'ny lehibeny isaky ny mitaky izany ny raharahan'ny vondrombahoakam-paritra itsinjaram-pahefana.

And. 122 - Ny Lehiben'ny mpanatanteraka, na ny lefiny voalohany raha misy ny tsy fahafahany, no mitarika ny fivoriana ataon'ny rafitra mpanatanteraka.

Ny fivoriana dia afaka tanterahina ampahibemaso na koa tsy azao atrehan'ny daholobe.

Azon'ny Lehiben'ny mpanatanteraka atao ny manasa olona hanatrika ny fivorian'ny rafitra mpanatanteraka, noho ny fahaiza-manao ananany, izay mety hitondra fanampim-panazavana amin'ireo raharaha voasoratra ao amin'ny laha-dinika.

Sokajy faha-2 Ny amin'ny fahabangan-toerana

And. 123 - Ireto avy ny antony mahatonga ny fahabangantoeran'ny Lehiben'ny mpanatanteraka :

- ny fahafatesana ;
- ny tsy fahatongavana sy ny fandozana toeram-piasana voamarina sy hita fototra ;
- ny fametram-pialana ;
- ny fionganana ;

Na koa ireo antony hafa rehetra mahatonga tsy fahafahana voamarina sy hita fototra.

And. 124 – Raisina ho toy ny fametraham-pialan'ny Lehiben'ny mpanatanteraka avy hatrany ny tsy maha eo amin'ny toeram-piasana azy tsy misy fiatoana mandritry ny enim-bolana, ary voamarin'ny Solotenam-panjakana mahefa.

And. 125 - Ny fametraham-pialan'ny Lehiben'ny mpanatanteraka dia alefa any amin'ny Solotenam-panjakana mahefa, ary andefasana dika mitovy ny Filankevitra sy ny fitsarana misahana ny ady amin'ny Fanjakana.

And. 126 - Ny anton-javatra mahatonga ny fiongan'ny Lehiben'ny mpanatanteraka dia voafaritry ny andininy faha-266 sy ny manaraka amin'ity lalàna ity.

And. 127 - Raha misy fahadisoana goavana eo amin'ny fitantanana, ny Lehiben'ny mpanatanteraka, aorian'ny fihainoana na fampiantsoana atao aminy, anaovany fanazavana antsoatra momba ny toe-draharaha nitranga iampangana azy, araka ny fanapahana noraisin'ny Filankevitra, dia aato amin'ny asany izy amin'ny alalan'ny didim-pitondrana raisin'ny Minisitry misahana ny Atitany, mandritra ny fotoana izay tsy mihoatra ny iray volana azon'ny Praiminisitry halavaina ho telo volana.

Na manao ahoana na manao ahoana, tsy afaka aongana izy afa tsy amin'ny alalan'ny didim-panjakana raisina eo ampivorian'ny Filankevitry ny Minisitra, aorian'ny fanamelohana navoakan'ny fitsarana mahefa.

Ny didi-pitondrana fampiatoana sy ny didim-panjakana fanonganana dia tsy maintsy arahan'antony mitobina. Ny fampakarana dia azon'izay voakasika atao eo anivon'ny Filankevi-panjakana folo andro aorian'ny fampahafantarana manokana natao taminy.

And. 128 – Na inona na inona antony nahatonga ny fahabangan-toerana, ny Solotenam-panjakana no mampakatra avy hatrany eo anivon'ny fitsarana mahefa misahana ny ady amin'ny Fanjakana, izy no miroso amin'ny fizahana fototra ny fahabangan-toerana.

Ampahafantarin'ny fitsarana ny Minisitra misahana ny Atitany sy ny Fitsinjaram-pahefana ny didy manamarina ny fahabangan-toerana.

And.129- Irosoana ny fanatanterahana fifidianana amin'ny ampahany ao anatin'ny roapolo amby zato andro (120) manomboka amin'ny vaninandro namoahana ny didi-pitsarana mifandraika amin'izany.

Tsy tanterahina intsony ny fifidianana amin'ny ampahany raha toa ka ao anatin'ny roa ambin'ny folo (12) volana mialoha ny fahataperan'ny fotoam-piasana no misy fahabangan-toerana.

And. 130 – Mandrampaha voafidy ny Lehiben'ny mpanatanterka vaovao, dia irosoana ny fametrahana ny delegasionina manokana.

Ny delegasionina manokana dia misahana ireo anjara andraikity ny rafitra mpanatanteraka ny Vondrombahoakam-paritra itsinjaram-pahefana.

Na manao ahoana na manao ahoana , ny delegasionina manokana dia tsy afaka misolo ny ny Filankevitry ny vondrombahoakam-paritra itsinjaram-pahefana izay manohy hatrany ny anjara asany .

Ny delegasionina manokana dia ahitana Filoha iray sy filoha lefitra roa izay tendrena amin'ny alalan'ny didim-pitondrana raisin'ny Minisitra misahana ny Atitany.

Na amin'ny fomba ahoana na amin'ny fomba ahoana , ireo mpikambana ao amin'ny delegasionina manokana dia tsy afaka mirotsaka ho fidina amin'ny fifidianana ho avy.

Didim-panjakana raisina eo ampivorian'ny Filankevitry ny Governemanta araka ny tolo-kevity ny Minisitra misahana ny Atitany no mamaritra ireo fombafomba fandaminana ny fiasan'ny delegasionina manokana.

LOHATENY IV
NY AMIN'NY ANDRAIKITRA CIVILIN'NY VONDROMBAHOAKAM-PARITRA

ITSINJARAM-PAHEFANA

And. 131 - Ny Fanjakana no tompon'andraikitra amin'ny fanonerana ny fahasimbana sy fahavoazana ateraky ny heloka bevava sy heloka tsotra natao tamin'ny fampiasan-kery ankarihary na tamin'ny alalan'ny herisetra, noho ny fivorivorianana an-dalambe na famoriam-bahoaka mitampiadiana na tsia, na mihatra amin'ny olona na amin'ny fananam-panjakana na an'olon-tsotra. Ny fitsarana misahana ny ady amin'ny Fanjakana no mahefa amin'izany.

And. 132 – Azon'ny Fanjakana atao ny mitory indray ny vondrombahoakam-paritra itsinjaram-pahefana voakasika mivantana raha toa ka marim-pototra ny maha tompon'andraikitra azy.

And. 133 - Afaka mitory ireo tompon'antoka sy ny mpiray tsikombakomba fototry ny fanakorontanana niseho ny Fanjakana sy ny Vondrombahoakam-paritra itsinjaram-pahefana nambara fa tompon'andraikitra tamin'izany.

Art. 134 – Ny Vondrombahoakam-paritra itsinjaram-pahefana no tompon'andraikitra amin'ny fahavoazana nianjady tamin'ireo mpikambana ao amin'ny Filankevitra rehefa misy voina mahazo azy ireo mandritra ny fatom-pivorian'ny Filankevitra, na emandritra ny fanatanterahana ny iraka manokana nampanaovin'ny Filankevitra.

And. 135 - Ny Vondrombahoakam-paritra itsinjaram-pahefana no tompon'andraikitra amin'ny fahavoazana nianjady tamin'ny Lehiben'ny mpanatanteraka na ny mpikambana ao aminy noho ny voina nahazo azy ireo teo am-panatontosana ny asany.

And. 136 – Rijan-tenin'ny didy amam-pitsipika no mamaritra ny fombafomba fampiharana ity lohateny ity, raha toa ka ilaina izany.

LOHATENY V
NY AMIN'NY TETIBOLA SY NY LOHARANOM-BOLAN'NY
VONDROMBAHOAKAM-PARITRA ITSINJARAM-PAHEFANA

And. 137 – Ity lohateny ity no mifehy ny teti-bola sy ny loharanom-bolan'ny Vondrombahoakam-paritra itsinjaram-pahefana.

TOKO VOALOHANY
NY AMIN'NY TETIBOLA

Sokajy voalohany
Fepetra ankapobeny

And. 138 – Ny tetibolan'ny Vondrombahoakam-paritra itsinjaram-pahefana dia sora-draharaha amaritana sy anomezan-dalana ny fampidiram-bola sy ny fandaniem-bola efain'ny vondrombahoaka isan-taona.

And. 139 – Rafetina amin'ny endrika tetibolam-pandaharan'asa ny tetibolan'ny Vondrombahoakam-paritra itsinjaram-pahefana.

Tsy maintsy atao mifandanja ny vola miditra sy ny fandania isaky ny sokajy mikasika ny fampandehanan-draharaha sy ny fampiasam-bola ao amin'ny tetibola.

Didy आम-pitsipika no mamaritra ireo fombafomba fampiharana ity andininy ity.

And. 140 – Ny tetibolan'ny Vondrombahoakam-paritra itsinjaram-pahefana tsirairay dia arafitra isan-taona, ho an'ny taom-pikatrohana iray, ary mirakitra ireo tombatombana amin'ny fidiram-bola sy ny fandania ataony.

Ny tombatombana izay voarakitra ao anaty tahirin-kevitra tokana, dia tsy maintsy atao amin'ny antsipiriany marina sy mifantoka amin'ny tena zava-misy.

And. 141 – Manomboka ny voalohan'ny volana janoary ary mifarana ny iraka amby telopolo desambra ny taom-pikatrohana ny tetibola.

And.142 – Ireo Lehiben'ny mpanatanteraky ny Vondrombahoakam-paritra itsinjaram-pahefana no mpanalalana voalohany ny tetibola eo anivon'ny vondrombahoakan'izy ireo tsirairay avy.

Azony atao, amin'ny alalan'ny didim-pitondrana raisin'ny Faritany, Faritra, Kaominina, ny mamindra ny fahefana amin'io lafiny io amin'ny lefiny iray na maromaro. Ireto farany koa dia afaka mamindra indray, amin'ny alalan'ny fanapahana, ny andraikitra maha mpanalalana azy ireo amin'ny mpiasa nosafidiny amin'ireo tompon'andraikity ny sampandraharaha mitoetra eo ambany fifehezany, izay mitondra ny anarana mpanalalana ambaratonga faharoa.

Ny mpanalalana ambaratonga faharoa dia tsy maintsy mpiasam-panjakana eny anivon'ny vondrombahoakam-paritra itsinjaram-pahefana, izay tsy misahana ny fitantanana ny bokim-bolam-panjakana ary manana ny fahaiza-manao takin'io asa io.

And. 143 – Ny fitantanam-bolan'ireo vondrombahoakam-paritra itsinjaram-pahefana dia manaraka ny sata mifehy ny fitanana ny kaontim-panjakana, sy ny lalana mifehy ny tsenam-panjakana ary ny didy aman-dalàna manan-kery amin'ny fitatanana ny entana.

Didim-pitondrana raisin'ny Minisitra misahana ny fitantanam-bola sy tetibola no mamaritra ny sata mifehy ny kaontim-bolan'ny Kaominina ambanivohitra.

And. 144 – Ny vola miditra sy ny fandaniao ao amin'ny tetibolan'ireo vondrombahoakam-paritra itsinjaram-pahefana dia tsy maintsy mifandanja eo am-pifidianana azy.

Na manao ahoana na manao ahoana, ny tetibolan'ny vondrombahoakam-paritra itsinjaram-pahefana dia tsy tokony haneho fatiantoka na amin'ny tahirim-bola na amin'ny fiandraiketana fandaniao.

And.145 – Didim-pitondrana raisin'ny Minisitra misahana ny Fitatanam-bola sy ny tetibola no mamaritra ny fomba fanehoana sy fizaran-dohatenin'ny tetibolan'ireo vondrombahoakam-paritra itsinjaram-pahefana.

And. 146 – Ny vondrombahoakam-paritra itsinjaram-pahefana dia tsy maintsy manana fandaharan'asa momba ny fampiasam-bolam-panjakana hamokarana maharitra ao anatin'ny telo taona izay ny Filankevitry'izy ireo no mandany azy, ary azo havaozina isan-taona mandritra ny fotoam-pivoriana voalohany.

Sokajy 2

Ny amin'ny fanomanana sy fandaniao ny tetibola

Art. 147 – Ny rafitra mpanatanteraka eny amin'ny Vondrombahoakam-paritra itsinjaram-pahefana no manomana ny tetibola ary manolotra izany eo anivon'ny Filankevitry tsirairay avy.

Ny fandaharana ny teti-bola dia tsy maintsy ampiarahina amin'ny fanadihadiana ireo lanjam-bidy izay maneho ny mahamari-pototra ny teti-bola sy ny mampitombina ny safidin'ny fandaharan'asa hampiharina. Misy fahana ahitana ny tena isan'ireo mpiasa isan-tsokajin'asa izay tsy maintsy atao tovana amin'ny tetibola.

And. 148 – Ny fampidirana mpiasa vaovao ataon'ny vondrombahoakam-paritra itsinjaram-pahefana dia tsy maintsy voasoratra mialoha ao anatin'ny teti-bola, ary manaja ny fombafomba arahina voafaritry ny didy aman-dalàna.

Tsy azo atao ny mamorona sampan-draharaha na asa vaovao raha tsy efa voatsinjo mialoha ao amin'ny teti-bola ny sora-bola mifanandrify amin'izany.

And. 149 – Ireo famindram-bola avy amin'ny fanolorana ataon'ny Fanjakana ho an'ny Vondrombahoakam-paritra itsinjaram-pahefana dia tsy maintsy ampidirin'ny rafitra mpanatanteraka ho isan'ny fandaniao mikasika ny fampandehanan-draharaha sy fampiasam-bola famokarana ao amin'ny tetibola fototra.

Ny famindram-bola avy amin'ny fanolorana ataon'ny antokon-draharaha iray ho an'ny Vondrombahoakam-paritra itsinjaram-pahefana dia mitazona ny fanokanana azy raha toa ka misy izany.

Na manao ahoana na manao ahoana, ny fanampiana ara-bola voatokana amin'ny sokajy fampiasam-bola famokarana dia tsy afaka afindra na oviana na oviana any amin'ny sokajy fampandehanan-draharaha.

Toy izany koa, ny ambim-bola tsy lany amin'ny sokajy fampiasam-bola tamin'ny tetibolan'ny taona teo aloha dia tsy azo afindra any amin'ny sokajy fampandehanan-draharaha amin'ny tetibolan'ny taona itsahana.

Ny vatsy fanomezana dia miankina amin'ny fisian'ny fandaharan'asa momba ny fampiasam-bolampanjakana mitombina mikendry ny tombontsoa eny ifotony. Izany dia tsy maintsy mihevitra ny fitsinjarama ara-drariny sy mifandanja ireo loharanom-bola.

And. 150 – Ny tetik'asa rehetra misoratra ao anatin'ny fanatanterahana ny fampiasam-bolampanjakana eny anivon'ireo vondrombahoakam-paritra itsinjaram-pahefana dia tsy maintsy ampafantarina mialoha ny Minisitry misahana ny Atitany sy ny Fitsinjaram-pahefana, ny Minisitry misahana Fitatanam-bola sy ny Tetibola ary ireo Minisitry misahana ny sehatra voakasika arakaraka ny fandaharan'asan'ny fampiasam-bolampanjakana.

Art. 151 – Ny Lehiben'ny mpanatanteraka no :

- manomana sy manolotra ny volavolan'ny teti-bola eo amin'ny Filankevitry ny vondrombahoaka ;
- manalalana ny fandaniana sy manome baiko ny fanatanterahana ireo fampidiram-bola ankoatra ireo fepetra manokana voalazan'ny Fehezan-dalàna ankapobeny momba ny hetra mikasika ny loharanom-bola avy amin'ny hetra.
- mitandro ny fanatanterahana ireo fandaharan'asa momba ny fampandrosoana izay vatsian'ny vondrombahoaka ara-bola na tanterahina miaraka amin'ny fandraisany anjara.
- manendry ny mpiasa mifanaraka amin'ny rafi-pandaminan'ny asa maharitra eny amin'ny Vondrombahoaka sy ny isa mifanaraka amin'ny tetibola.

Art. 152 - Ny Filankevitry ny vondrombahoakam-paritra itsinjaram-pahefana no mandray fanapahana mikasika ny teti-bola sy kaonti-pitantanana izay atolotry ny Lehiben'ny mpanatanteraka isan-taona.

Mihaino ny tatitra ataon'ny Lehiben'ny mpanatanteraka izy, ary mandinika ny kaontim-pitantanana.

Ny Filankevitry dia mandray fanapahana mikasika ny kaontim-pitantanana narafitry ny Lehiben'ny mpanatanteraka farafahatarany telo volana aorian'ny taona nampiasana ny tetibola.

And. 153 – Ny Filankevitry dia tsy afaka manova ireo tombatombana amin'ny loharanom-bola nataon'ny mpanalalana.

Ny tolo-kevitra rehetra sy fanitsiana naroson'ny mpanolotsaina dia tsy azo raisina raha toa ka mahatonga fihenana ny loharanom-bola na fitomboan'ny fandaniana, na famoronana fandaniana vaovao, raha tsy ampiarahina amina tolo-kevitra fampitomboana loharanom-bola na fitsitsiana mifanaraka aminy.

And. 154 – Raha toa ka amin'ny fiakaran'ny fotoam-pivoriana, tsy mbola nolanian'ny Filankevitry ny teti-bola na mbola tsy mifandanja araka ny tokony ho izy ny vola miditra sy fandaniana, dia ny Solontenam-panjakana no mandrafitra izany vonjimaika amin'ny alalan'ny fandraisana didi-

pitondrana, ka ny fototra iangany amin'izany dia ny volavolan'ny tetibola naroso teo amin'ny Filankevitra, rehefa nisy fanapahana nataon'ny fitsarana mahefa amin'ny fitantanam-bola.

Amin'izany, ny Solontenam-panjakana dia afaka manome alalana ny fampidiram-bola sy fandaniam-bola ho an'ny karama ao anatin'ny fetran'ny ampaha-roa ambiny folo amin'ny sora-bola voarakitra ao anatin'ny tetibolan'ny taona teo aloha, mandritra ny telo volana farafahabetsany, raha toa ka maharaka ny tahirim-bola.

Aorian'izany dia antsoina hivory tsy ara-potoana mandritra ny dimy andro ny Filankevitra. Raha tsy mandany ny tetibola amin'ny fiafaran'io fatom-pivoriana io izy dia ny mpanalalàna no mandrafitra tanteraka izany tetibola izany.

And. 155 – Mandritra ny taona diavina, azo atao ny manokatra sora-bola fanampiny ao amin'ny tetibola fa tsy tokony hihoatra ny tena fitomboan'ny vola niditra marina amin'izany taom-pitantanana izany.

And. 156 - Ny Lehiben'ny mpanatanteraka no manomana ireo volavolana fanapahan-kevitra mikasika ireo sora-bola fanampiny izay haroso ho tapahin'ny Filankevitra, ary ampiarahina amin'ny fafana izay ahitana :

1. ny vinavinan'ny vola miditra isan-tsokajy
2. ny zo hita fototra avy amin'ny sokajy tsirairay ;
3. Ny zava-misy mikasika ny tahirim-bola

And. 157 – Ny teti-bola voafidy sy ny kaontim-pitantanana nankatoavina dia tsy maintsy alefa any amin'ny Solontenam-panjakana hanaovana fanaraha-maso ny fanarahan-dalàna, aorinan'ny fakan-kevitra mialoha ny Fanaraha-maso ny fitatanam-bola ho an'ny Faritany, ny Faritra, ary ny kaominina ambonivohitra.

And.158 – Ny tetibola voafidy sy ireo fampiasana ny loharanom-bolan'ny vondrombahoakam-paritra itsinjaram-pahefana nandritra ny fotoana niasana dia tsy maintsy hampafantarina ny vahoaka amin'ny alalan'ny peta-drindrana na ny fomba hafa rehetra izay ataon'ny Lehiben'ny mpanatanteraka.

Art. 159 - Na eo aza ny mampanan-kery avy hatrany ny sora-draharahan'ny vondrombahoakam-paritra itsinjaram-pahefana, ny tetibolany sy ny sora-draharaha ary ny fanapahana izay manana fiatraikany ara-bola kosa dia tsy azo ampiharina raha tsy aorinan'ny nandefasana azy any amin'ny Solontenam-panjakana mahefa mba anaovana ny fanaraha-maso ny fanaran-dalàna, rehefa avy nakan-kevitra mialoha tamin'ny Fanaraha-maso ny fitatanam-bola ho an'ny Faritany, ny Faritra ary ny Kaominina ambonivohitra.

And. 160 – Ny olom-pirenena rehetra eo anivon'ny Vondrombahoakam-paritra itsinjaram-pahefana dia manan-jo hijery ny antspirian'ny tetibolan'ny vondrombahoaka voakasika.

Sokajy faha-3

Ny amin'ny fanatanterahana ny tetibola

And.161 – Ireo sora-bola fanampiny sy fanomezan-dalana amin'ny fidiram-bola mifandanja amin'izany dia tsy maintsy mifanaraka amin'ireo fepetra voalazan'ny andininy faha-155 sy faha-164 amin'ity lohateny ity.

And. 162 – Mandritra ny taona, ireo fanokafana sy fanovana ny fampiasam-bola dia tsy azo atao raha tsy misy ny sora-bola mifanaraka amin'izany ao anatin'ny tetibola.

Ny fanokafana sy fanovana fampiasam-bola dia tsy tokony hisy, eny na dia amin'ny fampidirana mpiasa, raha mety mahatonga fihoaran'ny sora-bola efa nosokafana.

And.163 – Amin'ny alalan'ny didim-pitondrana, aorian'ny fanapahana raisin'ny Filankevitra, ny Lehiben'ny mpanatanteraka dia afaka :

1. manaiky ireo vola fanampiana avy eto an-toerana na ivelan'ny Firenena sy manokatra ny sora-bola mifanaraka amin'izany ao amin'ny tetibola eo andalam-panatanterahana
2. miroso amin'ny famindrana ny sora-bola eo amin'ny samy fandaharan'asa ka izany dia tsy mihoatra ny ampahafolon'ny sora-bola voasoratra ao amin'ny tetibola ho an'ilay fandaharan'asa amindrana an'izany.
3. Miroso amin'ny famerenana ireo sora-bolam-panefana efa nosokafana ho amin'ny asa fampiasana ho zary renivolan'izany.

Ireo fomba fampiharana ity andininy ity dia ho faritana amin'ny alalan'ny didy امام-pitsipika.

And. 164 - Amin'ny alalan'ny didim-pitondrana atao aorian'ny fanapahana raisin'ny Filankevitra, ny Lehiben'ny mpanatanteraka , dia tsy maintsy :

1. mandamina ireo fanomezandalana ny fanadaharan'asa hotanterahina raha tahiny misy fandania mihotra ny sora-bola vokatry ny fanaovana ara-teknika na fampiharana ny lasitra fanao amin'ny fandinihana vaovao ny vidin-javatra
2. manova ao antin'ny faritry ny fanomezandalana ny fanadaharan'asa hotanterahina ny fitsinjara ny sora-bolam-panefana nosokafana momba ny lahasa enti-mamokatra
3. manafonana ireo sora-bola zary tsy misy zava-kendrena aminy.
4. manamarina ireo fandania momba ny karama, ny sora-bola mifandraika amin'ny vola nomena horaisin'ireo mpiasan'ireo vondrombahoakam-paritra itsinjaram-pahefana tsy ara-drarin'ny.

And.165 – Ny vola miditra dia raisina ho an'ny tetibola amin'ny taona izay nandritra izany no nampidiran'ny mpitana kaontim-panjakana azy.

Ny vola nivoaka dia raisina ho an'ny tetibola amin'ny taona izay nandritra izany no nanamarinan'ny mpintana kaonty mpanao sonia.

Art. 166 – Ireo fandanium-bola tsy maintsy atao dia tsy maintsy anokanana sora-bola ampy tsara mba ho enti-miatrika, na ny fampandehanana araka ny tokony ho izy ireo sampan-draharaha, na ny fanantotosana ireo adidy امام-bola izay ampiharana azy.

Araka ny fepetra voasoritra etsy ambony, dia fandanium-bola tsy maintsy atao ireto manaraka ireto :

1. Ireo trosa azo takiana sy ny fanentsenana ny fantiantoka teo aloha ;
2. Ny karaman'ny mpiasa ;

3. Ny fandraisana anjara amin'ireo vola mivoaka amin'ny kitapom-bola sy amin'ny sata mifehy ny fisotron-dronono ka amin'izany no iankinan'ny mpiasa mandray karama avy amin'ireo tetibolan'ireo vondrom-bahoaka ;
4. Ny fandania mikasika ny fampiasana rano sy jiro ary ny paositra sy fifandraisan-davitra ;
5. Ny latsakemboka sy ny fandraisana anjara ara-bola voadidin'ny lalàna hoefaina na ny fandraiketana fandania momba ny fifanekena natao, indrindra avy amin'ny fifanarahana mikasika ny fanampiana ara-teknika sy ara-pitondrana na ara-pitantanam-bola ;
6. Izay fandanium-bola rehetra voalaza mazava tsara araka ny fepetra voalazan'ny lalàna na ny fitsipika manankery ny maha tsy maintsy atao azy.

Ny fanatanterahana ireo fandania dia tsy maintsy manaraka ireo lalàna mikasika ny kaontim-bolam-panjakana.

And. 167 – Ny fisamboram-bola na ny vatsim-bola dia anaovan'ny filankevitra fanapahana araka izay fetra farany ambony mikasika ny sora-panekena momba ny fitantanam-bola izay hita ao amin'ireo vinavina tetibola ny taona itsahana sy ny kaonti-mpitantananan' ny taona teo aloha.

Aorinan'ny fanapahana noraisin'ny Filankevitra, ny fisamboram-bola dia tsy maintsy ampandalovina amin'ny Solontenam-panjakana izay mangataka mialoha ny hevitra ny Minisitra miandraikitra ny fitantanam-bola sy ny tetibola na ny solontenany. Io hevitra io dia tsy maintsy omena ao anatin'ny fe-potoana telopolo (30) andro aorinan'ny nandraisana ny antontan-taratasy feno. Ny Minisitra miandraikitra ny fitantanam-bola sy ny tetibola dia tsy maintsy manolotra ny antontan-taratasy amin'y Filankevitry ny Governemanta mba hodinihiny ho an'ny fisamboram-bola tsy voafehin'ny fankatoavana.

Ny fafana momba ny fanavotam-bidin'ny fisamboram-bola sy ny vatsim-bola natao dia atovana ireo volavola-na tetibola sy ny kaontim-pitantanana.

Ireo findramam-bola sy vatsim-bola izay nataon'ny vondrombahoakam-paritra itsinjaram-pahefana mbamin'ny fombafomba fanavotam-bidy sy fanonerana azy ireny dia anaovan'ny Filankevitra fanapahana araka izay tratra na fahazoana manefa ireo vola sisa avy amin'ny tetibolan'ny vondrombahoaka voakasik'izany.

Ireo vondrombahoakam-paritra itsinjaram-pahefana dia afaka mifampiraharaha amin'ireo tsenam-bola eto an-toerana sy any ivelany, amin'ny filàna famatsiam-bola amin'ny fanatanterahana ireo tetikasa fampiasambolam-pamokarana.

Ny fifanarahana rehetra amin'izany izay nataon'ny vondrombahoakam-paritra itsinjaram-pahefana dia tsy maintsy anaovan'ny Filankevitra fanapahana, ampandalovina amin'ny Solontenam-panjakana mahefa, aorian'ny fakan-kevitra mialoha tamin'ny mpanara-maso ny fitatanam-bola ary ankatoavina amin'ny alalan'ny didim-panjakana raisina eo ampivorian'ny Filankevitry ny Governemanta, avy amin'ny tatitra ataon'ny Minisitra misahana ny fitatanam-bola sy ny tetibola amin'ny mari-bola mihoatra ny zato tapitrisa Ariary.

And. 168 – Ireo findramam-bola sy vatsim-bola dia tsy azo ekena na amin'ny fomba ahoana na amin'ny fomba ahoana, raha tsy efa nosoratana eo amin'ny tetibola ireo sora-bola mifandraika amin'izany.

Ny fombafomba fanomezana sy fanonerana ireo fampindramam-bola sy ny vatsim-bola dia voafaritra anatin'ny fifanarahana izay nankatoavina amin'ny alalan'ny didim-pitondrana noraisin'ny Minisitra misahana ny fitantanam-bola sy tetibola aorinan'ny fanapahana nataon'ny Filankevitra, ampandalovina amin'ny Solontenam-panjakana mahefa, ary aorian'ny fakan-kevitra mialoha tamin'ny Fanaraha-maso ny fitantanam-bola.

And. 169 – Ny fisoloana vaika dia tsy azo ekena, na amin'ny fomba ahoana na amin'ny fomba ahoana, raha tsy efa voasoratra ao amin'ny tetibola ireo sora-bola mifandraika amin'ny fandetsena ireo fahavoazana mety hanjo.

Ny fombafomba fanomezana fisoloana vaika dia voafaritra amin'ny fifanarahana izay nankatoavina amin'ny alalan'ny didim-pitondrana noraisin'ny Minisitra misahana ny fitantanam-bola sy ny tetibola, aorian'ny fanapahana nataon'ny Filankevitra, ampandalovina amin'ny Solontenam-panjakana mahefa, aorinan'ny fakan-kevitra mialoha tamin'ny Fanaraha-maso ny fitantanam-bola.

And. 170 - Ny kaontim-pitantanana no izahana fototra ireo vokatra avy amin'ny fanatanterahana ny tetibola sy ny kaonty fitehirizam-bolan'ny Vondrombahoakam-paritra itsinjaram-pahefana ary ankatoavana ny elanelana eo amin'ny vola niditra sy nivoaka andaniny ary ny vinavina nasiampanitsiana amin'ny tetibola ampiasaina amin'ny taona ankilany.

Ny volavola-na kaontim-pitantanana dia atolotra hankatoavin'ny Filankevitra amin'ny fiandohan'ny fotoam-pivoriana voalohan'ny manaraka ny taona nanatanterahana ny tetibola.

Atao tovana amin'io volavola io :

1. ny fanambarana ankapobe mikasika ny fifanarahan'ireo kaontin'ny mpitantam-bola tsirairay sy ny fitanana kaontin'ny mpanalalana ;
2. ny kaontim-panana tamin'ny taona fitantanam-bola teo aloha.

And. 171 – Fanapahana ataon'ny Filankevitry ny vondrombahoakam-paritra itsinjaram-pahefana no ankatoavana ny kaontim-pitantanana farafahantarany ao anatin'ny telo volana voalohany ny taona manaraka.

And. 172 – Aorian'ny fanapahana, dia alefa any amin'ny solontenam-panjakana ny kaontim-pitantanana sy ny tetibola tsinjovina hanaovana fanaraha-maso ny fanarahan-dalàna.

Rehefa vita izany fombafomba izany, ny dika mitovy amin'ireo tahirin-kevitra dia tsy maintsy alefa isanisany amin'ny Minisitra misahana ny fitantanam-bola sy ny tetibola, sy ny Minisitra misahana ny Atitany sy ny fitsinjaram-pahefana ao anatin'ny fe-potoana telopolo (30) andro ho fampafantarana azy ireo.

And. 173 – Ny olom-pirenena rehetra ao amin'ny vondrombahoakam-paritra itsinjaram-pahefana dia manana zo hangataka ny fampahafantarana ny kaontim-pitantanana ny vondrombahoaka voakasika.

And. 174 – Ny fombafomba fanokafana sy fiasan'ireo « régies d'avances » sy « régies de recettes » eo anivon'ny vondrombahoakam-paritra itsinjaram-pahefana dia tsy maintsy manaraka ireo fepetra voalazan'ny lalàna manan-kery mikasika ny « régies d'avances » sy « régies de recettes » ny antokon-draharaham-panjakana.

Sokajy 4

Ny amin'ny fanaraha-maso

And. 175 – Ny Fisafoana ankapobeny ny raharaham-panjakana dia manana fahefana hanao fisafoana sy fanaraha-maso amin'ireo mpanalalana sy ireo mpitana bokim-bolam-panjakana eny anivon'ny vondrombahoakam-paritra itsinjaram-pahefana.

Ny fanatanterahana ireo fisafoana sy fanaraha-maso ireo dia tsy manakana ireo ataon'ny na amin'ny mpanalalana sy mpitana bokim-bolam-panjakana sy ireo vondrona hafa na antokon-draharaham-pisafoana.

And. 176 – Ny kaontin'ireo mpitana bokim-bolam-panjakana eny anivon'ny vondrombahoakam-paritra itsinjaram-pahefana dia tsaraina eny amin'ny Fitsarana momba ny fitantanam-bola.

And. 177 – Ireo fitsarana momba ny fitantanam-bola no manome ny mpitana ny kaontim-bolam-panjakana ny fahafahan'andraikitra madiodio amin'ny fitatanany.

And. 178 – Andraikitra ny rafitry ny Fanaraha-maso ny fitantanam-bola no manao fanamarinana sy fanaraha-maso, eny anivon'ny vondrombahoakam-paritra itsinjaram-pahefana, ny fizotry ny fanatanterahana sy ny fisiana marin'ny fandanina, ka ny fombafomba anaovana izany dia faritan'ny didy amam-pitsipika.

And. 179 – Andraikitra ny Manam-pahefana misahana ny fandrindrana ny tsenam-panjakana no manao fanaraha-maso mikasika ny fanekena tsenam-panjakana.

TOKO II

NY AMIN'NY LOHARANOM-BOLAN'IREO

VONDROMBAHOAKAM-PARITRA ITSINJARAM-PAHEFANA

Sokajy voalohany

Fepetra ankapobeny

And. 180 – Araka ny fepetra voalazan'ny andininy faha-147 amin'ny Lalàmpanorenana, ny loharanom-bolan'ny vondrombahoakam-paritra itsinjaram-pahefana dia ahitana :

1. ny vokatry ny hetra sy haba notapahin'ny Filankevitra sy raisina mivantana ho an'ny tetibolan'ny vondrombahoakam-paritra itsinjaram-pahefana ; ny lalàna no mamaritra ny karazany sy taha farany ambonin'ny hetra sy haba arakaraka ny vesatra zakain'ny Vondrombahoakam-paritra itsinjaram-pahefana sy vesatra faobe momba ny hetra izay ampiharina eo amin'ny Firenena.
2. ny anjara miverina any aminy avy hatrany amin'ireo vokatry ny hetra sy haba ho an'ny tetibolan-panjakana ; io anjara io izay alaina avy hatrany amin'ny fotoana handraisana ny hetra dia faritan'ny lalàna araka ny taha izay mihevitra ny vesatra zakain'ny vondrombahoakam-paritra itsinjaram-pahefana miaraka sy samirery, mba iantohana ny fampandrosoana ara-toekarena sy ara-tsosialy mifandanja eo amin'ny samy vondrombahoakam-paritra itsinjaram-pahefana eto amin'ny tanim-pirenena.

3. ny vokatry azo avy amin'ny fanampiana voatokana na tsia neken'ny tetibolam-panjakana ho an'ny vondrombahoakam-paritra itsinjaram-pahefana rehetra na tsirairay arakaraka ny zava-misy manokana, na ho fanonerana, ho an'ireo vondrombahoakam-paritra itsinjaram-pahefana, izay nisy vesatra vokatry ny fandaharan'asa na tetikasa notapahan'ny Fanjakana ary tanterahina eny anivon'ny vondrombahoakam-paritra itsinjaram-pahefana ;
4. ny vokatry ny fanampiana avy any ivelany izay tsy averina sy vokatry ny fanomezana ho an'ny vondrombahoakam-paritra itsinjaram-pahefana.
5. Ny vola azo avy amin'ny fananan'ny vondrombahoakam-paritra itsinjaram-pahefana ;
6. Ireo findramam-bola ka ny fepetra azahoana azy dia voafaritry ny lalàna.

And 181 - Ny loharanom-bola manokan'ny vondrombahoakam-paritra itsinjaram-pahefana dia :

1. ny loharanom-bola avy amin'ny hetra
2. ny loharanom-bola tsy avy amin'ny hetra
3. ny loharanom-bola avy amin'ireo tanim-panjakana tsy azo amidy na azo amidy.

And 182 - Ny loharanom-bola hafa ho an'ny vondrombahoakam-paritra itsinjaram-pahefana dia ahitana ny vola miditra ivelan'ny hetra ifotony, indrindra indrindra :

1. ny loharanom-bola avy amin'ny raharaha ara-toekarena sahaniny ;
2. ireo tolotra sy fanomezana ;
3. ireo findramam-bola ;
4. ny vola miditra avy amin'ny fananany ;
5. ny vola azo avy amin'ny fampiasana ireo sampandraharaha eo an-toerana.

Sokajy 2 **Ny amin'ny loharanom-bola avy amin'ny hetra**

Zana-tsokajy voalohany
Fepetra ankapobeny

And 183 - Ny loharanombolan'ny vondrombahoakam-paritra itsinjaram-pahefana azo avy amin'ny hetra ifotony dia ahitana ny hetra voarakitra anatin'ny Fehezan-dalàna ankapobeny mikasika ny hetra.

Heverina ho toy ny loharanom-bola avy amin'ny hetra, ary tsy azo foronina raha tsy amin'ny alalan'ny lalàna mifehy ny fitantanam-bolam-panjakana irery ihany, ireo fakam-bola tsy maintsy atao, ny sara sy haba izay tsy misy takalony mivatana amin'ny tsirairay.

Art. 184 – Ny vola miditra avy amin'ny hetra ho an'ireo vondrombahoakam-paritra itsinjaram-pahefana dia ahitana ny vokatry ny hetra mivantana, ny sara sy ny haba toy izao manaraka izao :

1. ny hetra momba ny fazahoan-dàlana hivarotra zava-pisotro mahamamo sy misy alikaola ;
2. ny hetra momba ny fahazoan-dalana hanao varo-mandeha zava-pisotro mahamamo sy misy alikaola ;

3. ny hetra momba ny fahazoan-dàlana mikasika ny fipetrahana tsy maharitra, araka ny tonontaona sy noho ny antony manokana ;
4. ny hetra momba ny fahazoan-dàlana momba ny asa tsy maharitra, araka ny tonontaona sy noho ny antony manokana ;
5. ny hetra alaina amin'ny toeram-pilanonana amin'ny alina ;
6. ny haba momba ny fahazoan-dàlana hikarakara tombola sy loteria ;
7. ny hetra momba ny fazahoan-dalana ny fampiasana « billards » sy mitovy aminy, ny fitaovana fandefasana horonan-tsary sy « baby-foot » itadiavam-bola ;
8. ny hetra tambatra ;
9. ny hetran-tany ;
10. ny hetran-trano ;
11. ny tamberim-bidy mikasika ny solika ;
12. ny sara amin'ny fitantanana ny harena an-kibon'ny tany ;
13. ny haba mikasika ny fiarovana ny olona ;
14. ny habam-ponenana ho an'ny fampandrosoana ;
15. ny haba momba fivahinianana ;
16. ny haba alaina amin'ny rano mineraly ;
17. ny haba alaina amin'ny fanaovana dokam-barotra ;
18. ny haba alaina amin'ny rano sy/na herinaratra ;
19. ny haba alaina amin'ny fety, lanonana ary fihetsiketsehana samihafa ;
20. ny haba momba ny fanangàna tsangam-by goavana, baka mpandray na mpandefa onjam-peo sy onjan-tsary, mpanelanelana fitaovam-pifandraisana na taho ;
21. ny haba mikasika ny lalao atao amin'ny haino aman-jery.

Art 185 – Ny lalàna mifehy ny fitantanam-bolam-panjakana, ampian'ireo didy aman-dalàna hafa raha misy, no mamaritra ny karazana, ny fombafomba fanaovana tomban-ketra sy ny fanangonana, ny taha ary ny fandaminana ny fitantanana ireo hetra sy ny haba ireo.

Zana-tsokajy 2 **Ny amin'ny hetra**

Fizarana voalohany
Ny hetra momba ny fazahoan-dalana

Zana-pizarana voalohany
Ny hetra momba ny fazahoan-dàlana hivarotra zava-pisotro
mahamamo sy misy alikaola

And.186 – Ny vokatra azo avy amin'ny hetra momba ny fahazoan-dàlana hivarotra sava-pisotro mahamamo sy misy alikola, hetra voafaritry ao amin'ny Fehezan-dalàna ankapobeny momba ny hetra, dia raisina ho an'ireo vondrombahoakam-paritra itsinjaram-pahefana.

Ny hetra momba ny fazahoan-dalana dia mitsinjara toy izao:

- 60% ho an'ny Kaominina ;
- 20% ho an'ny Faritra ;
- 20% ho an'ny Faritany.

And. 187 – Ny sora-bidy isan-taona amin'ny hetra momba ny fahazoan-dalana hivarotra zava-pisotro mahamamo sy misy alikaola dia voafaritry amin'ny fanapahan-kevitra ny Filankevitry

monisipaly na kaominaly, arakaraky ny sokaji-na fahazoan-dàlana, ao anatin'ny fetra voafaritr'ireo fepetra voalazan'ny lalàna mifehy ny fitantanam-bolam-panjakana.

Zana-pizarana faha-2

Ny hetra momba ny fahazoan-dalana hanao varo-mandeha zava-pisotro mahamamo sy misy alikaola

Art. 188 – Ny lalàna mifehy ny fitantanam-bolam-panjakana no mamaritra ny sora-bidin'ny hetra momba ny fahazoan-dàlana hanao varo-mandeha ny zava-pisotro mahamamo sy misy alikaola, ka ny vola azo dia alefa manontolo ho an'ny tetibolan'ny Kaominina misy ny toerana iasany.

Zana-pizarana faha-3

Ny fipetrahana tsy maharitra, araka ny tonontaona sy noho ny antony manokana

And. 189 – Ny mpandray anjara amin'ny tsenabe, fampirantiana, varoboba ankalamanjana sy ireo lanonana maro samihafa ara-barotra na itadiavam-bola dia iharan'ny hetra mikasika ny fipetrahana tsy maharitra, araka ny tonontaona sy noho ny antony manokana, ka ny vokatr'izany dia atokana manontolo ho an'ny Kaominina misy ny toerana iasany.

Ny Filankevitry ny Kaominina no mamaritra isan-taona ny sora-bidin'io hetra io amin'ny alalan'ny fanapahana, araka ny fepetra voalazan'ny lalàna mifehy ny fitantanam-bolam-panjakana.

Zana-pizarana faha-4

Ny fanaovana asa tsy maharitra, araka ny tonontaona sy noho ny antony manokana

And. 190 – Ireo olona ara-jo na olona tsotra manao asa fanangonam-bokatra na varo-mandeha mahazatra, vonjimaika, noho ny antony manokana na araka ny tonontaona dia iharan'ny hetra momba ny fahazoan-dalana hanao asa tsy maharitra, araka ny tonontaona sy noho ny antony manokana ary ny vola miditra amin'io hetra io dia alefa amanontolo any amin'ny Faritra anaovan'ny asany.

Ny sora-bidy amin'io hetra io dia ferana isan-taona amin'ny alalan'ny fanapahana ataon'ny Filankevitry ny Faritra araka ny fepetra volaza ao amin'ny lalàna mifehy ny fitantanam-bolam-panjakana.

Zana-pizarana 5

Ny toeram-pilanonana amin'ny alina

And. 191 – Ireo mpitrandraka tranon-danonana amin'ny alina, kabare, karaoke sy ireo asa hafa mitovy manana fahazoan-dàlana ara-dalàna dia mandoa hetra momba ny fahazoan-dalana mikasika ny trano filanonana amin'ny alina, ka ny vokatr'izany dia alefa ho an'ny vondrombahoakam-paritra itsinjaram-pahefana ary tsinjaraina toy izao :

- 50% ho an'ny Kaominina ;
- 30% ho an'ny Faritra ;
- 20% ho an'ny Faritany.

Ny sora-bidin'io hetra io dia ferana isan-taona amin'ny alalan'ny fanapahana ataon'ny Filankevi-paritany araka ny fepetra voalazan'ny lalàna mifehy ny fitantanambolam-bolam-panjakana.

Zana-pizarana faha-6
Ny fikarakarana tombola sy loteria

And. 192 – Ny asa omena ny vahoaka ka antenaina ahazoana tombon-tsoa ara-pitaovana na ara-bola amin'ny alalan'ny vintana dia iharan'ny hetra momba ny fahazoan-dàlana mikasika ny tombola sy loteria izay aloa ho an'ny vondrombahoakam-paritra itsinjaram-pahefana, ka ny sora-bidy sy fanokanna ny vokatr'izany dia miovaova araka ny halehibe sy ny faharetan'ny lalao.

Ny sora-bidin'io hetra io dia ferana isan-taona amin'ny alalan'ny fanapahana ataon'ny Filankevitry ny vondrombahoakam-paritra itsinjaram-pahefana mahazo tombon-tsoa, araka ny fepetra voalazan'ny lalàna mifehy ny fitantanambolam-bolam-panjakana.

Zana-pizarana faha-7
Ny fampiasana « billards » sy mitovy aminy,
ny fitaovana fandefasana horonan-tsary sy “baby-foot”

And. 193 – Ny olona ara-jo na olona tsotra rehetra mitrandraka « billards » sy izay mitovy aminy, ny fitaovana fandefasana horonan-tsary sy « baby-foot » amin'ny toerana misokatra ho an'ny daholobe, na dia kely velarana aza, natao itadiavam-bola dia mandoa hetra momba ny fahazoan-dalana mikasika ny « billards » sy izay mitovy aminy, ny fitaovana fandefasana horonan-tsary sy « baby-foot » izay alaina ho an'ny Kaominina misy ny fitaovana.

Ny sora-bidin'io hetra io dia ferana isan-taona amin'ny alalan'ny fanapahana ataon'ny Filankevitry ny Kaominina, araka ny fepetra voalazan'ny lalàna mifehy ny fitantanambolam-bolam-panjakana.

Fizarana faha-2
Ny amin'ny hetra tambatra

And. 194 – Toy izao ny fitsinjarana ireo vokatra azo avy aminy hetra tambatra izay voalazan'ny Fehezan-dalàna ankapobeny momba ny hetra voatokana ho an'ny vondrombahoakam-paritra itsinjaram-pahefana :

- 50% ho an'ny tetibolan'ny Kaominina ;
- 30% ho an'ny tetibolan'ny Faritra ;
- 10% ho an'ny tetibolan'ny Faritany ;
- 10% ho an'ny Tahirim-pirenena fifampitsimbinana.

Fizarana faha-3
Ny hetra tsinjaraina amin'ny Fanjakana foibe sy ny vondrombahoakam-paritra
itsinjaram-pahefana

Zana-pizarana voalohany
Ny amin'ny tamberim-bidy mikasika ny Solika

Art 195 – Toy izao ny fitsinjarana ny ampahan'ny tamberim-bidy alaina amin'ny solika natokana ho an'ny vondrombahoakam-paritra itsinjaram-pahefana araka ny voalazan'ny Fehezan-dalàna ankapobeny momba ny hetra ao amin'ny andininy 01.01.30 :

- 20% ho an'ny Tahirim-pirenena fifampitsimbinana ;
- 40% ho an'ny tetibolan'ny Kaominina ;
- 30% ho an'ny tetibolan'ny Faritra ;
- 10% ho an'ny tetibolan'ny Faritany.

Zana-pizarana faha-2

Ny sara amin'ny fitantanana ny harena an-kibon'ny tany

And. 196 – Toy izao no fitsinjarana ny ampahany amin'ny ny sara fitantanana ny harena an-kibon'ny tany izay voafaritry ny Fehezan-dalàna ankapobeny momba ny hetra ho an'ny vondrombahoakam-paritra itsinjaram-pahefana :

- 50% ho an'ny tetibolan'ny Kaominina ;
- 30% ho an'ny tetibolan'ny Faritra ;
- 20% ho an'ny tetibolan'ny Faritany.

Zana-pizarana faha-3

Ny haba halaina amin'ny harena an-kibon'ny tany sy ny tamberim-bidy

And. 197 – Toy izao no fitsinjarana ny vokatry ny tamberim-bidy amin'ny taha 1,4%, voalazan'ny Fehezan-dalàna momba ny harena an-kibon'ny tany :

- 10% ho an'ny Tahirim-pirenena fifampitsimbinana ;
- ny ambiny kosa ho an'ny vondrombahoakam-paritra itsinjaram-pahefana, ka :
 - 60% ho an'ny Kaominina
 - 30% ho an'ny Faritra
 - 10% ho an'ny Faritany

Fizarana faha-4

Haba halaina amin'ny fiarovana ny olona

Art 198 - Ny fananana alika na biby hafa azo ompiana mety hampidi-doza, ary koa ny fitazonana fitaovam-piadiana tsotra dia angalana haba momba ny fiarovana ny olona ho an'ny Kaominina.

Ny sora-bidin'io hetra io dia ferana isan-taona amin'ny alalan'ny fanapahana ataon'ny Filankevitry ny Kaominina, araka ny fepetra voalazan'ny lalàna mifehy ny fitantanambolam-bolam-panjakana.

Fizarana faha-5

Habam-ponenana ho an'ny fampandrosoana

And. 199 – Ny mponina rehetra eo amin'ny Kaominina dia mandoa habam-ponenana ho an'ny fampandrosoana izay atokana ho an'ny kaominina, mba hamatsiam-bola ny asa fampandrosoana eny anivon'ny Fokontany.

Ny sora-bidy dia miakina amin'ny taona, ny fahafaha-mandray anjara, ny toetoetra ara-pianakaviana ary ny toe-batana dia ferana isan-taona amin'ny alalan'ny fanapahana ataon'ny Filankevitry ny Kaominina, araka ny fepetra voalazan'ny lalàna mifehy ny fitantanambolam-bolam-panjakana.

Fizarana faha-6

Haba momba ny fivahinianana

And. 200 - Ireo rehetra mitrandraka trano fandraisam-bahiny, efi-trano ahofa ho an'ny vahiny, trano fivahinianam-pianakaviana na toerana fampiantranoana hafa, ka andoavam-bola isan-kalina,

dia mandoa haba momba ny fivahinianana ho an'ny Kaominina, ny Faritra ary Faritany arakaraka ny sokajin'ny trano toy izao manaraka izao :

Sokajin'ny trano fivahinianana	Fitsinjarana	Mpahazo tombontsoa
Trano fandraisam-bahiny kintana telo sy izay rehetra ambanin'izany	100%	Kaominina
Trano fandraisam-bahiny kintana efatra no mihoatra	50% avy ho an'ny Faritra sy ny Faritany	Faritany sy Faritra

Ny sora-bidin'io haba io dia ferana isan-taona amin'ny alalan'ny fanapahana ataon'ny Filankevitry ny vondrombahoakam-paritra itsinjaram-pahefana voakasika, araka ny fepetra voalazan'ny lalàna mifehy ny fitantanambolam-bolam-panjakana.

Fizarana faha-7

Haba alaina amin'ny rano mineraly

And. 201 – Ireo Kaominina ahitana loharano mineraly dia mahazo haba amin'ny rano mineraly na misy entona amboarina avy amin'ny fitrandrahana ireny loharano ireny.

Ny sora-bidin'io haba io dia ferana isan-taona amin'ny alalan'ny fanapahana ataon'ny Filankevitry ny Kaominina, araka ny fepetra voalazan'ny lalàna mifehy ny fitantanambolam-bolam-panjakana.

Fizarana 8

Haba alaina amin'ny dokam-barotra

Zana-pizarana voalohany

Dokam-barotra amin'ny alalan'ny peta-drindrina, takelaka asiana dokam-barotra, soratra sy marika misy hazavana na amin'ny tohana mandehadeha

And. 202 - Ny endrika dokam-barotra rehetra na amin'ny peta-drindrina, na takelaka asiana dokam-barotra, na soratra sy marika misy hazavana, mipetaka amin'ny tohana raikitra na eny amin'ny fiarakodia, soratra ambony lamba, faneva, balônina, sy tohana hafa tsy voalaza amin'ity zana-pizarana ity ao anatin'ny fetran'ny fari-piadian'ny Kaominina dia iharan'ny haba mikasika ny dokam-barotra ho an'ny tetibolan'ny Kaominina.

Ny sora-bidin'io haba io dia ferana isan-taona amin'ny alalan'ny fanapahana ataon'ny Filankevitry ny Kaominina, araka ny fepetra voalazan'ny lalàna mifehy ny fitantanambolam-bolam-panjakana.

Zana-pizarana faha-2

Dokam-barotra amin'ny haino aman-jery

And. 203 - Ny endrika dokam-barotra rehetra atao amin'ny alalan'ny haino aman-jery na gazety an-tsoratra mivoaka ao anatin'ny tanim-pirenena dia iharan'ny haba mikasika ny dokam-barotra ka ny

vokatr'izany dia hamatsiana ny Tahirim-pirenena fifampitsimbinana, ary tsinjaraia ara-drariny amin'ireo vondrombahoakam-paritra itsinjaram-pahefana.

Ny famaritana ny mason-tsivana fitsinjarana io tahirim-bola io amin' ireo vondrombahokam-paritra itsinjaram-pahefana dia ankinina amin'ny komity iraisan'ny Minisitery izay ahitana ny solontenan'ireo vondrombahokam-paritra itsinjaram-pahefana isan'ambaratongany, ny solontenan'ny Minisitery misahana ny fitantanam-bola sy ny tetibola ary ny solontenan'ny Minisitery misahana ny Atitany sy Fitsinjaram-pahefana.

Ny lalàna mifehy ny fitantanam-bolam-panjakana no mamaritra ny fombafomba fanaovana ny tomban-ketra, ny fanangonana ary ny famerana ny sora-bidin'io haba io.

Fizarana faha-9
Haba amin'ny rano sy/na herinaratra

And. 204 – Ny olona tsotra sy ny olona ara-jo rehetra, mpamandrika amin'ny orin'asa mpamatsy rano sy herinaratra eto amin'ny tanim-pirenena dia iharan'ny haba amin'ny rano sy/na herinaratra ho an'ny tetibolan'ny Kaominina.

Ny lalàna mifehy ny fitantanam-bolam-panjakana no mamaritra ny fombafomba fanaovana ny tomban-ketra, ny fanangonana ary ny famerana ny sora-bidin'io haba io.

Fizarana faha-10
Haba alaina amin'ny fety sy lanonana ary ny fihetsiketsehana samihafa

And. 205 - Ny fidirana andoavam-bola amin'ny fety, lanonana sy fihetsiketsehana samihafa ka mampiasa tapakila na karatra fidirana dia iharan'ny haba amin'ny fety sy lanonana ary fihetsiketsehana samihafa ho an'ny tetibolan'ny Kaominina.

Ny lalàna mifehy ny fitantanam-bolam-panjakana no mamaritra ny fombafomba fanaovana ny tomban-ketra, ny fanangonana ary ny famerana ny sora-bidin'io haba io.

Fizarana faha-11
Haba momba ny fanangàna tsangam-by goavana, baka mpandray na mpandefa onjam-peo sy onjan-tsary, mpanelanelana fitaovam-pifandraisana na taho

And. 206 - Ny tsangam-by goavana, baka mpandray na mpandefa onjam-peo sy onjan-tsary na taho napetraky ny orinasa fifandraisan-davitra, na dia amin'ny tany na tranon'olon-tsotra aza, natokana handraisana sy handefasana onjam-pifandraisana, ireo fanelanelanana fitaovam-pifandraisana an'ny hainoaman-jery, ny tsangam-by goavana mitondra taribin-kerinaratra dia iharan'ny haba isan-taona amin'ny tsangam tsangam-by goavana, baka mpandray na mpandefa onjam-peo sy onjan-tsary, mpanelanelana fitaovam-pifandraisana na taho izay mitsinjara toy izao :

- 50% ho an'ny Kaominina ;
- 30% ho an'ny Faritra ;
- 20% ho an'ny Faritany.

Ny lalàna mifehy ny fitantanam-bolam-panjakana no mamaritra ny fombafomba fanaovana ny tomban-ketra, ny fanangonana ary ny famerana ny sora-bidin'io haba io.

Fizarana faha-12

Haba mikasika ny lalao amin'ny haino aman-jery

Art. 207 – Ny antso an-tariby na hafatra alefa amin'ny alalan'ny finday mikasika ny fandraisana anjara amin'ny lalao amin'ny haino aman-jery, na fandaharan-dalao mivantana amin'ny fahitalavitra dia iharan'ny haba mikasika ny lalao amin'ny haino aman-jery, ka ny vokatr'izany dia amatsiana ny tahirim-pirenena fifampitsimbina, ho tsinjaraina ara-drariny amin'ireo vondrombahoakam-paritra itsinjaram-pahefana.

Ny lalàna mifehy ny fitantanam-bolam-panjakana no mamaritra ny fombafomba fanaovana ny tomban-ketra, ny fanangonana ary ny famerana ny sora-bidin'io haba io.

Paragraphe 13

Taxe sur la délivrance et le visa de cartes d'identité aux étrangers

Fizarana faha-13

Haba mikasika ny fanomezana sy fanaovana fitomboka sy sonia karapanomdron'ny vahiny

And. 208 - Ny fanomezana sy fanaovana fitomboka sy sonia ny karapandron'ny vahiny ahafahana mipetraka maharitra dia andoavana sara ho an'ny tetibolan'ny Faritra ka ny habetsahany dia feran'ny lalàna mifehy ny fitatanam-bolam-panjakana.

And. 209 – Azon'ny Filankevitra atao ny manome alalana tsy handoa manontolo na ampahany amin'izany sara voalaza etsy ambony izany ho an'ireo olona voamarina fa sahirana.

Sokajy 3

Ny loharanom-bola tsy avy amin'ny hetra

Zana-tsokajy voalohany
Fepetra ankapobeny

And. 210 – Ny loharanom-bolan'ny vondrombahoaka-paritra itsinjaram-pahefana tsy avy amin'ny hetra dia ahitana :

- ny vokatry ny fanampiana voatokana na tsia avy amin'ny tetibolan-panjakana ho an'ny vondrombahoakam-paritra itsinjaram-pahefana rehetra na tsirairay ;
- ny vokatry ny fanampiana avy any ivelany tsy averina sy ny vokatry ny fanomezana ho an'ny vondrombahoakam-paritra itsinjaram-pahefana ;
- ny vola miditra avy amin'ny fananany ;
- ireo findramam-bola ka ny lalàna no mamaritra ny fepetra ahafahana manao izany.

And. 211 – Ny famoronana io karazana loharanom-bola io dia tsy maintsy ahazoan-dalàna avy amin'ny lalàna mifehy ny fitantanam-bolam-panjakana, araka ny tolo-kevity ny Minisitry misahana ny Atitany sy ny Fitsinjaram-pahefana, fa ny Filankevitra eo anivon'ilay vondrombahoaka kosa no mahefa amin'ny famerana ny taha na ny sora-bidin'izany.

And. 212 – Anjara andraikity ny Filankevitry ny vondrombahoakam-paritra itsinjaram-pahefana :

1. ny famerana ny tahan'ny fakam-bola tsy avy amin'ny hetra toy ny fanomezan-dàlana sy fahazoan-dàlana ary sara isan-karazany izay eken'ny lalàna mifehy ny fitantanam-bolam-panjakana ;
2. ny famerana ny tahan'ny vokatra sy ny vola miditra amin'ny alalan'ny asa ara-toekarena sy ara-tsosialy, ny sara takiana noho ny tolotr'asa notanterahina, ny anjara tombom-barotra sy ny vola miditra avy amin'ny fananany.

And. 213 – Didim-panjakana raisina eo ampivorian'ny Filankevitry ny Governementa, araka ny tolo-kevitra iarahan'ny Minisitra misahana ny fitantanam-bola sy ny tetibola sy ny Ministra misahana ny Atitany sy ny Fitsinjaram-pahefana, no mametra ny fombafomba fanangonana ny loharanom-bola tsy avy amin'ny hetra, afa-tsy izay voalaza amin'ity sokajy ity.

Zana-tsokajy faha-2

Haba amin'ny lanonana nentim-paharazana nahazoan-dàlana

And. 214 – Ny lanonana nentim-paharazana indrindra indrindra ny lanonana, tsikafara, famadihana, fafikijana dia iharan'ny haba mikasika ny lanonana nentim-paharazana ho an'ny Kaominina.

Ny Ben'ny tanàna eny an-toerana anaovana ny lanonana no manome ny fahazoan-dalana momba ireny lanonana ireny.

Na manao ahoana na manao ahoana dia tsy azo akana izany haba izany ny fampakaram-bady, ny zaza teraka, ny batemy.

Masi-mandidy ny Filankevitra kaominaly na monisipaly amin'ny famerana ny sora-bidin'io haba io.

Amin'ny fotoana andraisana ny fahazoan-dàlana no andoavana ny haba, ary anomezana rosia misy sosony.

Sous-section 3

Taxe d'abattage

Zana-tsokajy faha-3

Haba alaina amin'ny famonoam-biby

And. 215 – Ny famonoam-biby natokana ho an'ny fivarotan-kena na anaovana angesongeson-kena hamidy na hohanina na ho an'ny fety isan-karazany dia andoavana haba mikasika ny famonoam-biby ho an'ny Kaominina.

Ferana toy izao ny taha farany ambony isaky ny biby :

Biby ho vonoina	Sora-bidy (ariary)
Soavaly	15.000
Omby	10.000
Kisoa	5.000
Ondry na osy	2.000

Ny haba alaina amin'ny biby novonoina eny amin'ny toerana famonoam-biby an'ny vondrombahoakam-paritra itsinjaram-pahefana dia raisin'ny vondrombahoaka tompon'ny famonoam-biby manontolo na aiza na aiza toerana voatondro andefasana azy.

Ny haba alaina amin'ny biby novonoina ivelan'ny toerana voatondro etsy ambony dia raisin'ny Kaominina.

And. 216 – Tsy andoavana haba mikasika ny famonoam-biby ny biby telo na latsak'izany vonoina amin'ny lanonana ara-pianakaviana, ara-panjakana na nentim-paharazana.

Ny famonoana biby mihoatra ny telo dia tsy maintsy ahazoana alalana any amin'ny Ben'ny tanànan'ny Kaominina tompon'ny toerana famonoam-biby mialoha ny fandoavana haba.

And. 217 – Aloa mialoha amin'ny mpiasan'ny vondrombahoaka voakasika ny haba ary anomezana rosia misy sosony izany.

Ny famonoam-biby rehetra tsy nandoavana haba mialoha ary koa ny fanafenana na fanambarana tsy marina dia maha-voasazy handoa lamandy avo dimy heny amin'ny haba tsy naloa, araka ny fepetra voalaza etsy aloha momba ny haba fototra.

And. 218 – Ny tompon'ny biby maty na tsy maintsy vonoina noho ny aretina na noho ny loza nahazo azy dia tsy mandoa haba, raha maneho fanamarinana avy amin'ny sampan-draharahan'ny fiompiana izay nizaha fototra izany, na avy amin'ny Ben'ny tanànan'ny kaominina voakasika raha toa ka tsy misy izany sampan-draharaha izany.

Zana-tsokajy faha-4

Haba mikasika ny fitsirihana sy fanaovana fitomboka ny hena

And. 219 – Ankoatra ny haba mikasika ny famonoam-biby voalaza amin'ny andininy faha-215 amin'ity lalàna ity, ny Kaominina ambonivohitra sy ambanivohitra izay manana toerana famonoam-biby na mitrandraka toerana famonoam-biby sy miandraikitra mivantana ny fanaraha-maso ara-pahasalamana ny hena ho an'ny fivarotan-kena sy ny angesongeso-kena ary ny hena ohanina eo an-toerana dia afaka mandray ny haba mikasika ny fitsirihana sy sy fanaovana fitomboka ny hena.

And. 220 – Azon'ny Kaominina atao ny mandrara ny famonoana biby ho an'ny fivarotan-kena ivelan'ireo toerana ireo, raha tsy hoe nahazo alalana manokana avy amin'ny Ben'ny tanàna raha tahiny ka nandoa mialoha ny haba mikasika ny famonoam-biby ny mpisitrika izany ary manaraka ny fepetra mikasika ny fitsirihana ara-pahasalamana ny biby sy hena amidy.

Azony atao ihany koa ny mandrara ny fidiran'ny hena « foraine » ao anatin'ny fari-piadidiany.

And 221 - Ferana toy izao ny taha farany ambony amin'ny haba mikasika ny fitsirihana sy fanaovana fitomboka ny hena isaky ny loham-biby :

Karazam-biby	Sora-bidy (Ariary)
Soavaly	5.000
Omby	5.000
Kisoa	5.000
Ondry na osy	5.000

And. 222 – Aloa mialoha ny famonoam-biby ny haba mikasika ny fitsirihana sy ny fanaovana fitomboka ny hena ary anomezana rosia misy sosony.

Ny tsy fandoavana ny haba dia maha voasazy handoa lamandy avo dimy heny amin'ny saran'ny haba tsy naloa, ankoatra ny fandoavana ny haba tokony naloa tamin'ilay vondrombahoaka, araka ny fepetra voalaza etsy aloha momba ny haba fototra.

And. 223 - Ny haba mikasika ny fitsirihana sy fanaovana fitomboka ny hena dia raisina ho an'ny Kaominina.

Zana-tsokajy faha-5

Sara mikasika ny fivezivezen'ny biby toy ny omby sy kisoa

And. 224 - Raisina ho an'ny Kaominina ao amin'ilay toerana niaigana ny saram-panomezana ireo singan-taratasy ilain'ny fitsipika manankery amin'ny fivezivezen'ny omby sy ny kisoa.

And. 225 - Ny sora-bidy ambony indrindra amin'ny sara fanomezana pasipaoro ho an'ny biby miala avy amin'ny kaominina iray makany amin'ny iray hafa dia ferana ho 10.000 Ariary isaky ny pasipaoro ary 1.000 Ariary isam-biby voasoratra ao amin'ny pasipaoro.

Tsy akàna sarany isam-biby ny pasipaoro omena ny tompon'ny omby miova kijàna.

And. 226 - Ferana ho 1.000 Ariary ny sara ambony indrindra anomezana taratasy fiovan-tompo na ny solony.

And. 227 – Aloa mialoha ny fanomezana ny antontan-taratasy ny haba ary anomezana rosia misy sosony.

Ny tsy fandoavana ny haba dia maha voasazy handoa lamandy avo dimy heny amin'ny saran'ny haba tsy naloa, ankoatra ny fandoavana ny haba tokony naloa, araka ny fepetra voalaza etsy aloha momba ny haba fototra.

Zana-tsokajy faha-6

Ny amin'ny tamberim-bidy azo avy amin'ny fitrandrahana ranon-tany, fasika ary vato

And. 228 – Ny fitrandrahana ranon-tany, fasika ary vato ao anaty farim-piadihana Kaominana iray dia andoavana tamberim-bidy ho an'ny Kaominina sy ny Faritra misy ny toeram-pitrandrahana.

Ferana toy izao ny taha farany ambony amin'ny tamberim-bidy azo avy amin'ny fitrandrahana ranon-tany, fasika ary vato :

Karazany	Sora-bidy
Tany	Ar 500/m ³
Fasika	Ar 2.000/m ³
Vato	Ar 3.000/m ³

Fanapahana raisin'ny Filankevim-paritra no mametra ny sora-bidin'ny tamberim-bidy alaina amin'ny fitrandrahana ranon-tany, fasika ary vato.

Tsinjaraina toy izao ny tamberim-bidy azo avy amin'ny fitrandrahana ranon-tany, fasika ary vato :

- 60% ho an'ny Kaominina ;
- 40% ho an'ny Faritra.

Zana-tsokajy faha-7

Ny amin'ireo tamberimbidy alaina eo amin'ny vokatry ny fambolena, ny ala, ny jono, ary ny fiompiana.

And. 299 - Ny vokatry ny fambolena, ny ala, ny jono, ary ny fiompiana natao haondrana dia iharan'ny tamberim-bidy ho an'ny Kaominina, ny Faritra ary ny Faritany.

Ny lalàna mifehy ny fitantanam-bolam-panjakana no mametra isan-taona ny sora-bidin'izany.

And. 230 - Ny vokatry ny fambolena, ny ala, ny jono, ary ny fiompiana natao hamidy eto amin'ny tsena anatin'ny dia iharan'ny tamberim-bidy ho an'ny Kaominina, ny Faritra ary ny Faritany.

Fanapahana raisin'ny Filankevim-paritany no mametra no mametra isan-taona ny sora-bidin'izany.

And.231 – Tsinjaraina toy izao ny tamberimbidy alaina amin'ny vokatry ny fambolena, ny ala, ny jono, ary ny fiompiana :

- 50% ho an'ny kaominina,
- 30% ho an'ny Faritra,
- 20% ho an'ny Faritany.

Zana-tsokajy faha-8

Ny amin'ny tamberim-bidy mikasika ny fanangonana sy ny fanodinana ireo fako avy any an-tokantrano ary ny fanariana rano maloto

And 232 - Ny fanangonana sy ny fanodinana ireo fako avy any an-tokantrano ary ny fanariana rano maloto dia iharan'ny tamberim-bidy.

Azon'ny Kaominina atao ny mandany isan-taona ny fampiharana ny tamberim-bidy mikasika ny fanangonana sy ny fanodinana ireo fako avy any an-tokantrano ary ny fanariana rano maloto ary kajiana miainga avy amin'ny fototra fandoavana ny hetran-trano.

And 233 – Tokony andoavana izany tamberim-bidy izany amin'ny anaran'ny tompon-trano na ny mpisitrika, ary raha tsy misy izany dia ny olona mampiasa ny trano :

- Ireo fanana-mifaka andoavana hetran-trano ;
- Ireo fanana-mifaka nahazoana alalana tsy andoavana hetran-trano maharitra na tsia ampiasaina ho trano fonenana.

And 234 – Fanapahana raisin'ny Filankevitry ny Kaominina no mametra ny sora-bidy isan-taona amin'izany tamberim-bidy izany, nefa tsy mahazo mihoatra ny 5%.

And 235 – Ampandoavina tataon-ketra dimampolo isan-jaton'ny fitambaram-bidin'ilay tamberim-bidy ireo mpampiasa ny tambazotra fanadiovana ka miteraka fandotoana manokana ny faika ariany, ankoatra ny sazy ampiharina noho ny tsy fanarahana ireo fepetra manan-kery mikasika ny fikarakarana mialoha ny faika mandoto.

Ampiharina ihany koa izany tataon-ketra dimampolo isan-jato izany amin'ireo indostria, orin'asa fanaovana asa tanana sy toeram-piasana izay mamoka rano avy nampiasaina misy vokatra mandoto na tsy mety levona toy ny solika sy ireo zavatra vita aminy, ireo loko sy akora simika hafa.

And. 236 - Ampiharina amin'ny tamberim-bidy mikasika ny fanangonana sy ny fanodinana ireo fako avy any an-tokantrano ary ny fanariana rano maloto ireo fepetra voalazan'ny lalàna mifehy ny fanaovana tomban-ketra sy fanagonana ny hetran-trano.

Sokajy 4 Fepetra samihafa

And. 237 – Ireo fepetra voalazan'ny didy aman-dalàna manan-kery ankehitriny mahakasika ny loharanom-bolan'ny vondrombahoakam-paritra itsinjaram-pahefana, ary koa ny toromarika izay mameno azy ireny dia mbola azo ampiharina mandrapamoahana hanan-kery ity lalàna ity.

And. 238 - Mandram-pametrahana ireo vondrombahoakam-paritra itsinjaram-pahefana izay voafaritry araka ity lalàna ity, ny loharanom-bola izay natokana ho an'ny vondrombahoakam-paritra itsinjaram-pahefana mbola tsy amperin'asa dia atolotra amin'ireo vondrombahoakam-paritra itsinjaram-pahefana mandrafitra azy ary efa tafapetraka sy miasa.

**LOHATENY VI
NY AMIN'NY FIFIDIANANA ISAM-PARITRA**

**TOKO VOALOHANY
FEPETRA ANKAPOBENY**

And. 239 – Ny fepetra voalaza amin'ity lohateny ity no mifehy ny fifidianana kaominaly, ny fifidianana eny anivon'ny Faritra sy ny Faritany.

And. 240 – Ny Lehiben'ny rafitra mpanatanteraka sy ny mpikambana ao amin'ny Filan-kevitra ny vondrombahoakam-paritra itsinjaram-pahefana dia fidiana amin'ny alalan'ny latsabato ataon'ny daholobe, ho an'ny fotoam-piasana efa-taona (04).

**Sokajy voalohany
Ny amin'ny lisi-pifidianana**

And. 241 – Araka ny fepetra voalazan'ny andinin'ny faha-34 andalana voalohany ao amin'ny lalàna fehizoro laharana faha 2012-005 tamin'ny 22 martsa 2012 mametraka ny fehezan-dalàna momba ny fifidianana, ny lisi-pifidianana vokatry ny fanavaozana isan-taona sy nofaranana tamin'ny 15 aprily no ampiasaina amin'ny fifidianana kaominaly.

And. 242 – Azon'ny Filohan'ny fitsarana ambaratonga voalohany atao ny manapaka hatramin'ny faha-dimy amby folo andro mialoha ny latsa-bato momba ny fitarainan'ireo olona milaza fa tsy voasoratra anaty lisi-pifidianana, rehefa misy mampakatra raharaha eo aminy araka ny fepetra voafaritry ny andininy faha-31 amin'io fehezan-dalàna io ihany.

**Sokajy faha 2
Ny amin'ny fanaikàna ny mpifidy**

And. 243 – Didim-panjakana raisina eo amin'ny Filan-kevitra ny Governemanta no anaikàna ny mpifidy handatsa-bato.

And. 244 – Izany didim-panjakana anaikàna ny mpifidy izany dia ampahafantarina ny daholobe amin'ny fomba rehetra, amin'ny alàlan'ny haino aman-jery, ankoatra ny famoahana azy amin'ny *Gazetim-panjakan'*ny Repoblika.

Tokony ho voafaritry anatin'izany ny anton'ny fiantsoana sy ny andro, ary ny ora fanombohana sy fiafaran'ny latsa-bato.

**Sokajy hafa 3
Ny amin'ny fepetra fetezana na tsy fetezan-ko fidina**

And. 245 – Ny olom-pirenena rehetra manana zo hifidy dia azo fidina ho mpikambana ao amin'ny Filan-kevitra na ho Lehiben'ny rafitra mpanatanteraka amin'ny vondrombahoakam-paritra itsinjaram-pahefana manaraka ny fepetra ireto fepetra manaraka ireto :

1. mizaka ny zom-pirenena malagasy ;
2. mizaka ny zo isam-batan'olona sy ny zo ara-politika ;

3. tsy mbola voasazin'ny fitsarana mihitsy noho ny heloka bevava na noho ny fahadisoana afatsy ny fandikan-dalàna voalaza ao amin'ny andininy faha 319 sy 320 ao amin'ny fehezan-dalana famaizana raha tsy hoe ireo fandikan-dalàna ireo dia mifampitohy na miara-miseho amin'ny fahadisoana natao teo am-pamiliana ao anatin'ny hamamoana na hadisoana miaro fandosirana ny mpitandro ny filaminana;
4. manaraka an-tsakany sy andavany ny didy aman-dalàna momba ny hetra ary nahaloha, indrindra ny hetra sy haba rehetra azo takiana isan-karazany nandritra ny telo taona mialoha.

And. 246 – Tsy azo fidina :

1. ireo olona asain'ny lalàna tantanan'ny hafa ;
2. ireo olona nodidian'ny fitsarana ho verezin-jo tsy azo fidina noho ny fampiharana ny lalàna manome fahefana hanaisotra izany zo izany ;
3. ireo olona voaheloky ny fitsarana raha toa ka ny fanamelohana dia misakana ny fanoratana azy amin'ny lisi-pifidianana amin'ny fomba maharitra.

And. 247 – Ireo olona izay nahazo fanasaziana mandrara azy anaty ny fotoana voafetra tsy hosoratana ao anatin'ny lisi-pifidianana dia tsy azo fidina mandritra ny fotoana avy roa hen'ny fe-potoana tsy ahafahany misoratra ao anaty lisi-pifidianana.

And. 248 – Tsy azo fidina mandritra ny dimy amby folo taona, manomboka ny vanin'andro namoahana ny didy fanamelohana raikitra sy azo tanterahina, ny olona voasazy noho ny heloka tsotra noho ny fandikana fehezan-dalàna iraisana na heloka bevava na noho ny hosoka momba ny fisoratana anarana ao amin'ny lisi-pifidianana sy amin'ny fampiasana ny zo handatsa-bato, na noho ny hosoka teo amin'ny fitsipika mifehy ny fampielezan-kevitra, na noho ny fisakatsakanana ny fahalalana sy ny fahamarinan'ny latsa-bato, na noho ny fanaovana tsolotra sy ny herisetra momba ny fifidianana.

Raha toa ka olom-boafidy tamin'ny fifidianam-panjakana nofoanana ilay voaheloka, ny fe-potoana dimy amby folo taona voalazan'ny andalàna etsy ambony dia manomboka ny vanin'andro'ny fanafoanana.

And. 249 – Ireo vahiny voaray ho olom-pirenena dia tsy azo fidina raha tsy aorian'ny fe-potoana 10 taona manomboka amin'ny vanin'andro'ny didim-panjakana nandray azy ho olom-pirenena.

Na dia izany aza, ireo fepetra ireo dia tsy ampiharina:

- amin'ny vahiny voaray ho olom-pirenena izay nahatontosa tanteraka tao amin'ny fanompoam-pirenena ny fotoanan'ny fanompoam-pirenena ambany faneva mifandray amin'ny sokajin-taonany;
- amin'ny vahiny voaray ho olom-pirenena izay nahatanteraka ireo fepetra voalazan'ny andininy faha 39 fehezan-dalàna momba ny zon'ny olom-mpirenena malagasy

And. 250 – Ireo vehivavy izay nahazo ny zon'ny olom-mpirenena Malagasy noho ny amin'ny fanambadiana dia tsy azo fidiana raha tsy aorian'ny fe-potoana 10 taona manomboka amin'ny vanin'andro izay nahazoany izany raha tsy azo anaovana fanoherana intsony izany.

And. 251 – Tsy azo fidiana ihany koa ireo mpiantoka na ireo mpandraharaha raha toa izy ireo ka voafatotra amin'ny alalan'ny fifanarahana izay mametraka azy ireo amin'ny fomba maharitra ao anatin'ny fiankinana na fifanoheran-tombontsoa amin'ny vondrombahoakam-paritra itsinjaram-pahefana.

Sokajy 4

Ny amin'ny tsy fahazoana mampirafy asa sy ny amin'ny fionganana

Fizarana voalohany

Ny amin'ny tsy fahazoana mampirafy asa

And. 252 – Ny asa maha-olom-boavifidy eny anivon'ny vondrombahoakam-paritra itsinjaram-pahefana dia tsy azo ampirafesina amin'ny fisahanana izay rehetra andraikitra hafa maha olom-boafidim-bahoaka.

Tsy azo atao ny mampivady ny andraikitra ny mpikambana amin'ny Filan-kevitra ny vondrombahoakam-paritra itsinjaram-pahefana iray amin'ny asan'ny Lehiben'ny rafitra mpanatanateraka.

Tsy misy na iza na iza afaka milatsaka ho fidina ho mpikambana amin'ny Filan-kevitra sady ho Lehiben'ny rafitra mpanatanateraka amin'ny vondrombahoakam-paritra itsinjaram-pahefana iray.

And. 253 – Ny asa maha Mpanolotsaina sy ny asan'ny Lehiben'ny rafitra mpanatanateraka amin'ny vondrombahoakam-paritra itsinjaram-pahefana dia tsy azo ampirafesina amin'ny fisahanana ireto andraikitra ireto:

- Mpikambana amin'ny Andrim-panjakan'ny Repoblika ;
- Mpikambana ao amin'ny Fitsarana avo momba ny Lalàmpanorenana ;
- Mpanelanelana eo anivon'ny Repoblika ;
- Mpitsara ao amin'ny Fitsarana sy ny Tribonaly;
- Mpikambana ao amin'ny rafitra nasionaly mahaleotena misahana ny fitantanana sy ny fikarakarana ny fifidianana na amin'ny rantsa-mangaikany;
- Mpikambana amin'ny andrim-panjakana hafa voafaritryny Lalàmpanorenana.

And. 254 – Afa-tsy ny asa aman-draharaha fampianarana, ny andraikitra maha Lehiben'ny rafitra mpanatanateraka amin'ny vondrombahoakam-paritra itsinjaram-pahefana dia tsy azo ampirafesina amin'ny asam-panjakana rehetra.

And. 255 – Ny Lehiben'ny rafitra mpanatanateraka voafidy ka voakasiky ny tsy fahazoana mampirafy asa voalaza amin'izao fizarana izao dia tokony hametra-pialana amin'ireo asa aman'andraikitra tsy azo ampirafesina amin'ny asa maha Lehiben'ny rafitra mpanatanateraka azy ao anatin'ny telopolo andro nandraisany ny asany, na raha misy fanoherana ny fifidianana dia ao anatin'ny telopolo andro aorian'ny fanapahan'ny fitsarana mahefa. Raha toa ka misahana asam-panjakana izy dia tokony hangataka hatao amin'ny toerana manokana voafaritry ny sata mifehy azy.

Raha tsy misy izany dia heverina ho toy ny nametra-pialana izy.

Ny Lehiben'ny rafitra mpanatanateraka nanaiky nandritra ny fe-potoana iasany hisahana asa tsy azo ampirafesina, na nandika ny fepetra voalazan'izao fizarana izao, dia ambara ho toy ny mametra-pialana avy hatrany, afa-tsy hoe nanao izany tamin'ny nahim-pony.

Izany anefa tsy miteraka ny tsy fahazoan'ilay voakasika milatsaka ho fidina.

And. 256 – Tsy azo atao ny mampirafy ny asa maha mpikambana amin'ny Filan-kevitra na maha Lehiben'ny rafitra mpanatanateraka amin'ny vondrombahoakam-paritra itsinjaram-pahefana amin'ny asa andraisan-karama avy amin'ny vondrombahoakam-paritra, afa-tsy ny hoe mpiasam-panjakana na mpiasa tsy miankina tsy mandray afa-tsy tambin-karama avy amin'ilay vondrombahoakam-paritra noho ny asa nataony teo ampanatanterahana ny andraikiny.

Fizarana 2 *Ny amin'ny fionganana*

And. 257 – Aongana avy hatrany tsy ho olom-boafidy eo amin'ny vondrombahoakam-paritra itsinjaram-pahefana izay hita fa marina ny tsy fahazoany milatsaka ho fidina taorian'ny fanambarana ny voka-pifidianana sy taorian'ny fahataperan'ny fe-potoana ahazoana mitsipaka ny fifidianana, na izay nahitana, nandritra ny fe-potoana niasany, ny iray amin'ireo trangan-javatra tsy ahazoana milatsaka ho fidina, na koa izay very ny iray amin'ireo fepetra ahazoana milatsaka ho fidina voalazan'izty fizarana ity.

And. 258 – Aongana amin'ny asany ihany koa ny olom-boafidy rehetra eo amin'ny vondrombahoakam-paritra itsinjaram-pahefana izay tsy manaraka ny fepetra voalazan'ny andininy faha 69 ery ambony na niharan'ny fanamelohana mirakitra, araka ny lalàna manan-kery, ny fanesorana ny zo ho fidina.

And. 259 – Na ahoana na ahoana, ny fanonganana dia ambaran'ny Fitsarana mahefa aorian'ny fangatahana ataon'ny Solontenam-panjakana mahefa any amin'ny lafitany, na izay mety mpifidy rehetra ao amin'ny vondrombahoakam-paritra itsinjaram-pahefana voakasik'izany, voasoratra amin'ny lisi-pifidianana ampiasaina amin'ny fifidianana isam-paritra sy nandray anjara feno tamin'ny latsa-bato.

And. 260 – Ny mpiasam-panjakana manam-pahefana, sivily na miaramila, maniry hilatsaka ho fidina, dia atsahatra amin'ny asany manomboka amin'ny vaninandro namoahana amin'ny fomba ofisialy ny lisitry ny mpilatsaka ho fidina. Raha toa ka voafidy izy, dia heverina ho toy ny nafindra hanao asa hafa, telopolo andro aorian'ny fanambarana amin'ny fomba ofisialy ny voka-pifidianana raikitra.

Raha toa ka tsy voafidy izy, na aorian'ny fahataperan'ny fe-potoana iasany, dia averina avy hatrany amin'ny asany ao amin'ny minisitery nisy azy teo aloha.

And. 261 – Ireo manam-pahefana ara-politika mpilatsaka ho fidina amin'ny fifidianana isam-paritra dia ambara ho mametra-pialàna avy hatrany amin'ny asany manomboka ny vaninandro namoahana ny lisitra ofisialin'ny mpilatsaka ho fidina, araka ny fepetra voalazan'ny Fehezandalàna mikasika ny fifidianana.

And. 262 – Didim-panjakana raisina eo ampivorian'ny Filankevitry ny Governemanta no mamaritra ny lisitr'ireo mpiasam-panjakana manam-pahefana sy manam-pahefana ara-politika voalazan'ny andininy faha-260 sy faha-261 etsy ambony.

Sokajy 5 **Ny amin'ny filatsahan-kofidina**

Fizarana voalohany Momba ny fanolorana ny filatsahan-kofidina

And. 263 – Azon'ny olom-pirenena rehetra mizaka ny zon'ny isambatan'olona sy politika atao ny milatsaka ho fidina ho mpikambana amin'ny Filan-kevitra na ho Lehiben'ny rafitra mpanatanteraka amin'ny vondrombahoakam-paritra itsinjaram-pahefana iray, manaraka ny fepetra voalazan'ity lalàna ity.

And. 264 – Ny antoko politika rehetra mitsangana ara-dalàna, ny vondron'antoko politika rehetra, ny vondron'olona mahaleo tena rehetra mitsangana ara-dalàna na tsia, mizaka ny zon'ny isambatan'olona sy politika, dia afaka manolotra filatsahan-kofidina ho mpikambana amin'ny Filan-kevitra na ho Lehiben'ny rafitra mpanatanteraka amin'ny vondrombahoakam-paritra itsinjaram-pahefana isaky ny fari-piadiam-pifidianana.

Tsy azo sintonina intsony ny antontan-taratasy filatsahan-kofidina raha vao voapetraka, ary tsy azo soloina afa-tsy hoe misy fanafoanana filatsahan-ko fidina na fahafatesan'ny mpilatsaa ho fidina araka ny voafaritry ny andininy faha-280 sy faha-281 amin'ity lalàna ity.

Tsy azon'izy ireo atao ny manolotra lisitra mpilatsaka ho fidina mihoatra ny iray ao anatin'ny fari-piadiam-pifidianana iray.

And. 265 – Tsy misy na iza na iza afaka milatsaka ho fidina amin'ny anaran'ny antoko politika na ny firaisan' antoko politika na vondron'olona mahaleo tena mihoatra ny iray.

Tsy misy na iza na iza afaka milatsaka ho fidina ao anatin'ny fari-pifidianana mihoatra ny iray.

Raha toa ka misy fametrahana lisitra mpilatsaka ho fidina maromaro dia izay napetraka voalohany ihany no manan-kery.

And. 266 – Tsy misy na iza na iza afaka misoratra ho mpilatsaka ho fidina na ho mpisolo toerana amin'ny fanambarana filatsahan-ko fidina maromaro.

And. 267 – Tsy azon'ny lisitra mpilatsaka ho fidina atao ny mampiasa ny anarana, na famantarana na ny lokon'ny antoko politika hafa na vondron'olona hafa.

And. 268 – Didim-panjakana raisina eo amin'ny Filan-kevitra ny Governemanta no mamaritra ny fe-potoana fametrahana ny antontan-taratasy filatsahan-kofidina eny amin'ny vaomieram-pifidianana eny anivon'ny Distrika sy ny modelin' ireo antontan-taratasy voalazan'ny andininy faha-36 amin'izao lalàna izao.

Fizarana 2 *Ny lisitry ny mpilatsaka ho fidina*

And. 269 – Tokony hisy mpilatsaka ho fidina mitovy isa amin'ny toerana hozaraina ampiana mpisolo toerana telo ny lisitra mpilatsaka ho fidina, raha tsy izany dia tsy azo raisina.

And. 270 – Ny lisitra misy ny sonia voamarina ara-dalàna an'ireo mpilatsaka ho fidina sy ny mpisolo toerana dia faranan'ny nomem-pahefana ao amin'ny lisitra. Ampiarahina amin'ny fanambarana itambaran'ireo mpilatsaka ho fidina, fanambarana mitokana ho filatsahan-ko fidina sy antontan-taratasy filatsahan-ko fidina izany.

Ny sonian'ny mpilatsaka ho fidina sy ny an'ireo mpisolo toerana dia tsy maintsy voamarina ara-dalàna na ataon'ny Lehiben'ny Distrika na ny Lefitry ny Lehiben'ny Distrika na tompon'andraikitra nomen'ny solontenam-panjakana fahefana, na ataon'ny Ben'ny Tanana na ny Lefitry ny Ben'ny Tanana.

Tsy andoavam-bola ny fanamarinan-tsonia ary manan-kery manerana ny tanin'ny Repoblika.

Fizarana 3

Ny amin'ny fanambarana sy ny antotan-taratasy momba ny filatsahan-ko fidina

And. 271 – Tokony hisy solontena nomem-pahefana ny lisitry ny mpilatsaka ho fidina hanatanteraka ny taratasy mifandraika amin'ny fifidianana raha tsy izany dia tsy azo raisina.

And. 272 – Atao misy sosony efatra ny antontan-taratasy momba ny filatsahan-ko fidina raha tsy izany dia tsy azo raisina, ary misy :

- Ho an'ny lisitry ny mpilatsaka ho fidina :
 - fanambarana itambaran'ireo mpilatsaka ho fidina ;
 - lasitra ao anaty tohana elektronika misy ny endrika famantarana mampiavaka izay apetaka eo amin'ny taratasin-datsabato tokana;
 - fanafahan-trosa manamarina ny fandoavana ny fandraisana anjara amin'ny fanontana ny taratasin-datsabato teny amin'ny fitahirizam-bolam-panjakana na teny amin'ny toerana fandraisan-ketram-panjakana;
- Ho an'ny mpilatsaka ho fidina tsirairay misoratra ao amin'ny lisitra:
 - fanambarana mitokana ny filatsahan-ko fidina;
 - taratasy fanamarinam-pahaterahana, na takelaka manambara ny fiankohonan'ny isambatan'olona, na tahadikana-tsary ny kara-panondro vita fanamarinana ara-dalàna
 - taratasy fanamarinana nomen'ny sampan-draharaham-panjakana misahana ny hetra manamarina fa ilay olona voakasik'izany dia ara-dalàna eo anatrehan'ny didy aman-dalàna mikasika ny hetra ;
 - fanambarana tsy misy fitaka ataon'ny mpilatsaka hofidina fa efa voaloany avokoa ireo hetra sy haba rehetra notakiana taminy nandritra ny telo taona farany;
 - fanambarana tsy misy fitaka manome momba ireo fananana rehetra tsy mety afindra toerana sy ny taratasim-bola azo amidy an'ny mpilatsa-kofidiana ary koa ny karazan'ny vola miditra aminy ;
 - taratasy fanamarinana ny maha-mpifidy ilay mpilatsaka ho fidina, omen'ny rantsa-mangaikan'ny rafitra nasionaly mahaleotena misahana ny fitantanana sy ny fikarakarana ny fifidianana eny amin'ny fari-piadidiam-pifidianana voakasika, ary misy ny laharana sy ny datin'ny kara-pifidianany, ary ny toerana sy ny laharan'ny birao fandatsaham-batony;
 - dika mitovin'ny taratasy fitanisan-tsazy laharana faha 3.

And. 273 – Ny mpilatsaka ho fidina na ny solontena nomem-pahefana tsy monina ao amin'ny renivohitry ny fari-piadidiam-pifidianana misy ny rantsa-mangaikan'ny rafitra nasionaly mahaleotena misahana ny fitantanana sy ny fikarakarana ny fifidianana dia tsy maintsy miorim-

ponenana ao amin'io faritra farany io mba ahafahana mampahafantatra azy ireo taratasy samihafa mikasika ny raharaham-pifidianana.

And. 274 – Ny antotan-taratasy filatsahan-ko fidina dia apetraky ny mpilatsaka ho fidina na ny solontena nomem-pahefana eny amin'ny rantsa-mangaikan'ny rafitra nasionaly mahaleotena misahana ny fitantanana sy ny fikarakarana ny fifidianana.

Tsy maintsy hanomezana taratasy fanamarinana ny fametrahana izany.

Tsy azo atao ny fisintonana ny filatsahan-kofidiana aorian'ny vanin'andro farany fametrahana ireo taratasy filatsahan-ko fidiana, ary tsy azo asiam-panovana intsony ny lisitra.

Manomboka amin'ny andro namoahana amin'ny fomba ofisialy ny lisitry ny mpilatsaka ho fidina voalazan'ny andininy faha-278 etsy ambany :

- dia ambara fa nametra-pialana avy hatrany ny Lehiben'ny rafitra mpanatanteraka am-perinasa ;
- ary tsy afaka manao fotoam-pivoriana ny mpikambana amin'ny Filan-kevitra am-perinasa.

Fizarana 4

Ny amin'ny firaketana an-tsoratra ny filatsahan-ko fidina

And. 275 – Ny taratasy filatsahan-ko fidina dia tsy maintsy amarinin'ny rantsana miandraikitra ny fanamarinana sy firaketana an-tsoratra ho amin'ny filatsahan-ko fidina isaky ny fari-piadidiam-pifidianana.

Amin'izany, ny rafitra nasionaly mahaleotena misahana ny fitantanana sy ny fikarakarana ny fifidianana dia afaka mangataka ny traikefa sy fahaiza-manaon' ireo olona manana fahalalana manokana mifanandrify amin'izany ao anatin'ny fari-piadidiana na ny fitsarana voakasika.

And. 276 – Ny firafitry ny rantsana miandraikitra ny fanamarinana sy firaketana an-tsoratra ny filatsahan-ko fidina dia faritan'ny fanapahana raisin'ny Filohan'ny rafitra nasionaly mahaleotena misahana ny fitantanana sy ny fikarakarana ny fifidianana.

Ny rantsana miandraikitra ny fanamarinana sy firaketana an-tsoratra ny filatsahan-ko fidina dia mipetraka ao amin'ny biraon'ny rafitra nasionaly mahaleotena misahana ny fitantanana sy ny fikarakarana ny fifidianana na amin'ny trano hafa miorina eo amin'ny renivohitry ny fari-piadidiam-panjakana ka ny lisitra dia faritana amin'ny alalan'ny fanapahana raisin'ny Filohan'ny rafitra nasionaly mahaleotena misahana ny fitantanana sy ny fikarakarana ny fifidianana.

Ny sora-bola ilaina ho fampandehanan-draharahan'io rantsana io dia alaina ao amin'ny teti-bolan'ny rafitra nasionaly mahaleotena misahana ny fitantanana sy ny fikarakarana ny fifidianana.

And. 277 – Amin'ny alalan'ny fangatahan'ny rantsana miandraikitra ny fanamarinana sy firaketana an-tsoratra ho amin'ny filatsahan-ko fidina, ny fampanoavana eo anivon'ny Fitsarana manerana ny tanim-pirenena dia tsy maintsy manome ao anatin'ny valo amby efapolo ora ny taratasy fitanisan-tsazy laharana faha-2 an'ireo mpilatsaka ho fidina.

And. 278 – Ny rantsana miandraikitra ny fanamarinana sy firaketana an-tsoratra ny filatsahan-ko fidina dia tsy maintsy mamoka didy momba ireo filatsahan-ko fidina nentina teo anatrehany, ao anatin'ny roa amby fitopolo ora manomboka ny vaninandro nandraisana ny antontan-taratasy tsirairay.

Raha ekeny ny filatsahan-ko fidina, dia mamoka fanamarinana firaketana an-tsoratra ny filatsahan-ko fidina izy izay midika ho fanomezan-dalana hanao fampielezan-kevitra nefa tsy mandika ny fepetra mikasika ny vanim-potoana fanaovana fampielezan-kevitra sy ny fepetra voalazan'ny lalàna manan-kery.

Raha toa ka voamariny fa ny antontan-taratasy iray dia tsy mahafeno ny fepetra fahazoa-mandray didian'ny lalàna sy ny fitsipika manan-kery, dia laviny amin'ny alalan'ny fanapahana arahin'antonantony mazava izay ampahafantariny tsy misy hatak'andro any amin'ny trano onenana eo anatrehan'ny lalàna noferan'ny mpilatsaka ho fidina na ny olona nomem-pahefana izany.

Ny lisitr'ireo mpilatsaka ho fidina voarakitra an-tsoratra dia tsy maintsy ampahafantarina ny besinimaro amin'ny alalan'ny peta-drindrina eo ivelan'ny toeran'ny rantsana miandraikitra ny fanamarinana sy firaketana an-tsoratra ny filatsahan-ko fidina, ary tsy maintsy avoaka avy hatrany. Ny dika mitovin'io lisitra io dia tsy maintsy ampitaina any amin'ny rafitra nasionaly mahaleotena misahana ny fitantanana sy ny fikarakarana ny fifidianana amin'ny fomba haingana indrindra.

Ny rafitra nasionaly mahaleotena misahana ny fitantanana sy ny fikarakarana ny fifidianana dia voasolo tena amin'ny fotoanan'ny fikirakirana ny antontan-taratasy sy ny famoahana ny voka-pifidianana.

And. 279 – Ao anatin'ny fe-potoana valo amby efapolo ora manomboka ny nampahafantarana azy ny fanapahana rantsana miandraikitra ny fanamarinana sy firaketana an-tsoratra ny filatsahan-ko fidina, ny nomen'ny mpilatsaka ho fidina na lisitry ny mpilatsaka ho fidina fahefana, ka nolavina ny filatsahan-ko fidina, dia afaka mitaraina any amin'ny rafitra nasionaly mahaleotena misahana ny fitantanana sy ny fikarakarana ny fifidianana amin'ny alalan'ny fanambarana tsotra an-tsoratra.

Ao anatin'ny fe-potoana valo amby efapolo ora manomboka ny vaninandro naharaisana ny fanambarana no amaliany izany.

Ny fanapahana noraisin'ny rafitra nasionaly mahaleotena misahana ny fitantanana sy ny fikarakarana ny fifidianana dia azo anaovana fitarainana eo anivon'ny Fitsarana misahana ny ady amin'ny Fanjakana ao anatin'ny fe-potoana valo amby efapolo ora manomboka ny vaninandro nampahafantarana ny fanapahana tamin'ny mpanao fitarainana.

Ny Fitsarana misahana ny ady amin'ny Fanjakana dia tsy maintsy mamoka didy ao anatin'ny valo amby efapolo ora manaraka ny naharaisana ny an-tontan-taratasy.

Raha toa ny fanapahana noraisin'ny rafitra nasionaly mahaleotena misahana ny fitantanana sy ny fikarakarana ny fifidianana na ny didim-pitsarana navoakan'ny Fitsarana misahana ny ady amin'ny Fanjakana ka manaiky ny firaketana an-tsoratra ny filatsahan-kofidina iray, dia ampahafantarina ny Filohan'ny rafitra nasionaly mahaleotena misahana ny fitantanana sy ny fikarakarana ny fifidianana izany izay mampahalala avy hatrany ny nomem-pahefana ao amin'ny trano noferana onenana eo anatrehan'ny lalàna sy, raha toa ka misy, any amin'ny antoko politika na vondrona politika na firaisana antoko politika voakasik'izany.

And. 280 – Raha misy fanafoanana filatsahan-ko fidina, ny antoko politika, ny vondron'antoko politika na ny vondron'olona mahaleo tena nanolotra izany dia manana fe-potoana valo amby efapolo ora manomboka amin'ny fampahafantarana amin'ny fomba haingana indrindra ny fanapahana, mba hanolorany filatsahan-ko fidina vaovao ary farany hasolo ny teo aloha, araka ny

fepetra voalazan'ny andininy faha-272 sy manaraka etsy ambony.

Raha toa ka misy izany dia omena fe-potoana fanampiny telo andro ny rantsana miandraikitra ny fanamarinana sy firaketana an-tsoratra ny filatsahan-ko fidina.

And. 281 – Raha misy fahafatesan'ny mpilatsaka ho fidina iray ao amin'ny lisitry ny mpilatsaka ho fidina, mialohan'ny fahataperan'ny fe-potoana voatondron'ny lalàna ametrahana ny antontan-taratasy filatsahan-ko fidina, io lisitra io dia afaka manendry sy manolotra mpilatsaka ho fidina vaovao hisolo ny mpilatsaka ho fidina maty ao anatin'ny valo amby efapolo ora manomboka amin'ny andro nahafatesany.

Raha toa ka misy izany dia manana fe-potoana fanampiny ny rantsana miandraikitra ny fanamarinana sy firaketana an-tsoratra ny filatsahan-ko fidina, araka ny voalazan'ny andininy faha-280 etsy ambony.

Raha toa ka miseho ny fahafatesana ankoatra ny fe-potoana ara-dalàna fametrahana ny antontan-taratasy filatsahan-ko fidina, dia mijanona ho manankery foana ny lisitra, ka ny mpilatsaka ho fidina maty dia soloin'izay manaraka ao amin'ny lisitra.

And. 282 – Raha vao tapitra ny raharahany dia ampitain'ny rantsana miandraikitra ny fanamarinana sy firaketana an-tsoratra ny filatsahan-ko fidina any amin'ny rafitra nasionaly mahaleotena misahana ny fitantanana sy ny fikarakarana ny fifidianana ny dika iray amin'ny antotan-taratasy filatsahan-ko fidina tsirairay, ka ny rafitra nasionaly mahaleotena misahana ny fitantanana sy ny fikarakarana ny fifidianana no mamaritra isaky ny fizaram-pari-pifidianana ny lisitra raikit'ireo mpilatsaka ho fidina miaraka amin'ny fanondrona ny toetra mampiavaka azy ireo avy.

Ireo lisitra ireo dia ampahafantarina ny mpifidy amin'ny alalan'ny fampielezam-peo sy fahitalavitra, ary havoaka amin'ny *Gazetim-panjakan*'ny Repoblika.

Ny dika mitovin'io lisitra raikiry ny mpilatsaka ho fidina io dia alefa any amin'ny Fitsarana misahana ny ady amin'ny Fanjakana.

Sokajy 6

Ny amin'ny taratasin-datsabato tokana sy ny birao fandatsaham-bato

Fizarana voalohany

Ny amin'ny taratasin-datsabato tokana

And. 283 – Ny fepetra fanontana ny taratasin-datsabato dia ireo izay voafaritry ny Fehezan-dalàna momba ny fifidianana ao amin'ny andininy faha 54 ka hatramin'ny faha-56.

And. 284 – Araka ny fepetra voalazan'ny andininy faha-55 amin'ny Fehezan-dalàna momba ny fifidianana, ny Fanjakana no manonitra ny fandraisana anjara tamin'ny fanontana ny taratasin-datsabato tokana amin' ireo antoko politika, vondrona politika na firaisan' antoko politika, ireo fikambanana miorina ara-dalàna, ireo vondron'olona tsy miankina mizaka ny zo isam-batan'olona sy ara- politika, nahazo 10% farafahakeliny ny vato manan-kery, araka ny fombafomba voafaritry ny didim-panjakana noraisina teo amin' ny Filan-kevitra ny Governementa.

Fizarana 2
Ny amin'ny birao fandatsaham-bato

And. 285 – Ny lisitra sy ny fametrahana ny birao fandatsaham-bato dia tsy maintsy faritana amin'ny alalan'ny fanapahan-kevitra ny rafitra nasionaly mahaleotena misahana ny fitantanana sy ny fikarakarana ny fifidianana ka heverina ho isan-javatra amin'izany ny akitroky ny mpifidy sy ny toeram-ponenany, enimpolo andro farafahakeliny mialohan'ny vanim-potoam-pifidianana, ary ampahafantarina ny besinimaro amin'ny fomba rehetra.

Izay fanovana rehetra atao amin'io lisitra io, noho ny antony tsy azo anoharana, dia tsy maintsy andraisana fanapahana fanitsiana izay tsy maintsy raisina valo amby efapolo ora farafahakeliny mialohan'ny androm-pifidianana ary ampahafantarina ny besinimaro amin'ny fomba rehetra.

Sokajy 7
Ny amin'ny raharaham-pifidianana

Fizarana voalohany
Ny amin'ny fampielezan-kevitra

And. 286 – Ny faharetan'ny fampielezan-kevitra dia :

- dimy amby-folo andro ny any fifidianana kaominaly ;
- iraika amby roapolo andro kosa ny an'ny fifidianana eny amin'ny Faritra sy ny Faritany.

Ny fampielezan-kevitra dia mifarana efatra ambi-roapolo ora mialohan'ny andron'ny fifidianana.

And. 287 – Ny fepetra ankapoben'ny fampielezan-kevitra, ny peta-drindrana sy ny fanaovana fivoriana mikasika ny fifidianana dia faritan'ny Fehezan-dalàna momba ny fifidianana sy ireo rijantenany noraisina ho fampiharana an'izany.

And.288 – Ny rafitra nasionaly mahaleotena misahana ny fitantanana sy ny fikarakarana ny fifidianana no miantoka ny fitsinjarana ara-drariny ny fotoana itenenana tsy misy sarany na andovam-bola sy ny fandaminam-pandaharana ny fanaparitahana ao amin'ny fampielezam-peom-pirenena sy ny fahitalavi-pirenena na any amin' ireo maso ivohony isam-paritra, araka ny voalazan'ny Fehezan-dalàna momba ny fifidianana, mba ahafahan'ny mpilatsaka ho fidina tsirairay manazava ny fandaharan'asany amin'ny mpifidy. Toy izany koa ny fampiasana ireo toerana sy tranom-panjakana nazahoan-dàlana.

Ny fitsinjarana sy ny fandaminam-pandaharana voalazan'ny andalana etsy aloha, eo ampiandohan'ny fampielezan-kevitra ary an-tsapaka, dia ataon'ny rantsa-mangaikan'ny rafitra nasionaly mahaleotena misahana ny fitantanana sy ny fikarakarana ny fifidianana eo anatrehan'ny mpilatsaka ho fidina na ny solontenany.

Na toy inona na toy inona, tsy mahasakana ny fanatanterahana ny an-tsapaka mihitsy ny tsy fanatrehan'ny mpilatsaka ho fidina na ny solontenany.

Ankoatra ny fotoam-pandaharana maimaimpoana na andoavam-bola ao amin'ny fampielezam-peom-pirenena sy ny fahitalavi-pirenena na ireo maso ivohony isam-paritra voalaza amin'ny andalana etsy ambony, dia malalaka ny fandefasana fandaharana manana endrika fampielezan-kevitra any amin'ireo fampielezam-peo na fahitalavitra tsy miankina.

Na toy inona na toy inona, ny haino aman-jery tsy miankina dia tsy afaka mandà ny fangatahana fandaminam-pandaharana sy fampielezana fandaharana andoavam-bola ao anatin'ny fampielezan-kevitra.

Ny fandefasana fandaharana na dokam-barotra manana endrika fampielezan-kevitra dia tokony hanaja, araka ny azo atao, ny fitsipiky ny fitovian'ny herijika amin'ireo mpilatsaka ho fidina.

Fizarana 2
Ny amin'ny fanisam-bato

And. 289 – Ny rafitra nasionaly mahaleotena misahana ny fitantanana sy ny fikarakarana ny fifidianana no mamaritra amin'ny alalan'ny fanapahana ny toerana sy ny firafitry ny sampana miandraikitra ny fanisam-bato.

And. 290 – Ataon'ny filohan'ny birao fandatsaham-bato anaty valopy mihidy eo anatrehan'ireo nanao sonia ny fitanana an-tsoratra :

- ny fitanana an-tsoratra ny raharaham-pifidianan'ny birao fandatsaham-bato tsirairay ;
- ireo lisi-pifidianana voasonia ;
- ireo vato manan-kery ;
- ireo vato fotsy na tsy manan-kery, ;
- ireo vato notsipahina ;
- ireo taratasy fanisam-bato ;
- ary raha misy :
 - ireo taratasy nanomezan-pahefana an'ireo solontena ;
 - ireo taratasy fanamarinana ho an'ireo mpanara-maso ;
 - ny taratasin'ny mpiasam-panjakana mamita iraka;
 - ary koa ireo vato noesorina vita sonia fanamarinana ao anaty fonosana mihidy sy rangompohin'ireo mpiakambana ao amin'ny birao fandatsaham-bato.

Ny fonosana mihidy dia alefan'ny filohan'ny birao fandatsaham-bato, ny solontenan'ny rafitra nasionaly mahaleotena misahana ny fitantanana sy ny fikarakarana ny fifidianana, ny Lehiben'ny Fokontany, amin'ny fomba haingana indrindra, any amin'ny filohan'ny sokajy miandraikitra ny fanisam-baton'ny rafitra nasionaly mahaleotena misahana ny fitantanana sy ny fikarakarana ny fifidianana izay hany manana fahefana hanokatra izany fonosana izany eo anatrehan'ireo mpikambana eo anivon'izany sokajy fanisam-bato izany.

And. 291 – Arakaraka ny fahatongavan'ny fonosana mirakitra ireo taratasim-pifidianana, no hanatanterahan'ny sokajy miandraikitra ny fanisam-bato, avy hatrany sy ampahibemaso, ny fanisam-bato raha vao maharay ny fonosana mirakitra ny antontan-taratasim-pifidianana izy.

Ny andraikiny dia miompana indrindra amin'ny fanamarinana ireto :

- ny antontan-taratasy voarakitra tao anatin'ny fonosana mihidy avy tany amin' ireo birao fandatsaham-bato;
- ny fanisana samihafa nataon'ireo birao fandatsaham-bato;
- ireo vato voalaza fa maty sy fotsy teny anivon'ny birao fandatsaham-bato;
- ireo vato notsipahina.

Tsy afaka manitsy na manova ny valim-pifidianana ny sokajy fanisam-bato, fa marihiny ao anaty fitanana an-tsoratra izay fanamarihana ataony, ary indrindra ireo fahadisoana na tsy fanarahan-dalàna notsimponiny isaky ny biraom-pifidianana tsirairay.

Marihiny ao anatin'ny fitanana an-tsoratra ataony izay rehetra toe-javatra, tsy fetezan-draharaha ka azony notsimponina tao amin'ireo taratasin-draharaha, ary izany dia isaky ny biraom-pifidianana tsirairay. Raha noho ny antony lehibe tsy azo anoharana ka tsy tonga tany amin'ny vaomiera tena miandraikitra ny fanisam-bato ireo vokatry ny fifidianana avy amin'ireo birao fandatsaham-bato iray na maromaro, dia manao fitanana an-tsoratra momba izany lesoka izany izy.

Manomboka amin'ny naharaisana ny fonosana farany mihidy avy any amin'ny birao fandatsaham-bato, izy dia tsy maintsy mandefa anaty fonosona mihidy, ao anatin'ny fe-potoana efitra ambiroapolo ora, any amin'ny rafitra nasionaly mahaleotena misahana ny fitantanana sy ny fikarakarana ny fifidianana, ireo an-tontan-taratasy rehetra nampiasaina tamin'ny raharaham-pifidianana miaraka amin'ny fitanana an-tsoratra ny asany miampy ny safim-pamintinana.

Ny dika mitovy amin'ny fitanana an-tsoratra ny asa vitany, sy ireo fitanana an-tsoratra mety hiseho mikasika ny tsy fahavitan'ny fifidianana izay nosoratany, dia alefan'ny sokajy miandraikitra ny fanisam-bato any amin'ny Fitsarana misahana ny ady amin'ny Fanjakana.

And. 292 – Ny fandania amin'ny fampandehanan-draharahan'ireo sokajy miandraikitra ny fanisam-bato dia alaina ao amin'ny toko fandaniam-bola momba ny fifidianana amin'ny tetibolan'ny rafitra nasionaly mahaleotena misahana ny fitantanana sy ny fikarakarana ny fifidianana.

Ireo mpikambana ao amin'ny sokajy miandraikitra ny fanisam-bato dia mahazo tambin-karama nifanekena ka ny rafitra nasionaly mahaleotena misahana ny fitantanana sy ny fikarakarana ny fifidianana no mamaritra ny fitambaram-bidiny.

Fizarana 3

Ny amin'ny fikirakirana ny vokatra sy ny fanambaràna ny voka-pifidianana vonjimaika

And. 293 – Ny rafitra nasionaly mahaleotena misahana ny fitantanana sy ny fikarakarana ny fifidianana no miandraikitra ny fikirakirana ny antontan-taratasim-pifidianana sy ny famoahana ny voka-pifidianana vonjimaika amin'ny fifidianana isam-paritra.

And. 294 – Manomboka amin'ny naharaisana ny antotan-taratasim-pifidianana avy amin'ny Sokajy miandraikitra ny fanisam-bato, araka ny fepetra voalazan'ny andininy etsy ambony, ny rafitra nasionaly mahaleotena misahana ny fitantanana sy ny fikarakarana ny fifidianana dia manamarina ireto :

- ny firafitra sy ny fanarahan-dalànan'ireo antotan-taratasim-pifidianana voaray ;
- ny fifanarahan'ny zavatra voalaza ao, ary raha toa ka misy tsy fifanarahana dia manao ny fanitsiana tokony ho izy;
- ny fahamarinan'ny kajikajy nataon'ny mpikambana amin'ny biraom-pifidianana sy ny Sokajy miandraikitra ny fanisam-bato.

And. 295 – Azon'ny rafitra nasionaly mahaleotena misahana ny fitantanana sy ny fikarakarana ny fifidianana atao ny mampitaha ny fitanana an-tsoratra noho ny fangatahan'ny mpilatsaka ho fidina iray na maromaro voakasika, na ny solon-tena nomem-pahefana amin'izany.

Didy amam-pitsipika no mamaritra ny fombafomba fampiharana ity fepatra ity.

And. 296 – Ny rafitra nasionaly mahaleotena misahana ny fitantanana sy ny fikarakarana ny fifidianana no mamaritra sy mampahafantatra ny besinimaro, isaky ny fari-pifidianana, birao fandatsaham-bato isaky ny birao fandatsaham-bato, ny voka-pifidianana vonjimaika raha ela indrindra ao anatin'ny folo andro manaraka ny nandraisana ny fonosana farany mihidy avy tamin'ny Sampana misahana ny fanisam-bato.

And. 297 – Ny rafitra nasionaly mahaleotena misahana ny fitantanana sy ny fikarakarana ny fifidianana, amin'ny famoahana ny valim-pifidianana vojimaika, no mamaritra ireto manaraka ireto:

- ny isa manontolo ny mpifidy voasoratra;
- ny isa manontolo ny mpifidy nandatsa-bato;
- ny isan'ny vato fotsy sy ny vato maty ;
- ny isa manontolo ny vato manan-kery ;
- ny tahan'ny fandraisana anjara tamin'ny fifidianana ;
- ny isan'ny vato manan-kery azon'ny mpilatsaka ho fidina tsirairay.

Ny valim-pifidianana vonjimaika, ampiarahana aminy ireo tabilao fanampiny maneho ny valim-pifidianana isaky ny birao fandatsaham-bato, ny antontan-taratasy nampiasaina tamin'ny raharaham-pifidianana anton'ny fitsipahana sy/na nangataham-pandravàna dia alefa, ao anatin'ny fotoana fohy, any amin'ny Fitsarana misahana ny ady amin'ny fanjakana mahefa eny amin'ny lafitany.

Izany fampitana izany dia iantohan'ny rafitra nasionaly mahaleotena misahana ny fitantanana sy ny fikarakarana ny fifidianana.

Fizarana 4

Ny amin'ny fanambarana ny vokatra raikitra

And. 298 – Ny Fitsarana misahana ny ady amin'ny fanjakana no mamoka ny voka-pifidianana raikitra amin'ny alalan'ny didim-pitsarana, raha ela indrindra, ao anatin'ny fe-potoana telopolo andro manomboka amin'ny vaninandro amoahana ny vokatra vonjimaika nataon'ny rafitra nasionaly mahaleotena misahana ny fitantanana sy ny fikarakarana ny fifidianana.

And. 299 – Izy no manao ny fanambarana ampahibemaso amin'ny fomba ofisialy ny voka-pifidianana ka faritana manokana amin'izany, isaky ny fari-pifidianana:

- ny fitambaran'ireo mpifidy voasoratra anarana ;
- ny fitambaran'ireo mpifidy nandatsa-bato;
- ny isan'ireo taratasin-datsabato fotsy sy/na maty ;
- ny fitambaran'ireo taratasin-datsabato manan-kery ;
- ny isan'ireo taratasin-datsabato manan-kery azon'ny lisitry ny mpilatsaka ho fidina tsirairay ;
- ny isan'ny toerana azon'ny lisitry ny mpilatsaka ho fidina tsirairay ;
- ireo mpilatsaka ho fidina ambara fa voafidy ho Lehiben'ny rafitra mpanatanteraka sy ho Mpanolo-tsaina.

Avoakany amin'ny Gazetim-panjakan'ny Repoblika izany didim-pitsarana izany, ary ampahafantariny, ao anaitin'ny valo andro manomboka amin'ny namoahana azy, ny rafitra nasionaly mahaleotena misahana ny fitantanana sy ny fikarakarana ny fifidianana, sy ny solontena nomem-pahefan'ireo lisitra mpilatsaka ho fidina voakasik'izany.

Sokajy 8 **Ny amin'ny fifanolanana mikasika ny fifidianana**

Fizarana voalohany *Ny amin'ny fahefana mikasika ny fifanolanana*

And. 300 – Ny Fitsarana misahana ny ady amin'ny Fanjakana no afa-manapaka amin'ny fandinihana ny fangatahana na fanipahana rehetra mety hitranga na eo amin'ny soratra fanamarinana izay anisan'ny mialoha ny raharaham-pifidianana na amin' izay rehetra mifandraika amin'ny fizotry ny latsa-bato.

Izy ihany no mahefa hanamarina ny fanafoanana ankapobeny na ampahany, izay mety ho vokatry ny fanadinoana ireo fombafomba fototra. Mandritra ny fanaraha-maso ny fitanana an-tsoratr'ireo birao fandatsaham-bato sy ireo Sampana misahana ny fanisam-bato, ny Fitsarana misahana ny ady amin'ny Fanjakana, na dia tsy misy fitarainana aza, dia afaka mandray andraikitra avy hatrany raha heveriny fa nisy fandikana ireo fepetra voalazan'ny lalàna na didy amam-pitsipika, na noho ny antony hafa mahakasika ny filaminam-bahoaka.

Raha toa ka misy fanapahan-kevitra, raha voaporofa ireo toe-javatra mahatonga ny fandikandàlana na ireo raharaha nolavina izay nanimba ny fahamarinan'ny fifidianana sy nanova ny hevitrin'ny latsa-bato nataon'ireo mpifidy, ny Fitsarana dia mandidy ny fisian'ny famerenana ny fifidianana.

And. 301 – Ny Fitsarana misahana ny ady amin'ny Fanjakana no mamoaika ny didy voalohany sady farany mikasika ireo fitarainana momba ny fifidianana isam-paritra.

Ampahafantarina ny antokon'olona voakasika ny didim-pitsarana avoakany ao anatin'ny valo andro manaraka ny namoahana azy.

And. 302 – Azo atao ny mangataka fanafoanana ny didim-pitsaran'ny Fitsarana misahana ny ady amin'ny Fanjakana eo anoloan'ny Filankevi-panjakana aoamin'ny Fitsarana Tampony. Tsy mampihantona ny fampiharana ny didim-pitsarana nefa izany.

Fizarana 2 *Ny amin'ny paikady*

And. 303 – Ny paikady arahina manoloana ny Fitsarana misahana ny ady amin'ny Fanjakana mikasika ny fanoherana rehetra momba ny fifidianana isam-paritra dia tsy maintsy atao manaraka ny fepetra sy ny fomba voalazan'ny fehezan-dalàna mikasika ny fifidianana sy, raha toa ka misy, ny lalàna nasiam-panovana laharana 2001-025 tamin'ny 21 desambra 2001 mikasika ny Fitsarana misahana ny ady amin'ny Fanjakana sy ny Fitsarana ara-bola.

And. 304 – Ny paikady arahina manoloana ny mpitsara mpanafoana dia izay voalazan'ny fehezan-dalàna mikasika ny fifidianana sy ly lalàna fehizoro laharana 2004-036 tamin'ny 01 oktobra 2004 mikasika ny Fitsarana Tampony.

And. 305 – Na ahoana na ahoana, ny fifanolanana rehetra mikasika ny fifidianana isam-paritra dia tsy maintsy karakaraina ao anatin'ny telo volana manomboka amin'ny fanambarana ny voka-pifidianana raikitra.

TOKO II FEPETRA MANOKANA

Sokajy voalohany Ny amin'ny fifidianana kaominaly

*Fizarana voalohany
Ny amin'ny fomba fifidianana*

And. 306 – Ny Ben'ny tanàna sy ny mpikambana amin'ny Filan-kevitra dia fidiana amin'ny alàlan'ny latsa-bato ataon'ny daholobe mivantana ho amin'ny fotoam-piasana efa-taona azo avaozina, amin'ny fifidianana lisitra amin'ny alàlan'ny fitsinjaran-toerana amin'ny fihodinana indray mandeha, tsy misy fampifangaroana, na latsa-bato ahazoan'ny mpifidy mampifanova ny laharan'ny ho fidina eo amin'ny lisitra, na lisitra tsy feno.

Ny toerana dia omena ny kandidà araka ny filaharan'izy ireo anatin'ny lisitra tsirairay, ary araka ny fitsipiky ny salan'isa betsaka.

Voafidy ho Ben'ny tanàna izay kandidà loha-lisitra ao amin'ny lisitra nahazo vato betsaka indrindra.

Ny kandidà loha-lisitra nefa tsy voafidy ho Ben'ny tanàna dia miataka amin'ny fitsinjarana ny toerana ao anatin'ny Filan-kevitra monisipaly na kaominaly, araka ny voafaritry ny andininy faha-278 amin'ity lalàna ity.

Raha toa ka misy lisitra maromaro mahazo salan'isa mitovy amin'ny fanomezana ny toerana farany, dia omena izay lisitra nahazo vato betsaka indrindra izany. Raha toa ka mitovy ny isambato dia omena izay kandidà zokiny indrindra amin'ireo tokony ho voafidy ny toerana farany.

*Fizarana 2
Ny amin'ny firafitry ny Filan-kevitra monisipaly na kaominaly*

And. 307 – Ny Filan-kevitra dia mirafitra toy izao :

1. Ho an'ny Kaominina ambonivohitra :

- Mpanolo-tsaina monisipaly 9 ho an'ny Kaominina ambonivohitra misy mponina latsaky ny 50 000 ;
- Mpanolo-tsaina monisipaly 11 ho an'ny Kaominina ambonivohitra misy mponina 50 001 hatramin'ny 80 000 ;
- Mpanolo-tsaina monisipaly 13 ho an'ny Kaominina ambonivohitra misy mponina 80 001 hatramin'ny 120 000 ;
- Mpanolo-tsaina monisipaly 15 ho an'ny Kaominina ambonivohitra misy mponina 120 001 hatramin'ny 250 000 ;
- Mpanolo-tsaina monisipaly 19 ho an'ny Kaominina ambonivohitra misy mponina mihoatra ny 250 000 ;
- Mpanolo-tsaina monisipaly 55 ho an'ny Kaominina Antananarivo Renivohitra;

2. Ho an'ny Kaominina ambanivohitra :

- Mpanolo-tsaina kaominaly 5 ho an'ny Kaominina ambanivohitra misy mponina latsaky ny 10 000;
- Mpanolo-tsaina kaominaly 7 ho an'ny Kaominina ambanivohitra misy mponina mihoatra ny 10 000.

Ny Kaominina iray dia mirafitra ho fari-piadidiam-pifidianana iray.

Fizarana 3

Ny amin'ny fepetra manokana fetezan-ko fidina

And. 308 – Ny olom-pirenena rehetra manana zo hifidy dia azo fidina ho Ben'ny tanàna na ho Mpanolo-tsaina kaominaly na monisipaly manaraka ny fepetra ary tsy iantohana ireto fepetra manaraka ireto :

1. feno iraika amby roampolo taona na mihoatra amin'ny datin'ny latsa-bato ;
2. mponina raikitra ao amin'ilay Kaominina ilatsahany ho fidina sy/na manana tombon-tsoa manokana ho an'izany Kaominina izany.

Fizarana 4

Ny amin'ny fepetra fandraisana anjara amin'ny fifidianana

And. 309 – Ny mpikambana ao amin'ny Filan-kevitra monisipaly na kaominaly sy ireo Ben'ny tanàna ary ny lefiny izay milatsaka ho fidina amin'ny fifidianana kaominaly dia ambara fa mametra-pialana avy hatrany raha vantany vao neken'ny rafitra misahana ny fanamarinana sy ny firaketana ny filatsahan-kofodina. Ny lefitry ny Ben'ny tanàna nambara fa nametra-pialana no misahana ny fisoloan-toerana azy, manaraka ny filaharan'ny fanendrena azy ireo.

And. 310 – Didim-pitondrana raisin'ny Prefe no mametra ny isan'ny mpikambana amin'ny Filan-kevitra ho fidina arakaraka ny isan'ny mponina azo avy amin'ny fanisana nataon'ny Lehiben'ny Distrika.

Sokajy 2

Ny amin'ny fifidianana eny anivon'ny Faritra

Fizarana voalohany

Ny amin'ny fomba fifidianana

And. 311 – Ny Lehiben'ny Faritra sy ny mpikambana amin'ny Filankevi-paritra dia fidiana amin'ny alalan'ny latsa-bato tsy ataon'ny daholobe mivantana ho amin'ny fotoam-piasana efa-taona azo avaozina, amin'ny fifidianana lisitra amin'ny alàlan'ny fitsinjaran-toerana amin'ny fihodinana indray mandeha, tsy misy fampifangaroana, na latsa-bato ahazoan'ny mpifidy mampifanova ny laharan'ny ho fidina eo amin'ny lisitra, na lisitra tsy feno.

Voafidy ho Lehiben'ny Faritra izay kandidà loha-lisitra ao amin'ny lisitra nahazo vato betsaka indrindra.

Ny toerana dia omena ny kandidà araka ny filaharan'izy ireo anatin'ny lisitra tsirairay, ary araka ny fitsipiky ny salan'isa betsaka.

Ny kandidà loha-lisitra nefa tsy voafidy ho Lehiben'ny Faritra dia miataka amin'ny fitsinjarana ny toerana ao anatin'ny Filan-kevi-paritra.

Raha toa ka misy lisitra maromaro mahazo salan'isa mitovy amin'ny fanomezana ny toerana farany, dia omena izay lisitra nahazo vato betsaka indrindra izany. Raha toa ka mitovy ny isambato dia omena izay kandidà zokiny indrindra amin'ireo tokony ho voafidy ny toerana farany.

Fizarana 2
Ny amin'ny lisi-pifidianana

And. 312 – Ny rafitra nasionaly mahaleotena misahana ny fitantanana sy ny fikarakarana ny fifidianana no mandrafitra ny lisi-pifidianana.

And. 313 – Ny Ben'ny tanàna sy ny Mpanolo-tsaina monisipaly na kaominaly amin'ny Kaominina mandrafitra ny Faritra no manan-jo hifidy.

Fizarana 3
Ny amin'ny firafitry ny Filankevi-paritra

And. 314 – Ferana ho roa isaky ny Distrika mandrafitra ny Faritra ny isan'ny mpikambana ao amin'ny Filankevi-paritra.

Ny Faritra iray dia mirafitra ho fari-piadiidiam-pifidianana iray.

Fizarana 4
Ny amin'ireo fepetra manokana fetezan-ko fidina

And. 315 – Tsy iantohana ireto fepetra voalazan'ny andininy faha-245 etsy ambony, ny olom-pirenena rehetra manana zo hifidy dia azo fidina ho Lehiben'ny Faritra na ho Mpanolo-tsaim-paritra manaraka ireto fepetra manokana ireto :

1. feno telopolo taona na mihoatra amin'ny datin'ny latsa-bato ;
2. manana tombon-tsoa manokana ho an'izany Faritra izany.

Fizarana 5
Ny amin'ny fepetra fandraisana anjara amin'ny fifidianana

And. 316 – Ny mpikambana ao amin'ny Filankevi-paritra sy ny Lehiben'ny Faritra izay milatsaka ho fidina amin'ny fifidianana eny anivon'ny Faritra dia ambara fa mametra-pialana avy hatrany raha vantany vao neken'ny rafitra misahana ny fanamarinana sy ny firaketana ny filatsahan-kofodina. Ny lefitry ny Lehiben'ny Faritra nambara fa nametra-pialana no misahana ny fisoloan-toerana azy, manaraka ny filaharan'ny fanendrena azy ireo.

Sokajy 3
Ny amin'ny fifidianana eny anivon'ny Faritany

Fizarana voalohany
Ny amin'ny fomba fifidianana

And. 317 – Ny Lehiben'ny Faritany sy ny mpikambana amin'ny Filankevi-paritany dia fidiana amin'ny alalan'ny latsa-bato tsy ataon'ny daholobe mivantana ho amin'ny fotoam-piasana efa-taona azo avaozina, amin'ny fifidianana lisitra amin'ny alàlan'ny fitsinjaran-toerana amin'ny fihodinana indray mandeha, tsy misy fampifangaroana, na latsa-bato ahazoan'ny mpifidy mampifanova ny laharan'ny ho fidina eo amin'ny lisitra, na lisitra tsy feno.

Voafidy ho Lehiben'ny Faritany izay kandida loha-lisitra ao amin'ny lisitra nahazo vato betsaka indrindra.

Ny toerana dia omena ny kandidà araka ny filaharan'izy ireo anatin'ny lisitra tsirairay, ary araka ny fitsipiky ny salan'isa betsaka.

Ny kandidà loha-lisitra nefa tsy voafidy ho Lehiben'ny Faritany dia miataka amin'ny fitsinjarana ny toerana ao anatin'ny Filan-kevi-paritany.

Raha toa ka misy lisitra maromaro mahazo salan'isa mitovy amin'ny fanomezana ny toerana farany, dia omena izay lisitra nahazo vato betsaka indrindra izany. Raha toa ka mitovy ny isambato dia omena izay kandidà zokiny indrindra amin'ireo tokony ho voafidy ny toerana farany.

Fizarana 2

Ny amin'ny lisi-pifidianana

And. 318 – Ny rafitra nasionaly mahaleotena misahana ny fitantanana sy ny fikarakarana ny fifidianana no mandrafitra ny lisi-pifidianana.

And. 319 – Ny Lehiben'ny Faritra sy ny Mpanolo-tsaim-paritra amin'ny Faritra mandrafitra ny Faritany no manan-jo hifidy.

Fizarana 3

Ny amin'ny firafitry ny Filankevi-paritany

And. 320 – Ferana ho roa isaky ny Distrika mandrafitra ny Faritany ny isan'ny mpikambana ao amin'ny Filankevi-paritany.

Ny Faritra iray dia mirafitra ho fari-piadiam-pifidianana iray.

Fizarana 4

Ny amin'ireo fepetra manokana fetezan-ko fidina

And. 321 – Tsy iantohana ireto fepetra voalazan'ny andininy faha-245 etsy ambony, ny olom-pirenena rehetra manana zo hifidy dia azo fidina ho Lehiben'ny Faritany na ho Mpanolo-tsaim-paritany manaraka ireto fepetra manokana ireto :

1. feno dimy amby telopolo taona na mihoatra amin'ny datin'ny latsa-bato ;
2. manana tombon-tsoa manokana ho an'izany Faritany izany.

Fizarana 5

Ny amin'ny fepetra fandraisana anjara amin'ny fifidianana

And. 322 – Ny mpikambana ao amin'ny Filankevi-paritany sy ny Lehiben'ny Faritany izay milatsaka ho fidina amin'ny fifidianana eny anivon'ny Faritany dia ambara fa mametra-pialana avy hatrany raha vantany vao neken'ny rafitra misahana ny fanamarinana sy ny firaketana ny filatsahan-kofodina. Ny lefitry ny Lehiben'ny Faritany nambara fa nametra-pialana no misahana ny fisoloan-toerana azy, manaraka ny filaharan'ny fanendrena azy ireo.

TOKO III
Fepetra samihafa

And. 323 – Ampiharina amin'ireo toe-javatra rehetra tsy voafehin'ity lohateny ity ny fehazan-dalàna mikasika ny fifidianana sy ireo rijan-teny fampiharana azy.

LOHATENY VII
FEPETRA SAMIHAFANA SY FARANY

And. 324 – Rijan-tenin'ny didy amam-pitsipika no hamaritana ny fombafomba fampiharana ity lalàna ity.

And. 325 – Manohy ny asany rafitr'ireo vondrombahoakam-paritra itsinjaram-pahefana misy amin'izao fotoana izao mandrapahavitan'ny fametrahana ny rafitra vaovao voalazan'ity lalàna ity.

And. 326 – Foanana ary dia foana ireo fepetra rehetra teo aloha mifanohitra amin'ity lalàna ity, fa indrindra :

- ny lalàna laharana faha 94-001 tamin'ny 26 Avrila 1995 mikasika ny isa, ny famaritana, ny fiantsoana ary ny renivohitr'ireo vondrombahoakam-paritra itsinjaram-pahefana ;
- ny lalàna laharana faha 94-006 tamin'ny 26 Avrila 1995 mikasika ny fifidianana isam-paritra ;
- ny lalàna laharana faha 94-007 mikasika ireo fahefana sy tandrifim-pahefana ary loharanom-bolan'ny vondrombahoakam-paritra itsinjaram-pahefana ;
- ny lalàna laharana faha 94-008 mikasika ny fandaminana sy ny fomba fiasa ary ny anjara andraikitra ny vondrombahoakam-paritra itsinjaram-pahefana ;
- ny lalàna laharana faha 95-005 tamin'ny 21 jona 1995 mikasika ny tetimbolan'ireo vondrombahoakam-paritra itsinjaram-pahefana ;
- ny lalàna laharana faha-2004-001 tamin'ny 17 jona 2004 mikasika ny Faritra sy ireo didy amam-pitsipika fampiharana azy.

And. 327 – Ity lalàna ity dia havoaka amin'ny *Gazetim-panjakan'ny Repoblika*.

Hotanterahina izany fa Lalàm-panjakana.

Navoaka hanan-kery teto Antananarivo, ny